

(清)奕訢

(欽定)平定七省



中國民族圖書館整理

北京中國書店出版

河北省三河縣中趙甫古書裝印廠印

一九八五年十一月

前言

〔欽定〕平定七省方略〕是清光緒年間內廷軍機大臣總理各國事務衙門和碩恭親王奕訢等敕修，朱學勤、陳邦瑞等總纂的一部宮修書。此書分為一千一百五十二卷，為清內府鉛活字印本。

全書包括以下幾部分：〔剿平粵匪方略〕四百二十卷，卷首一卷，收錄起自道光三十年（一八五〇）五月，迄於同治五年二月清政府鎮壓太平天國革命軍的帝諭、臣奏等，末附〔設立長江水師章程〕。

卷首有同治十一年（一八七三）御序；『剿平捻匪方略』三百二十卷，主要收錄自咸豐元年（一八五一）至同治七年清軍鎮壓捻軍起義的奏諭和作戰策略；『平定雲南回匪方略』五十卷，記載咸豐五年（一八五五）九月至光緒五年十月，雲南回民起義後，堅持反清鬪爭長達二十餘年，慘遭清廷鎮壓的經過情況；『平定貴州苗匪紀略』四十卷，內容記述咸豐五年（一八五五）五月至光緒七年二月清政府鎮壓貴州苗民起義的奏諭和事件經過，卷首有光緒二十二年（一八九六）御序；『平定陝、甘、新疆回匪方

略三百二十卷，卷首一卷。主要彙集了從咸豐五年（一八五五）八月至光緒十四年九月計三十餘年間清政府鎮壓陝西、甘肅、新疆各地回民起義組織的上諭、奏章等。書中還記載了清同治年間，英、俄帝國主義乘機派兵侵佔新疆；左宗棠率軍討伐在新疆各族人民支持下，擊敗阿古柏侵略軍的經過。書前有光緒二十二年（一八九六）御序，卷首為咸豐、同治帝聖制詩文。

書中對所發生的事件均依年、月、日列次，涉及兩廣、兩湖、雲、貴、川、陝、甘、新和山東、江蘇、

安徽、河南等十幾個省區。

由於奕訢、朱學勤等人站在清代統治階級的立場上，撰修此書，選材多從張揚朝廷「德業」，表彰清軍「戰績」觀點出發，對各族人民起義鬪爭，竭力予以誣蔑與誹謗，但因是書取材於內府檔案，成書年代又近於事件發生之時，記載詳實，對研究清史、地方史和校史工作以及研究清朝的民族政策、軍事策略等均有重要的史料價值。

〔欽定〕平定七省方略〕是百餘年前清內府刊本，當初印數有限，社會流傳甚少，現存原本多

遭蟲蛀，殘缺不全，不便檢閱。為滿足民族研究工作
者和學術界的需要，我館受北京市中國書店委託，
在中央民族學院圖書館的大力協助下，用兩館所
藏原書加以校補、輯錄整理，合併為一百冊，由北
京中國書店影印發行。

為保持此書的歷史原貌，使讀者能有分析問
題的準確的資料依據，對書的內容未加任何改動，
對其中的糟粕我們相信讀者在使用中自會加以
鑒別。

中國民族圖書館

一九八五年十一月

剿平粵匪方略序

我國家受

天眷命撫臨方夏

列祖

列宗創業垂統以紘以內悉主悉臣文德
武功超軼千古自三省教匪平定後

中土人民安業冠盜不作者垂五十年即邊鄙偶有騷動不拉踵而就謐平未有敢自辜濩燾公然叛亂流毒十餘省如粵匪者也粵匪蠢動於道光庚戌之年翦滅於同治甲子之歲推原禍本蓋由兩粵民俗獷悍官吏

玩泄既不能化導於先嘯聚劫掠又不能威克於後養癰既成燎原遂熾我

皇考文宗顯皇帝當其倡亂之初即命重臣發兵討捕承平日久將士多不知兵潰逸出柙幾亂大局

皇考震怒逮治債事諸臣更簡良將指授
方略分路扼擊賊尋北犯擾及畿甸
復命將要擊不及一年此股禽獮無
遺然後東南軍事得以溢容措置拔
將才籌饋鑲造戰船集團練規畫既
備於是官軍日益壯賊勢日益盛矣

皇考自臨御以來即會天下多事宵旰勵
精不遑暇逸憫念黔黎懼賊荼毒饑
溺在懷焦勞特甚每聞寇氛擾一城
則憂形寤寐聞官軍報一捷則喜動

天顏屢顫

昊穹為民請命馴至

巡方違豫猶復批章引對不肯少休此仁
慈憂勤之實蓋十一年有如一日者
也而且

聖哲如神明見萬里凡封疆將帥之才識
優劣功過長短鑒燭無遺治賊治軍
各得其任破格用人賞信罰必以故

在位竭節伏才奮起各省士民渥荷
祖宗二百年深仁厚澤之淪浹感

皇考痼瘵在抱之苦衷團練輸將同心敵
愾於是

天人協心所向克捷至咸豐十一年江西

廩安安慶垂拔江浙閩滬屢有捷音

戡定之勲翹足可待而

皇考棄羣臣矣予以冲齡寅紹大統承

皇考付託之重顧惟時艱業業乾乾罔知

攸濟仰賴

兩宮皇太后撫育藐躬慈誨諄至指授樞
垣諸臣及各督撫統兵大臣一應攻

討機宜恪守

成憲和衷共濟用能底定多方渠魁殄滅
溥海之內重登衽席於是

皇考未竟之緒一朝始成

皇考在天之靈一朝始慰此誠予小子之
幸天下臣民之福要皆由

皇考畏天愛民知人養士之盛德宏謨故

克默荷

天眷

祖佑以致斯也今大憝雖除而吾民之苦
兵燹者已深將士之懼鋒鏑者已衆
輸餉供軍民力已竭撫綏數年元氣

未復言念及此益深祇懼惟當恭承
懿訓勤求治理爾諸臣亦當追惟

皇考委任之深恩奉公忘私上下交儆即
以此編為毫末斧柯之炯或勿謂民
器為可忽勿謂小醜為可玩勿以賊
平而懈武備勿以內安而弛邊防抑

墨揚清勸農善俗用以持盈保泰敬
迓

天休篤我國家億萬年無疆之祐予一人
有厚望焉

同治十有一年歲次壬申季秋月吉
御筆

欽定勦平粵匪方略

總裁總纂提調收掌纂修諸臣職名

總裁

內廷行走宗人府左宗正正白旗滿洲都統總理 行營大臣管理 內繙書房事務

閱兵大臣管理右翼近支第三族宗室族長總理各國事務衙門大臣和碩恭親王

臣奕訢

經筵講官太子太保 體仁閣大學士稽察欽奉 上諭事件處 武英殿總裁管理工部事

務鑲白旗滿洲都統管理右翼幼官學神機營 內繙書房事務總理各國事務衙門大臣

臣文祥

經筵講官太子少保吏部尚書鑲藍旗滿洲都統閱兵大臣管

理 內繙書房事務 國史館總裁總理各國事務衙門大臣

臣寶鋆

經筵講官兵部尚書 國史館總裁總理各國事務衙門大臣

臣沈桂芬

經筵講官工部尚書 弘德殿行走 武英殿總裁教習庶吉士 臣李鴻藻

總纂兼提調官

宗人府 府 丞 臣朱學勤

太僕寺 卿 臣朱智

三品銜內閣侍讀學士 臣許庚身

滿洲提調官

二品頂戴戶部緞疋庫郎中 今升湖南岳常澧道 臣增壽

四品銜理藩院郎中臣崇繕

按察使銜候選道理藩院郎中臣奎綬

原任按察使銜候選道吏部員外郎臣瑞廉

滿洲幫提調官

三品銜候選道內閣侍讀今升湖北鄖陽府知府臣慶裕

滿洲收掌官

理藩院員外郎臣續昌

吏部郎中臣春岫

內閣中書候補侍讀臣尙德

知府銜理藩院員外郎臣志文

漢收掌兼纂修官

三品銜內閣侍讀今升山西蒲州府知府臣江人鏡

刑部員外郎今升湖南候補道臣夏獻雲

鴻臚寺少卿臣周瑞清

三品銜候補五品京堂臣徐用儀

滿洲纂修官

按察使銜戶部顏料庫員外郎今升浙江金衢嚴道臣英廉

鹽運使銜候選知府工部郎中臣崐玉

候選知府內閣侍讀臣額圖琿

四品銜理藩院員外郎臣英謙

候選道戶部銀庫員外郎臣文海

戶部筆帖式臣朱文鑒

盛京工部主事臣裕昌

鴻臚寺主簿臣鈺寶

原任太常寺主簿臣和爾根

漢纂修官

吏部員外郎署收掌兼校對官臣靳邦慶

工部郎中升任山西朔平府知府臣杜來錫

道銜戶部員外郎臣李廷簫

吏部郎中臣史崧秀

戶部郎中今升福建興化府知府臣方熊祥

三品銜戶部員外郎臣葉衍蘭

四品銜兵部郎中臣蕭庭滋

翰林院侍讀學士臣文澂

翰林院編修臣梅啟熙

翰林院編修兼襲雲騎尉世職臣吳仁傑

兵部員外郎臣金日修

禮部主事兼校對官臣胡延燮

刑部主事臣陸爽棠

刑部主事臣張岳年

翰林院侍講學士銜詹事府司經局洗馬臣楊紹和

原任戶部郎中江蘇江甯府知府臣馮柏年

原任四品銜兵部員外郎臣吳國杰
協修官

四品銜禮部郎中今升江西道監察御史臣梁僧寶

翰林院編修臣汪鳴鑾

校對官

六品銜內閣典籍委署侍讀臣李耀奎
工部員外郎臣李方豫

刑

部

主

事臣李士彬

工

部

主

事臣丁鶴年

吏

部

主

事臣沈源深

吏

部

主

事臣魏邦翰

四品銜刑部員外郎今升陝西道監察御史臣沈淮

戶

部

主

事臣陳毓秀

內閣中書委署侍讀臣邵文煦

刑

部

主

事臣馮光勛

道

銜

兵

部

郎

中臣李固恆

四品銜內閣典籍委署侍讀候選知府臣常如楷

三品頂戴內閣中書委署侍讀今道員用候選知府臣汪元慶

內閣中書委署侍讀臣劉恩濬

內閣中書委署侍讀臣王殿鳳

內閣中書委署侍讀臣楊澍鼎

五品銜內閣中書委署侍讀候選員外郎臣劉澁焞

內閣中書委署侍讀臣馮向華

員外郎銜內閣中書委署侍讀臣黃貽楫

內閣中書委署侍讀臣劉景宸

五品銜內閣典籍委署侍讀臣翁曾翰

內閣中書委署侍讀臣王憲曾

內閣中書委署侍讀臣王莖

內閣中書委署侍讀臣唐寶鑑

內閣中書委署侍讀臣曹翰書

內閣中書委署侍讀臣李如松

內閣中書委署侍讀臣厲祥官

內閣中書委署侍讀臣吳琦

內閣中書委署侍讀臣喻緝熙

內閣中書委署侍讀臣董文燦

內閣中書委署侍讀臣馮鏡仁

內閣中書今官翰林院庶吉士臣廖壽豐

內閣中書委署侍讀臣陳啟焜

內閣中書臣袁保齡

內閣中書臣曾金章

內閣中書臣馬紹訓

內閣中書委署侍讀臣牟樹棠

譯漢官

詹事府筆帖式臣福蔭

翰林院待詔臣松年

兵科筆帖式臣頤壽

內閣中書臣貴瑄

通政司筆帖式臣善永

筆帖式臣圖麟

筆

帖

式臣英

秀

筆

帖

式臣樸

奎

筆

帖

式臣慶

恩

光

祿

寺

筆

帖

式臣貫

璋

兵

部

筆

帖

式臣文

光

刑

部

筆

帖

式臣恩

惠

筆

帖

式臣慶

順

筆

帖

式臣尙宗順

筆

帖

式臣裕啟

工

部

司

匠臣椿年

原

任

筆

帖

式臣長慶

欽定勦平粵匪方略目錄

卷首

聖製一卷

卷一至卷五

道光三十年五月庚戌至咸豐元年六月乙亥

卷六至卷十

咸豐元年七月丙戌至二年二月己酉

卷十一至卷十五

咸豐二年三月辛亥至七月甲戌

卷十六至卷二十

咸豐二年八月己卯至十一月乙亥

卷二十一至卷二十五

咸豐二年十二月丙子至三年正月己巳

卷二十六至卷三十

咸豐三年正月庚午至二月甲辰

卷三十一至卷三十五

咸豐三年三月乙巳至四月丙申

卷三十六至卷四十

咸豐三年四月丁酉至五月辛酉

卷四十一至卷四十五

咸豐三年五月壬戌至六月戊子

卷四十六至卷五十

咸豐三年六月己丑至七月戊午

卷五十一至卷五十五

咸豐三年七月辛酉至八月癸巳

卷五十六至卷六十

咸豐三年八月甲午至九月壬戌

卷六十一至卷六十五

咸豐三年九月癸亥至十月己丑

卷六十六至卷七十

咸豐三年十月壬辰至十一月庚午

卷七十一至卷七十五

咸豐三年十二月辛未至四年正月乙巳

卷七十六至卷八十

咸豐四年正月丁未至二月戊子

卷八十一至卷八十五

咸豐四年二月己丑至三月丙辰

卷八十六至卷九十

咸豐四年三月丁巳至四月乙酉

卷九十一至卷九十五

咸豐四年四月戊子至五月丁卯

卷九十六至卷一百

咸豐四年六月戊辰至七月丁卯

卷一百一至卷一百五

咸豐四年閏七月戊辰至八月乙丑

卷一百六至卷一百十

咸豐四年九月丁卯至十月甲子

卷一百十一至卷一百十五

咸豐四年十一月丙寅至十二月壬子

卷一百十六至卷一百二十

咸豐四年十二月乙卯至五年二月乙巳

卷一百二十一至卷一百二十五

咸豐五年二月丙午至四月癸卯

卷一百二十六至卷一百三十

咸豐五年四月丙午至五月辛卯

卷一百三十一至卷一百三十五

咸豐五年六月乙未至八月丙辰

卷一百三十六至卷一百四十

咸豐五年九月辛酉至十一月甲戌

卷一百四十一至卷一百四十五

咸豐五年十一月丁丑至六年正月丁亥

卷一百四十六至卷一百五十

咸豐六年二月辛卯至三月丙戌

卷一百五十一至卷一百五十五

咸豐六年四月丁亥至五月癸未

卷一百五十六至卷一百六十

咸豐六年六月丙戌至八月乙巳

卷一百六十一至卷一百六十五

咸豐六年八月丙午至十一月甲戌

卷一百六十六至卷一百七十

咸豐六年十一月丙子至七年二月壬子

卷一百七十一至卷一百七十五

咸豐七年三月癸丑至閏五月丁亥

卷一百七十六至卷一百八十

咸豐七年閏五月壬辰至八月丁巳

卷一百八十一至卷一百八十五

咸豐七年八月壬戌至十一月乙巳

卷一百八十六至卷一百九十

咸豐七年十二月己酉至八年三月己丑

卷一百九十一至卷一百九十五

咸豐八年三月庚寅至五月己丑

卷一百九十六至卷二百

咸豐八年五月壬辰至七月壬寅

卷二百一至卷二百五

咸豐八年八月甲辰至九月甲午

卷二百六至卷二百十

咸豐八年九月乙未至十一月庚子

卷二百十一至卷二百十五

咸豐八年十二月壬寅至九年二月庚午

卷二百十六至卷二百二十

咸豐九年三月辛未至六月丁卯

卷二百二十一至卷二百二十五

咸豐九年七月庚午至九月甲午

卷二百二十六至卷二百三十

咸豐九年十月丁酉至十年二月壬子

卷二百三十一至卷二百三十五

咸豐十年二月甲寅至閏三月己酉

卷二百三十六至卷二百四十

咸豐十年閏三月庚戌至五月辛丑

卷二百四十一至卷二百四十五

咸豐十年五月壬寅至六月辛卯

卷二百四十六至卷二百五十

咸豐十年七月癸巳至八月己丑

卷二百五十一至卷二百五十五

咸豐十年九月壬辰至十一月壬寅

卷二百五十六至卷二百六十

咸豐十年十一月癸卯至十一年二月丙戌

卷二百六十一至卷二百六十五

咸豐十一年三月甲午至五月辛丑

卷二百六十六至卷二百七十

咸豐十一年五月甲辰至七月甲寅

卷二百七十一至卷二百七十五

咸豐十一年七月乙卯至九月乙卯

卷二百七十六至卷二百八十

咸豐十一年十月丙辰至十二月壬戌

卷二百八十一至卷二百八十五

咸豐十一年十二月癸亥至同治元年正月

丁亥

卷二百八十六至卷二百九十

同治元年正月戊子至正月庚戌

卷二百九十一至卷二百九十五

同治元年二月甲寅至三月戊子

卷二百九十六至卷三百

同治元年三月庚寅至四月丙寅

卷三百一至卷三百五

同治元年四月戊辰至五月壬辰

卷三百六至卷三百十

同治元年五月乙未至六月甲子

卷三百十一至卷三百十五

同治元年六月乙丑至七月戊申

卷三百十六至卷三百二十

同治元年七月己酉至閏八月丁酉

卷三百二十一至卷三百二十五

同治元年閏八月戊戌至十月庚寅

卷三百二十六至卷三百三十

同治元年十月辛卯至十二月戊戌

卷三百三十一至卷三百三十五

同治元年十二月庚子至二年二月庚子

卷三百三十六至卷三百四十

同治二年二月癸卯至四月乙酉

卷三百四十一至卷三百四十五

同治二年四月壬辰至五月乙丑

卷三百四十六至卷三百五十

同治二年五月己巳至八月甲申

卷三百五十一至卷三百五十五

同治二年八月丙戌至十月癸巳

卷三百五十六至卷三百六十

同治二年十月甲午至十二月癸未

卷三百六十一至卷三百六十五

同治二年十二月甲申至三年三月壬寅

卷三百六十六至卷三百七十

同治三年三月癸卯至四月丁丑

卷三百七十一至卷三百七十五

同治三年四月己卯至五月乙巳

卷三百七十六至卷三百八十

同治三年五月丁未至六月己卯

卷三百八十一至卷三百八十五

同治三年六月壬午至七月壬子

卷三百八十六至卷三百九十

同治三年七月癸丑至八月乙未

卷三百九十一至卷三百九十五

同治三年九月己亥至十月丁亥

卷三百九十六至卷四百

同治三年十月戊子至十二月甲午

卷四百一至卷四百五

同治四年正月壬寅至四月甲午

卷四百六至卷四百十

同治四年五月乙未至九月丁丑

卷四百十一至卷四百十四

同治四年九月己卯至五年二月甲辰

卷四百十五至卷四百二十

附設立長江水師章程

恭

進剿平粵匪方略表

內廷行走宗人府左宗正正白旗滿洲都統總理 行營大臣管理 內

繕書房事務閱兵大臣管理右翼近支第三族宗室族長總理各國事務

衙門大臣和碩恭親王 臣 奕訢等誠歡誠忭稽首頓首

上言欽惟我

皇上虹璧當陽

龍圖啟運靈臺測景值

漢日之再中柳谷占星識

堯天之無外

兩宮垂訓

孝治洽而鈎鈐明六幕同文

威稜張而玉衡正以

聖繼

聖秉大武於三會

鞠人謀人揚

天聲於七德

商威有截軫馳桂海之文

姬籛無疆策探岱宗之字

善繼

觀成之志有此

武功實惟

懿德之光受茲

介福觀瑤光七宿爲河海清宴之休徵考

金版六韜見

旋轉乾坤之經緯

國家宗基磐固疆索丕安

六七作配

上帝之郊禋三萬里八司空之版籍慶霄輝宙瑞露膏
年閒有扞網之愚不煩折箠而定蝟蟻翔泳涵
亭育之慈象寄譯鞅化陸梁之氣屬以神州康阜潛
伏蘖芽邊吏恬嬉偶寬銜轡乃有粵匪洪秀泉
者天資凶譎左道佞張恃嶺嶠之阻深謂潢池
之可試焚香絳帕入祆社而稱靈義米朱符託
神叢而號衆乘火旱木饑之厄五龍講經聚跳

刀走戟之徒斗米作賊裾緣采綫始過市而無
譏囊探赤丸遂犯門而罔忌紅巾六等白梃千
羣自知僂民甘效奴賊獠咋人而漸大螳拒轍
而能驕智高有邕廣自王之心王則造彌勒持
世之語妖星害氣宵暉藤峽之山虺毒豺牙晝
飲桂林之水牙璋初發鐵額方張蟲沙之廟化
已多蟲蝨之撲搔難盡四面招討圍鎮無功諸

道行營扼巢不效奔兕開樊於百粵駭鱗觸網
於三湘盧循下桑落之洲楊太奪洞庭之口雖
嬰城搏戰不少九攻九拒之方而散地投戈難
用四正四奇之陣名城大郡唳鶴驚風長江洪
湖飛鯨跋浪梁山橫鑱難爲扼截之謀采石量
繩坐失喉衿之險穿刀容足衝朱雀之大航鳴
鼓吹脣躍青絲之白馬奪艨艟而載火伏騰艤

以藏兵盜鍾山龍虎之都爲朱圉鯁餘之穴蝟
繁鋒厲傳烽達於淮壩兔狡窟多蘊毒延乎江
表方且扇其蠅醜綴我魏軍吳淠旣困於攻梁
晏鰲復創於襲晉眩迷歸路鋌走郊畿橫行者
宋江三十六人城守者河北二十四郡狼星睽

睨敢向

威弧鼇足撼搖自投

天網

文宗顯皇帝拯萬方之厄申

九伐之經歐刀行失律之誅

齋斧選折衝之將懿親藩衛河閒孝恭之賢異姓名王

沙陀赤心之勇廉頗李牧出自禁中閔天泰顛

拔於材武得狄青於西班牙而任以專闡收徐勣

於歸義而用作干城虞允文起自書生岳家軍

出於義勇

知之而善任

用之而不疑乃

幹璇機

闡金筴以爲欲傾孽窟先據上游欲折兇鋒先清三輔
河魁應將井鉞森芒太乙陳軍雷碾鬱怒羊頭
鶴膝尙方蘭筓之兵朔籛燕弧六郡良家之子

鼓洪爐而爍毳，射濛汜以澆螿。桐鼓殷天，鑿旗捲霧。老羆當道，先扼勝於天津。狂象走林，遂合圍於連鎮。赤龍吐電，挾礮石以飛鳴。鐵騎凌霜，踏河冰而平渡。中黃士勁，箬矢三鎌。太白旗高，衝鞠百丈。長纓繫賊，吉林詐馬之健兒。飛火注輪，蒙古打生之蕃部。布周陔而剗地，暈月成規。拔渠答而踰濠，陣雲如墨。剖巢入穴，極貳負以

歸朝飲刃伏椹血溫禹而釁社高唐州一鼓而
下梟鳴牙中馮官屯三版難支鼃沈竈底臨戎
鼓蓋人識高敖曹之容破陣筋饒軍奏蘭陵王
之曲投弓窮羿果知射日之難被髮狂夫始悔
渡河之誤然而北風雖勁南紀未康方棄螯之
將窮適前禽之不戒相州師潰蜀郡彭亡致財
賦之大藩成荆榛之戰地

神謀早定

天策無遺用陶侃鎮武昌之西門使諸葛督長沙之軍
賦長沙完而糧通甬道武昌奠而水建高瓴築
塙守濡須之城輕兵塞淮泗之口衣冠抗慨范
蠡立君子之營編舸巍峨揚僕創樓船之號楚
歌四面八千子弟之軍湘水九迴十萬水犀之
弩三呼蒼兕黑稍公陷陣如飛十丈青龍黃頭

郎習流而舞先清岳鄂則夏口燒船繼掃蕪黃
則九江歸漢揚旂於皖公山下而殺師之角先
摧刷馬於彭郎湖中而擧鞬之臂已斷蔽江流
柿頓成破竹之形曳地明光已有撥鱉之勢當
是時

文宗顯皇帝方以十科選士五聽求言

周宣側身

漢文拊髀

神經金匱授自九天

澄鑒銀華燭乎萬里

發蹤導窾晨披白阜之圖

晁食求衣夜聽赤囊之報

輟裘放賜千營銜挾纊之溫

畫箸伐謀諸將決埋根之計

爲民請命之語惻愴於

丹綸脅從罔治之條諄詳於

申命七旬弗格知頑惡之將殲百六已過卜貞元之必

復覘燕巢於齊幕待麋

母野之弓聞鶴語於

堯年遽鑄

荆湖之鼎

應門顧命不忘未濟之艱難

畢郢升祠卽兆

大勳之底定

皇上上元膺運

下武作求當

秉璋奉瑁之辰有合璧聯珠之慶稟承

聖善奉若

詒謀凡

問

安視膳之年皆

訪道陳謨之日山川聚米

挈地絡於目中撻伐裒荆

運乾符於掌上

首清朝列

爰整戎機

知李靖有武略而兼文謀

命曹彬以大將而爲使相趙陽闔馬皆

先帝簡拔之遺彭濮微瀘極公侯腹心之選時則石達

開就俘於蜀徼而蚤驅之形孤陳玉城授首於

壽陽而契渝之齒拔南恢甌越洗兵胥母之潮

東取蘇松奪戟神亭之壘皆所以翦朝吳之翼

集賢堂
一
搯僑如之喉斷脅攻心扼吭拊背城開鐵甕重
收北府勁兵關叩秣陵增築藥園舊壘常山列
陣率然無自救之方坳水尺波鼉鼉失跳梁之
勢九洑州斷其饒道乳哺立枯雨花臺瞰其城
闔走飛俱絕窮山晚酒徒聞呼癸之聲衲服拳
旗已播伏辰之讖崇墉將圯不因壘而乞降齊
燼難收尙背城而借戰負嵎逞鬪奪刃乘危掃

其遊魂攻我夾寨下潦上霧鼓無死聲升精判
冰士有朝氣十盪十決五兵五當颺枝墜而技
窮鳶縋沈而書絕於是將騎將步爲鶴爲鵝埽
外援而足盡虻僵塞走路而河枯魚泣地中鼓
角道古攻其東南樓上梯衝亞夫備其西北餘
鯨失水遁甲開山劉窟頭將掘地之兵甘興霸
作升城之督指招搖之星怒雲旛飛揚候箕壁

之風高火輜具舉星丸撒火地軸都搖素練騰
風天梯直上雷公擊鼓應龍之翼齊張庭氏彎
弓妖鳥之巢立覆防風已戮辨巨骨於專車侯
景未寒藏漆頭於武庫滅塵鏟迹盪穢湔腥舉
旛炳乎騶牙積甲高於熊耳洛陽父老重見漢
官威儀常侍橐鞬來迎大將旗鼓思明旣殪朝
義知窮懸瓠旣夷洞曲自潰洪芒玕孽童旣殄

遠行袁尙之顛李秀城副賊成禽生對樓蘭之
簿西江餘氣嶺外殘魂或逋誅於黔蜀之交或
遺種於雍秦之境靡不枯摧朽落冰泮燼灰高
張露布之長縑競唱勤歸之雅樂

甘泉飛報聞吉語於五日之中

明堂大開舞文干於兩階之上鐘鳴

長樂喜動

慈顏

弓掛橋陵慶邀

靈貺昔蓄今穫成

文王丕旨之功後舞前歌誦

太姒徽音之化惟

天惟

祖燔柴鏤璧之上儀視公視侯喬嶽翁河之茂典

珠邱昭告三矢前驅

璇極光輝壹戎大定瓚圭密卣

釐召虎而剖符條勒變旂

寵尸臣而銘鼎綜稽功簿皆容資轉三階永

詔勳常不僅侯封萬戶拔都標號如銀槍效節之榮

鷓尾影冠逾金璫附蟬之貴帷中闕外

露湛雲需尺功寸長

天施海潤蓋帷紆

惠醑勤事之蓋臣粟帛流

恩慰國殤之猛士

授羽林孤兒之職俾紹家聲

廣博士弟子之負用旌敵愾農租

蠲銓商算

裁緡猶復

慎埴思艱

涉淵知懼

智周善後不忘懲愆之詩

本務勸農特可墾屯之奏遣遊勇而脫巾不課散鄉
團而賣劍無虞火猛水寬

舉循吏以安清剟吳輕楚剟

設水師以控長江

簫勺羣頑

盧牟六寓鏞銷燧灌劍脫戈包在昔殷伐鬼方僅威
夷落周平淮浦未滅徐戎唐中葉不能清河朔
戎馬之塵宋盛時不能取夏州彈丸之地然猶
揆張鴻號鋪侈駿聲以準

清時洵躋前古茲者肇修軍志臚紀

宸謨揆諸經文則雅頌以告成功之義稽諸史例則

通鑑紀事本末之編溯

稠牙徵發之初底

偃伯武成之日蓋俶擾者十有六省披猖者十有五
年其黠鷲則甚於赤眉青犢之徒其孳萌則駭
於方臘曹成之衆跨州連郡儼羽翼之將成襟
江帶湖幾牢膠而不拔鷗鳴狸嘯已徧蹶通報
德之維蟻國猴冠敢竊宇宙柱天之號此蓋仰

賴

天戈仗順

廟算籌全張網羅賢不限以循資之格鑿門遣將不
撓以中制之權不臨陣易將而奪符不恡賞惜
官而剋印南人使船北人使馬不違地以遷良
衢地則合圍地則謀不隨方而浪戰盜兵軫
念不舉獻俘受馘之儀倒戟歸

仁不用伍畀曹誅之法軍書駱驛而春千秋簫不廢
修文度支浩穰而丁算口錢不聞加賦

前光垂憲

繼序紹

聞用能

蒼緯孚精

珠鈴制勝下湔慘蹟上答

光靈

文母冠十亂之勳

湯孫建四方之極

鈞臺誓衆瞻

禹迹之重光

鄗邑升壇告

炎符之上瑞北征六月南征采芑

煥景命以

重熙內治天保外治采薇播休聲爲

大愷臣等依

光丹地載筆蘭臺實均慶於普天敢竭誠於測海繫

年繫月知

整軍經武之有方

丕顯

不承著

保大定功之有本守難於創繹魏徵敷對之言安不

忘危鑒宣聖繫辭之訓訂長編四百廿卷

寶笈常輝祝

鴻祚億萬斯年金甌永鞏東南尉而西北候定

皇輿一統之經

天地闢而

日月光上

帝世六符之頌 臣等無任瞻

天仰

聖踴躍歡忭之至謹拜

表恭

進以

聞

欽定勦平粵匪方略卷首

天章

文宗顯皇帝聖製文

省咎報

天恩諭

朕以薄德敬承

考命撫育萬方兢兢業業已三年矣深慚治理乖方愆

欽定四庫全書
欽定四庫全書
尤叢集溯自道光三十年秋逆醜跳梁徵調頻仍迄
無成效將士疲於甲冑黔黎苦於差徭自粵而楚自
楚而江妖氛狂悖可謂極矣君人者代

天司牧斯民當今之時司牧者何事而吾民塗炭未復
予一人辜

恩咎重夫復何辭因思空言無補時值多艱朕惟有虔

額

昊天速消民劫期與軍營諸將士共奮安民之志羣興
鼓舞之懷掃蕩此賊以蘇民因此朕之初志報

天恩卽符

考願也憶自庚戌冬至親承

大祀已經九次每逢詣壇齋宿無不思逆賊未平倍覺
愧悚茲於本月初七日又值

雩祭前期因誌吾之過以自警焉宣布中外咸使聞知

特諭

書事示廷臣

予蒙

天恩承

考命臨御天下六年於茲四海無一日安靜萬姓罹兵
燹之災返躬自問

天恩未報

祖考之恩未報若稍自暇逸是誠何心哉予不敢亦不
忍也每逢親詣郊壇無不心增愧慙今年新正幸園
敬循成憲次日卽恭值

皇考忌辰地猶斯地

言猶在耳興念及此真堪一痛哭也昕夕常思何以使
兵戢民安仰答

天

祖之恩惟有永勵斯志倍加敬勤不願徒託空言務期躬行實踐爾諸臣或曾膺

顧命或簡在賢良既爲國之大臣當思共濟時艱即使天下旣安更防恬嬉之漸書曰慎終如始我君臣其共勉之

聖製詩

辛亥春帖子詞 以下辛亥

邊徼願銷兵綏安惠庶氓春祺應普罔默祝

昊恩宏

齋居卽事恭依

皇考詩韻

盼捷南望憂思深威宣指日熄羣陰狼貪犬獠真堪
恨猶幸鄰疆尙未侵

詣齋宮作

致齋默禱

上天仁渥澤連朝佑下民
細雨霏微霑輦道濃雲灑
霽覆城陰西疇敢曰兆豐歲
南旅速望埽劫塵

穹宇先期欽九拜省躬敬止重

郊禋

盼信二首 七月晦日

狼奔豕突萬山中負險紫荆
山名必自窮峽
峽名豬仔界雙

峯抗難破兵分五路銳齊攻壯哉烏烏蘭向向榮謀兼

勇嘉爾賽賽尙鄒鄒鳴才濟忠權有攸歸師可克威

揚邊徼重元戎

罹劫吾民堪浩歎冥頑梗化罪難寬因除巨憝武非
贖迴思庸臣心可寒默顙

蒼天事機順速望黔庶室家完未能繼

志空揮淚七字增慚敢慰安粵西自逆匪竄擾以來前撫臣鄭祖琛始失之庸懦

無能因循畏葸繼之以李星沅推諉粉飾以致蟻屯
蠹聚日漸蔓延爰特簡賽尙阿馳往督勦卽能將山
川險隘賊勢負嵎實在情形縷陳明晰七月二十五
日據奏烏蘭泰攻擊新墟向榮等分路進勦大獲勝
仗又繪具紫荆山圖並各屬勦賊稟報緣由此股賊
匪自中坪新寨回竄紫荆山內花雷等處前以新墟
爲門戶後以豬仔峽爲門戶烏蘭泰謀定後戰號令
嚴明向榮一路應期攻勦連破五寨直抵豬仔峽賽
尙阿調度有方事權歸一所望卽日攻破豬仔峽並
新墟捷報現在民知愛兵兵知衛將撫臣鄒鳴鶴辦
理團練事宜尤能使守望相助衆志成城壁壘一新
士卒鳧藻揜渠埽穴聚而殲旃逃聽好音彌殷焦盼

社稷壇禮成敬述恭依

皇考乙酉詩韻

右壇虔報謝九拜荷

恩洪稔歲襄

坤德銷兵普厚功靖安人永慶綏屢

眷維隆責實應知愧未能咸告豐

季秋朔日

今歲寒飈爲秋閏菊晨欣值啟霜晨盼捷那忘師旅

苦輪忠蹇蹇憶王臣

九日登延春閣述懷兼示諸弟

去歲圓明今紫禁兩逢重九暗增悲况當獨坐揆筭

候恍憶連鑣試馬時

每歲秋苑西試馬親承
笑撫今憶昔昆弟同深追慕
色

雲嶺西瞻霜露換瘴鄉南睽羽書馳豈能無意酬佳
節惟看菊芳砌畔滋

詣齋宮作

盼捷南荒未輯戎下民昏墊又豐工今年二麥幸豐
稔戒滿思愆惕藐躬

壬子春帖子詞 以下壬子

東郊和藹啟青陽歲稔河平民更康盼捷彌殷敕宵

旰恰逢喜氣在南方
明歲元旦喜神正南方

詣齋宮作

小醜跳梁已兩歲未能繼

集之真國大明名官
志愧無違心殷盼捷希

昭鑒益慎體乾宵旰憂

祈穀禮成有述

峇堯

寶殿陟三登捧璧夔夔若弗勝早靖兵戎希

厚貺時調暘雨驗休徵韶咸節中羽干舞燔燎明通翬

翠燈欲退屏營增敬畏初心惟益勵兢兢

齋居述志

雖獲時霖二寸餘關心稼穡倍憂予豐工難復賊難
滅繼

志安民願未舒

感述

匆匆廿七月含淚又西行馭世慚無術南荒賊未平
欲詢萬民苦敢懈一心誠受

命恩難述恫瘝繫我情

郊行述悶

啟蹕霜辰

是日霜降

路指東

山陵初謁典攸崇時殷民瘼詢疆吏仰企

祖功惕寸衷遲漕推原咎在朕成災豈忍責羣工楚南
赤子有何罪除逆安良叩

上穹

初冬至倚虹堂作

拂暑石衢由還宮祀事修戢戎赦民劫先稟一誠求

齋居述志

雪瑞連番荷

昊慈嚴恭三日致齋期籌農盡職庶無忝繼

志承先勉有爲警寐投籤追景行下帷得句惕深思

天心厭亂銷民劫楚省佳音莫再遲

詣齋宮作

杼敬先期禮率躬鯨音動處揚淵冲事

乾父必信之篤惟願荆南早戢戎

春帖子

玉律青陽展軍興二載過春祺布寰宇渴望殄么麼
東郊喜氣敷和德西苑嘉賓侑綺筵南服未能同此
樂北辰環拱懍乘乾

癸丑元旦試筆成什 以下癸丑

開筆迎韶率言吉元正例有冠吟篇三冬雪潤豐堪
卜大地陽回捷速傳

昊貺

祖恩心對越金甌玉燭祚縣延途長益勵思兢惕鞏固
丕基勉紹

先

詣齋宮作

感幸新正渥澤敷
二日得雪安民除暴乏良圖
南河佳信

軍營捷屈指郵傳刻莫逾

羣邪正熾劫深重
又屆祈年倍敬寅
雖彼喪心甘作孽
胥予撫育負

天慈

先農壇禮成述志恭依

皇祖丙辰詩韻

躬耕

家法民天重初莅

青壇祀典崇九拜致誠希

鑒佑四推盡禮冀綏豐優霑應候符農望承

貺加修惕我衷懷保心殷消劫運勵精慎始必期終

詣齋宮作

春澤幸霑邪未靖
旰宵做惕撫瘡痍
盡微忱庶邀

天貺殄醜安民莫再遲

兵疲賊縱已三年
德薄深慚負

上天三捷雖聞敢言慰
師和勦戮皖江連

詣壇齋宿愧尤增

考願難符懼弗勝
宥密思愆加慎勉

併恩普錫萬方承

閱報忽傳破賊營感深隕涕愧交縈大軍或可獲全

捷尙未聞克
復揚州默禱

皇穹惠下氓

自警一首恭依

皇曾祖宴坐齋中偶爾成詠詩韻
七月二十一日

兢業承

基始二旬治平務本必修身因循力挽開誠切邪逆難

消望捷頻迴憶前非期寡過欲圖集事在多人寸心
敬肆時毋忽猶恐祈

天念未真

中秋夜延春閣望月述懷

一半清秋色銀蟾分外明深宮切民瘼遠帳動鄉情
萬井心期定三城賊未平晉疆邪又蔓泣額

吳恩宏

自述一首恭依

皇祖詩韻 八月十六日

德薄垂裳愧邪源何日清三年勞衆力五省聚雄兵
籌筆那知瘁敕幾敢不誠羣期除畛域定可埽欃槍
敬頌

天恩重深辜

考願宏誰無肯堂志隕涕意難平

癸丑嘉平月朔開筆書福卽事述懷兼示軍機大
臣恭親王等

又臨開筆月嘉平小醜稽誅未廓清章奏雖繁鮮濟
實將心難合枉多兵祇慚感奮激無術惟願

仁恩冀有成夙夜所籌樞務重助勤有賴是諸卿

喜雪用蘇軾題北臺壁韻 十二月十四日

傍晚飄蕭瓊葉纖

昊恩感格慄

精嚴定知宿潤滋原隰已報餘氛匱米鹽

是日勝保報到賊匪窮蹙

情形列戍披堅寒毳帳下簾忍凍念茅檐消兵豫救應

加奮勝保奏連日勦辦靜海獨流逆匪情形諭令今歲總期勦滅淨盡勝保屢次督兵擊賊奮勇必

能副朕委任之專仰冀昊蒼垂馬上飛綿點帽

尖

甲寅元旦養心殿明窗開筆因成八韻以下甲寅

集賢堂
例事明窗每歲朝無多欣慰惕乾饒時敷膏澤周羣
姓日益都俞望庶僚霖霖鱗原知透潤玲瓏鴛瓦未
全消宜人宜麥歡閭里惟敬惟勤敕旰宵三白占豐
符臘底五城定亂及春詔將心和合兵心奮民氣安
恬沴氣凋已兆有年田積雪聊酬佳節壁題椒圖懸
瑞應看絲絡福逮曾元仰

聖堯

緙絲三星圖
皇會祖製贊併宋人
三星圖亦曾集經書成句
題贊

甲寅春帖子

從來七日慶宜人
雲色相將送早春
佇見紅旗三捷
喜冀安黔庶一心真

爲民祈歲值前齋

大祀必躬益惕哉
染翰豈因資賞玩
渴望喜報共春來
詣齋宮作

大祀必誠承

父訓禮隆祈歲額

天恩惟期布澤消民劫兢業思艱治道敦

肅駕法宮閱軍報獨流鎮攻克戮盈千猶虞奔竄滋
他患感懷交縈豈慰焉

祈穀壇禮成有述

曰且曰明欽

帝載上辛

大祀啟初詔終慚分獻非躬獻且喜花飄是雪飄千畝
雲屯預浹洽三成燈朗陟岵堯尤祈兵靖消民劫盼
捷憂思旰復宵

詣齋宮卽事成什

春膏未符望自省咎維多敬籲時敷澤尤期早戢戈
勤修政治順感召地天和

穹宇先期叩優霑候不訛

祈穀禮成敬述

上辛初祭致恭寅捧璧升香率盛儀五省速戡師旅
順萬方更祝雨暘時春耕秋穫期無忒夕惕朝乾勉
有爲敬誌七言達忱悃

天恩

祖佑一心知

皇考聖製壬辰季夏行

大雩禮詩有焦枯一洗處皆同之句今歲雨澤愆期幸

蒙

昊貺大霈時霖寅感之餘彌增懷惕因衍

聖製詩得絕句誌喜 以下乙卯

印繳乾清纔告功焦枯一洗處皆同從知

降鑿消邪逆敢弗加修答

貺鴻

有憶和杜甫韻

水深魚自躍林靜鳥呼羣引興湖山景繫心江楚軍
飛章來遠驛極目豁秋雲卻憶書齋樂開編晤舊文
曉行馬上得句

靄靄淡煙橫石衢若砥平吉金宜磬控宿麥喜滋萌
雲裏嚴城峙林端曉旭明那忘師旅苦憂思達軍營
示志

代天司牧者惟願寰區安一夫弗獲所飢溺切恫瘝
矧茲兵未戢竭力旋乾坤籌戎罔敢怠立志拯民艱
昕夕時渴望渴望在得人方伯與卿尹布政同憂患
黽勉尙虞愒優游誠厚顏不惑腳跟行毋忘訓誨誨
還宮卽事截句

帝城景物實繁華胞與爲懷本一家更額

上蒼赦民罪速戡軍務捷聞遐

放舟

蒼蒼暮色四圍天
福海揚舲興渺然
序屆小春欣布
暖波澄新霽
靜含煙幾曾清暇
一心豫卻憶哀鴻中
澤憐稍喜廬城聞
克復楚江更盼捷音連

南郊禮成敬述

履長欽報本

郊祀懍躬承律協
黃鐘籥燔明翡翠
燈除邪馳露布沐

澤望雲凝捧壁誠先達還洎愧未能

除夕

昨日春方至今朝歲又除垂裳勤政治敏學驗居諸
縱使陳芳宴依然盼捷書聲聲喧竹爆豐歲叶維魚

丙辰元旦開筆成什 以下丙辰

咸豐六載春王月運幹虞廷

授

受年

祖

考仁恩昭鑒佑孫臣兢業懍仔肩萬方多稼倉箱足三
捷飛章江楚連元旦明窗循例事更逢時玉潤原田
祈穀禮成敬述

齋不隔年承

聖訓次辛

郊祭一衷誠雨暘敬顙符時若稼穡虔希普順成顧我

何修能沐

眷今歲孟春上旬屢降瑞雪實爲罕逢念茲罹劫願銷兵

上天

祖

考欽臨鑒福錫無疆惠庶氓

藕香榭放舟至鑑遠堂作

集賢園大略卷三
三十一
蘭橈緩放暮春天浩浩波光斷復連靜室樓陰雲外
矗玉峯塔影鏡中懸時臨晉禊愜幽賞柳似唐隄宵
曉煙御世鴻猷殷鑒遠籌戎莫釋百憂煎

靜明園卽景

山館暫停驂虛明足靜耽幾村煙樹羃萬象水天涵
上界眞標勝靈源待布甘林泉豈幽契籌旅憶江南

延春閣對雨

三月五日

微雨不成寸霑濡亦足欣無聲如膏潤應候散絲紛
望歲心仍切籌戎憂正殷

是日接閱文煜等奏報瓜州逆匪竄出兵多潰散憤

深懣實

青壇將肅事沐澤利耕耘

福海泛舟

熙春上苑實佳哉鼓棹尋詩數往回似鏡中行金浪

疊如天上坐翠屏開

如坐天上御舟名也

書催廣艇騰驍將

現由

廣東省雇募紅單
船赴江南助勦
思濟巨川用巨材水態雲容呈畫
本斜陽東望是瑤臺

孟夏八日

常雩禮成敬述

愆陽彌月滋臣咎龍見而

雩懼弗勝希膏麥苗免饑饉惟

天

祖

考式臨憑

鴻恩幼子千春慶

默佑深衷一敬承
直省干戈何日靖
虔祈洗甲喜音徵

雨霽

芳林雨足透朝曦
林滿山前浪滿池
浪影似金兼似鏡
林容如幄復如帷
堪欣肅乂蒙庥永
恰對華滋得

集賢堂詩卷首
三
句宜戎馬倥傯溼地清遊尙憶羽書馳

上下天光對雨

平湖鷺望夏如秋
竟日滂沱灑未休
煙色四圍迷遠岸
泉聲萬斛瀉高樓
雲飛南浦情無極
簾捲西山句好酬
千里陰晴雖有異
久征將士使予愁

七夕立秋

夏潦微妨稼與禾
疆臣屢報變遷河
兵行勇練胥民

力每憶罹災愧更多

仲春福海晚坐 以下丁巳

柳眼桃顚候不遙御園風景近花朝夕嵐層疊排青
嶂春水蒼茫展碧綃有會鳶魚皆蕩蕩無勞柑酒慰
寥寥蠟窓坐對新蟾皎塵念維揚廿四橋

德興阿軍
營駐揚州

齋宮卽事 丁巳立夏日

邪氛尙熾皖江連迴憶軍興越七年潤麥銷兵占叶

吉惟祈

吳眷速殲旃

欽定勦平粵匪方略卷一 庚戌年

道光三十年五月十九日 戊庚

上命軍機大臣傳諭鄭祖琛曰近聞廣西自去年賊首
張家詳滋事官兵不能捕獲強爲招安餘黨四散勾
結慶遠則張家幅鍾亞春柳州則陳東懇陳亞潰陳
亞分陳山豬羊武宣則梁亞九劉官生象州則區振
組潯州則謝江殿平樂則紫金山一夥皆分股肆擾

而陳亞潰一股爲尤甚似此盜風日熾該省緝捕懈弛已可概見提督駐紮柳州卽爲賊蹤出沒之區何以任其往來不加懲創難保無欺罔畏縮情事著該撫實力查拏盡法懲辦並將廢弛捕務各員先行叅劾責成文武員弁痛改錮習上緊會緝毋任一名漏

網

六月三十日

庚寅

兩廣總督徐廣縉廣東巡撫葉

名琛奏言查教匪會匪他省情形臣等未知其
詳而廣東廣西則數年以來悉心採訪尙能知
其情僞該匪祖孫習傳師徒授受雖遇案懲辦
而由來旣久根蒂過深梗頑不化竟若性成惟
莠民妄言禍福煽惑鄉里成羣結黨玩法營私
誠爲罪不容誅至良懦之民無能畏事或薄田
自種或微資營生旣慮其尋釁滋擾復恐其犯

案仇攀名爲入會實以免禍若持之過急眞匪
壽張爲幻多術藏身而良懦者蠢然無知每易
弋獲不但激而生變且恐多所株連是查辦之
時旣未便輕率而推原其始似應有區分也臣
等旣確有見聞不敢稍涉欺飾奏入報

聞

七月十五日巳乙
湖南巡撫駱秉章奏言廣東英

德縣匪徒李泳酬卽元寶亮於五月初二日至
浚洸地方拒斃守備葉恩詔因被官兵截捕竄
往廣西懷集冷坑地方占踞有欲取路連山連
州劫掠並至湖南滋擾等情又探得該匪等於
六月初三日前至廣西鵝公嶺搶劫現又折回
桂嶺墟一帶並據嶺東營探報該匪等知楚省
備禦謹嚴已由鵝公嶺竄回里松墟市臣查湖

南永州郴州桂陽等府州所屬各州縣多與廣
東廣西連界其間類皆深山密箐防範匪易該
匪現踞之里松墟市地方離湖南江華縣濠界
卡所止五十餘里堵截尤關喫緊該匪等又有
來至湖南滋擾之語一經粵省官兵兜捕難保
不竄入楚境臣已飛咨署永州鎮臣谷韞璨並
飭衡永郴桂道張其仁會督印委文武各員帶

同兵勇駐於濠界卡所此外界連廣東廣西各
要隘一律嚴密堵禦並飭各屬士民舉行團練
併力協防遇有賊匪竄至立即焚拏臣仍當留
心查察如須添兵堵捕再行酌覈辦理奏入

上命軍機大臣傳諭駱秉章曰廣東英德一帶賊匪聚
集多人戕官滋擾並有欲往湖南之語湖南之永州
郴州桂陽等府州所屬多與廣東廣西連界該匪等

一經粵省官兵兜捕勢必竄入楚境况該匪踞住之里松墟市距江華縣濠界卡所僅止五十餘里堵截尤關喫緊該撫務卽督飭鎮道管帶兵勇於毗連各要隘處所嚴密堵禦並飭各屬士民互相保衛遇有賊匪竄入立卽兜拏解究總期官民聯絡防守森嚴庶匪徒無隙可乘楚省甫當勦捕之餘地方已不堪擾累萬難任其再肆蹂躪該撫宜如何盡心籌防以

副委任耶

八月初三日
壬戌廣西巡撫鄭祖琛奏言
臣前經

奏請

陛見欽奉

諭旨著俟軍務告蒞再行奏請現在楚粵軍務業已告蒞惟粵西地方此時緝捕一切正當緊要且藩司張雲藻業已進京臣未敢拘泥遽請北上合

無仰懇

聖恩俯准臣俟張雲藻回任後趨叩

闕廷躬聆

訓誨以遂瞻戀之私奏入

上諭內閣曰廣西緝捕正當緊要鄭祖琛著俟藩司張

雲藻回任後察看地方情形再行奏請陞見

初六日

丑乙

上命軍機大臣傳諭鄭祖琛曰近聞廣西流賊滋擾知縣受偏身死平樂協副將伊靈阿富賀營都司李慶什千總劉大剛勞玉榮聞風逃竄並閉城不出等情著鄭祖琛督飭該管地方文武各員迅卽分投勦捕悉數殲擒毋任一名漏網並嚴查知縣鶴年因何自盡伊靈阿李慶什等畏葸縱賊各情據實具奏

初八日
丁卯廣西巡撫鄭祖琛廣西提督閔正鳳

奏言象州賊匪於七月十九日竄入平樂府屬之修仁縣境因城角缺口擁入城內拒傷委員兵壯人等又竄至荔浦地方勢甚猖獗該二縣四通八達且距省城僅止二百餘里若裹脅日衆必致滋蔓難圖臣現派兵前往剿捕惟該處路徑紛歧水陸隘口均須防守本省兵力較單不敷分布必須鄰省撥兵助剿方能合力進攻

應請

飭下督臣徐廣縉酌調廣東標兵一二千名迅速帶赴
廣西會合夾擊以期早殄逆氛奏入

上命軍機大臣傳諭鄭祖琛聞正鳳曰廣西盜匪充斥
節經降旨責成該撫會同該提督督飭所屬文武合
力兜擒毋任此孳彼竄茲據鄭祖琛等奏稱盜匪由
象州竄入修仁縣城拒傷委員兵壯人等又竄至荔

浦地方該二縣距省僅止二百餘里亟應防其分投
竄擾該撫迅卽催提各路官兵親自帶往會同閔正
鳳督飭文武員弁分路兜剿毋令偏近省城絕其逃
竄後路一面解散脅從曉諭安撫免致愈裏愈衆滋
蔓難圖

上又命軍機大臣傳諭徐廣縉曰盜匪擁入修仁縣城
並竄至荔浦距桂林省垣甚近深恐裏脅愈多稍事

遷延卽難撲滅且各州郡匪徒竊發到處須防勾結
其界連廣東各地方尤恐蔓延亟應及早兜擒免致
勞師糜餉該督前經奉

旨校閱營伍應卽前赴廣西著於接奉此旨後迅赴廣
西會同鄭祖琛閱正鳳督飭文武員弁不分畛域合
力勦辦並先酌調廣東各標官兵一二千名派員管
帶分起兼程前往會勦應用軍需該督卽行籌畫撥

解

上又命軍機大臣傳諭徐澤醇曰前任雲南提督張必祿由京回籍現在行抵何處著徐澤醇迅卽查明傳旨飭令該提督馳驛前往廣西會同徐廣縉鄭祖琛等勦辦盜匪毋得稍有遲誤

十一日庚午鄭祖琛閱正鳳奏言臣等連日接據

探報賊匪由修仁竄至荔浦數日之內連陷兩

城肆行滋擾該處與陽朔交界距省城甚近路
徑紛歧亟須嚴密堵禦臣鄭祖琛現已出省卽
相度地勢擇要扼紮一面勸諭紳團協力防守
一面督率兵勇實力進攻惟又接據柳州等處
稟報右江各屬盜風四起股數甚多本省兵力
本單各處紛紛告警籌防籌剿實有顧此失彼
之虞應請

旨飭下鄰近省分選派得力兵勇迅速來援勦辦方易
得手至此次賊匪竄入荔浦縣城雖據該署知
縣薩畢圖稟稱該員探聞賊匪將近卽親赴各
鄉招集團練致令賊匪倉猝入城究屬疏於防
範應請

旨將署荔浦縣知縣薩畢圖先行革職以示懲儆至該
員所稱是否屬實及修荔兩縣文武下落容臣

等查明再行辦理奏入

上命軍機大臣傳諭徐廣縉鄭祖琛閔正鳳曰賊匪於數日之內竄擾修仁荔浦兩城實堪痛恨鄭祖琛現已出省親往督勦計徐廣縉接奉前旨亦當兼程馳往著卽督率在事文武激勵將士奮力攻勦四面兜捕該處距省垣甚近萬不可再令分竄致有疏虞該匪等股數不一同時並發必有渠魁詭謀分我兵力

須先訪明盜首何人設法擒獲並廣張告諭懸賞購
緝散其黨與自可一鼓成擒該省兵力較單若待鄰
省紛紛徵調誠恐緩不濟急該督撫務卽勸導本處
紳民互相團練藉資捍禦必須剴切詳明鼓其忠義
之氣其有固守城鄉俾賊匪無從竄越或能奮勇殺
賊斬馘立功者卽著該督撫破格奏請施恩從優獎
敘庶兵民協力同心賊匪速就殲滅儻因兵少盜多

分勦不及卽著飛咨貴州酌調官兵赴粵協勦該督
撫於勦辦修仁荔浦賊匪時仍當嚴飭各路文武員
弁探明賊匪股數分投兜勦併力殲擒毋令彼此竄
突勾結致釀巨患署荔浦縣知縣薩畢圖據稱赴鄉
集團堵禦致盜匪倉猝入城著先行革職交該督等
查明是否屬實再行覈辦修仁荔浦兩縣文武下落
卽著迅速查明具奏

上又命軍機大臣傳諭徐廣縉曰近聞廣西提督閔正鳳專講應酬於紀律運籌一無所知駐紮柳州按兵不出賊匪偏近府城住及一月目無提督著徐廣縉秉公確查該提督於土匪肆擾之時如果縱賊養寇畏葸無能卽行據實嚴叅懲辦毋稍瞻徇

二十五日甲申鄭祖琛閔正鳳奏言賊匪竄擾修

仁荔浦兩城經官兵圍剿旋即退出踞守青山

復由青山竄至修仁荔浦所屬之四排地方勢
極糾紛必應四面兜剿遏其奔突之路方可聚
而殲旃鄭祖琛現駐平樂府城居中調度一面
激勵將士紳勇合力兜擒兼顧省防其上林明
江武緣等處盜匪滋擾並分派弁兵剿捕至修
仁荔浦文武各員當賊匪竄近各該縣時並未
先事豫防設法堵禦致令賊匪先後竄入城內

肆行滋擾實屬咎無可辭相應請

旨將署修仁縣知縣劉益謨典史鍾壽森荔浦縣典史
梁虹把總郭維先外委嚴正榮一併革職留於
軍營效力奏入

上命軍機大臣傳諭鄭祖琛向榮閔正鳳曰賊匪竄擾
修仁荔浦所屬之四排勢甚糾紛亟應認真兜剿該
撫現駐平樂府城計徐廣縉張必祿先後接奉諭旨

均可馳赴軍營向榮現在調補廣西提督諒亦卽日
赴任著卽會商督飭文武員弁激勵將士紳勇合力
兜擒其已經退出之兩縣地方務卽剴諭紳民妥爲
安撫互相守助俾該匪不敢復行竄入並飭各路官
兵奮力直前將青山賊巢埽穴擒渠密探股首姓名
懸賞購獲一面解散脅從使賊首尾不能相應毋致
此孽彼竄平樂近接省城尤爲緊要如果兵力不敷

調遣前飭酌調貴州官兵卽著該撫迅速飛調協防
毋誤事機其思恩太平等屬賊匪股數更多尤當及
早剿捕並著向榮將廣西各路形勢通盤籌畫與徐
廣縉鄭祖琛和衷商辦若將備中有臨事畏蒞藉詞
推諉者立卽執法從事毋稍姑容署廣西修仁縣知
縣劉益謨典史鍾壽森荔浦縣典史梁虹把總郭維
先外委嚴正榮均著革職隨營效力

上諭內閣曰向榮著調補廣西提督馳驛前往閔正鳳
著調補固原提督俟廣西勦捕事竣再赴新任湖南
提督余萬清未到任以前著裕泰派員署理

二十九日戊子都察院奏言據廣西南甯柳州潯

州梧州思恩等府舉人李宜用等遣抱告何達
以逆匪蝟起到處攻劫現在民不聊生紛紛逃
散等詞赴臣衙門具控據稱近年以來慘遭匪

毒自上年四月至本年五月匪首張家詳楊撈家等搶劫南甯府左江柳州府右江等處以及桂林府濼江一帶地方均受毒害首領數百人內有廣東湖南等賊皆用紅布包頭所豎旗幟上有替天行道等字樣各項槍礮器械馬匹俱全到處焚劫村莊搶掠財物淫汙婦女稟報各上憲不過委員一二人查看情形或發兵一二

百名探賊蹤跡以致匪勢愈張官員被戕居民
先後被劫共有數萬餘家又據慶遠府紳士莫
子升等遣抱告莫有發以逆匪肆劫連日擾亂
等詞具控據稱匪首陳亞潰暨黃四張亞珍文
亞英嚴亞汶等均各擁衆數千劫掠村墟典當
殺斃男婦人口不計其數雖經宜山縣率團生
擒匪首生員詹德剛一名現因兵少匪多屢禦

屢潰公請設法勦滅又據南甯府宣化縣生員
何可元以逆匪絕產斃命等詞具控據稱生家
於上年十一月間被匪劫擄四次燒屋斃命兵
差畏緝現在外匪勾連土匪日甚一日縣內被
劫者二百餘村被殺者二百餘命婦女被掠者
一百餘人所到之處旗號悖逆各等語臣等查
該舉人李宜用等各遣抱呈訴並生員何可元

自行呈控等情案關逆匪橫行延及七府一州
種種不法罪不容誅若不及早剷除恐脅從日
衆滋蔓難圖大爲邊省地方之害奏入

上命軍機大臣傳諭徐廣縉鄭祖琛曰本日據都察院
奏廣西舉人李宜用紳士莫子升等各遣抱告呈訴
並生員何可元自行呈控逆匪橫行各情著徐廣縉
等確切查明指名嚴拏斷不可稍有回護

九月初七日乙未徐廣縉奏言准撫臣鄭祖琛來

咨賊匪已竄至荔浦縣地方鄭祖琛已催調各路官兵親往勦辦或可剋期撲滅惟查撫臣所奏此外有另股盜匪十數起蔓延五府一州自數百至數千人不等以臣所聞恐股數尙不止此伏思匪股正多聚散無定全在該管府州縣營隨時隨地堅壁清野以絕其擄掠實力團練

以杜其勾結殊非客兵尾追三五月閒所能蕺
事且廣東現值韶州廉州兩府匪徒滋事不特
臣勢難帶兵久駐粵西卽東省弁兵各有該管
汛守亦難終年遠出合無仰懇

天恩特簡實心任事大員馳往專駐督辦以資補救現
聞匪勢甚張誠恐他股匪徒聞風東竄查廣西
梧州府與平樂府接壤商賈輻輳爲東西兩省

毗連喫緊之區 臣現在調撥兵勇擬於八月二十六日自廣東省城起程駐紮梧州以扼其東竄之路一面委員確探情形再行相機分投勦捕

徐廣縉又奏言西省盜風甚熾幾於徧地皆然該匪等每以數十人或二三百人爲一股所到之處隨時勾結土匪共行搶擄往往土匪多於

外匪數倍該管文武稟報動稱有外匪一二千
入境滋擾不思匪蹤之來去視乎堵緝之疏密
平日既不知講求捕務實力團練直至外匪入
境得賊遠颺搜捕零星土匪將就粉飾了事無
怪匪膽益張愈辦愈多臣自上年聞廣西地方
每多不靖時加查探分別飭拏屢以公牘信函
諄致撫臣鄭祖琛嚴飭各屬認真堵捕乃屢接

撫臣來咨總若虛應故事並無挽救真情卽疊
次鈔寄會銜摺稿與臣所訪情形亦多不實不
盡今則養癰之患已成噬臍之嗟何及臣忝領
連圻才難兼顧儻稍涉瞻徇欺飾則辜

恩昧良獲罪滋深奏入

上命軍機大臣傳諭徐廣縉鄭祖琛向榮張必祿曰廣
西盜匪蔓延五府一州竄擾廣東廣西兩省股數旣

多自不能以土匪外匪之衆寡強分畛域該督身任
兼圻兩省事宜責無旁貸旣據奏稱駐紮梧州著卽
在彼居中調度與鄭祖琛向榮張必祿和衷商推督
同藩司勞崇光嚴飭文武員弁激勵將士紳民合力
兜擒鄭祖琛撫粵有年未能先事豫防以致盜匪充
斥儻不力加振作復事遷延糜餉勞師咎將誰執向
榮接奉前旨定己星夜馳抵軍營閱正鳳俟向榮到

後卽著來京陛見所有各路賊匪責成該督會同該
巡撫提督等酌量兵力迅速勦捕其廣東各屬盜匪
滋事仍著徐廣縉等熟籌迅辦毋得顧此失彼修仁
荔浦各縣被擾地方加意安撫並飭地方文武各員
隨時隨地堅壁清野以絕其擄掠實力團練以杜其
勾結不得任令滋蔓

初八日

丙申

鄭祖琛閔正鳳奏言賊匪由修仁四

排竄赴塞沙鹿寨等處經官軍攻勦斬殺賊夥約有二百餘人奪獲大小礮械火藥多件該匪逃竄維容之道江運江一帶並有另股盜匪闖入遷江縣城肆行劫掠現在臣等調集兵勇分路搜捕以期速掃逆氛不敢稍涉疏懈奏入

上命軍機大臣傳諭徐廣縉鄭祖琛向榮張必祿曰廣西賊勢業已蔓延卽偶獲勝仗豈遂足以挫其逆鋒

著徐廣縉仍遵前旨調派官兵分路嚴防乘機痛剿
斷勿任其竄逸勾結尤須地方紳士商民協力同心
庶衆志成城勦辦更可得力著徐廣縉等出示剴切
曉諭激以大義並遴派賢員廣爲勸導如紳士商民
中有能自爲團練並出貲協助有裨軍需者既可自
衛身家卽宜量邀甄敘事竣著該督撫查明奏請優
加獎勵以爲好義急公者勸

上又命軍機大臣傳諭裕泰略秉章喬用遷曰現在廣西盜匪滋擾股數甚多本省兵力不敷堵剿著裕泰略秉章卽於湖南鎮筸等標營選派精兵二千名揀選得力將弁分別管帶迅速馳赴廣西聽候徐廣縉等調度並著喬用遷於貴州等營豫爲揀選精兵二千名遴派將弁管帶以備調撥

上諭內閣曰廣西匪徒滋擾現已調派各路官兵合力

勦辦所有應用軍需著駱秉章於廣東前解湖南省
銀二十萬兩內酌撥銀十萬兩迅速派員解赴廣西
並著戶部再行籌撥銀一二十萬兩卽解往以濟
要需

同日兵科給事中袁甲三奏言廣西盜賊充斥
蠡屯蟻聚已非一年該撫鄭祖琛專務彌縫查
八月初三日該撫曾奏稱軍務告竣請俟藩司

張雲藻回任後來京

陛見其去馳奏修仁荔浦等縣失守之期不過十數日
如謂十數日前毫無見聞則膜視封疆形同木
偶罪何可逭若明知藩司久病必難回任僅以
一請塞責其居心詐僞更屬不堪臣又伏讀八
月內兩次

諭旨修仁荔浦等縣文武各官暫行革職隨營效力此

係兩縣債事員弁失守城寨律有常刑不識鄭
祖琛若何陳奏曲爲開脫復請隨營效力爲後
日邀

恩地步墮軍民之志氣長寇盜之兇威貽誤兵機莫此
爲甚且廣西統轄十一府今有八府紳民李宜
用等航海叩闕匍匐

闕下則民不聊生通省之糜爛已可概見可否明

降

諭旨嚴詰鄭祖琛參賊釀亂之由與其前後奏詞欺飾
支吾之故並

飭令兩廣督臣徐廣縉嚴查死事諸人是否被戕抑係
畏難自盡其失守倖生之員弁不准隨營效力
查明應拏問者卽予拏問應正法者卽奏請軍
前正法儻該員弁於起事之初曾經稟報該撫

而該撫有抑勒不辦情事准其據實申訴大振
文武積玩之心盡紓閭閻憤怨之氣雷霆一震
聾聵皆驚烏合之寇不足平也奏入

上命軍機大臣傳諭徐廣縉曰袁甲三奏廣西盜賊充
斥該撫鄭祖琛專務彌縫迨經叅奏查問覆奏尙涉
含混至失守二城以後又復將僨事員弁奏請革職
隨營其八府紳民航海叩闕前此豈全無見聞何以

不據實陳奏種種跡近欺罔著徐廣縉按照所叅各款秉公查覈據實奏叅前有旨令該督確查提督閔正鳳縱賊養寇畏葸無能等情著卽將該提督如何玩誤之處一併查明嚴叅毋稍瞻徇

十三日 辛丑 通政使司通政使羅惇衍奏言廣東

盜風素熾而近來橫行尤甚聞本年六月間有賊匪數千人攻圍肇慶府所屬之廣甯縣城該

知縣賂以銀二千五百兩始行解圍聲言往英
德清遠一帶七月初間直犯韶州府所屬之英
德縣該汛千總梁恩陞帶勇抵禦被賊擄去索
銀數百兩收贖又廣州府所屬之清遠縣水陸
兩路爲行旅出入所必經賊黨自七月十五日
爲始在各隘口公然設廠攔截往來船隻行李
以收重稅蝟起鷓張目無官長如此該賊頭目

有陸和李和李法善黎東狗單眼德大鯉魚大
頭羊等名目號爲八千子弟與廣西勾通一氣
槍礮器械各極精良肆行無忌年來未聞地方
官嚴辦一案馴至賊匪無所畏憚推原其故皆
由提鎮賣缺肥已參遊都守扣餉虐兵府廳州
縣縱盜殃民前任封疆大吏已養癰貽患今該
督撫業經奏派提督臬司等官前往會勦但恐

游寇出沒靡常黨類日衆而官兵單弱難操全
勝相應請

旨責成該督撫添設兵勇剋期剿捕不准一名漏網並
嚴飭所屬文武員弁激發天良爲民除害務必
不分畛域盡數查拏毋得稍有諱飾

同日鴻臚寺卿呂賢基奏言廣西省領府十一
而匪徒蹂躪之區已近十分之七居民逃避紛

紛迄無安土若不亟爲撫綏其孤弱者必轉填
溝壑其強黠者且竄入賊黨則爲害愈大今日
平賊之法宜以保民固本爲先務安民之道無
他恤死亡撫流離而已至於反側之徒譬不畏
法弱肉強食誠堪痛恨業已調兵合勦方期掃
盡賊氛然該省山峒繁多林箐茂密在在皆遁
逃藪若分兵四出而兵力稍單則賊匪愈奔突

郡縣愈殘毀所謂救火而噓之也且臣尤有慮者脅從漸多則滋蔓漸廣要必先解散其脅從而後可以撿渠魁何者今日脅從之民皆前日之赤子也其勢迫於無可奈何遂苟且以延殘喘耳其初未嘗有從匪之心其後未嘗無自新之念則凡脅從者皆可矜之屬也唐德宗時朱泚等自作不靖遠近騷然陸贄勸德宗宣布赦

書宥其脅從百姓山東士卒感泣李抱真見之
以爲人情如此賊不足平也其後賊果平可見
脅從之衆尙有天良全賴在上者有以激發之
耳

皇上若宣布德音痛斥侵漁之吏深憐愚昧之民剴切
曉諭使知

聖主御宇之初正凡庶維新之日脅從者果能革面洗

心去逆效順卽飭地方官咨送原籍令其各歸
故土各守本業斯小民咸曉然於

皇上德威交濟之妙用而無有梗化於其間者臣請以
漢光武時事證之建武十六年郡國羣盜並起
發兵追討則解散去復屯結後乃遣使者下郡
國聽羣盜自相糾擗五人共斬一人者除其罪
凡牧令守長皆聽以檢討爲效但取獲賊多少

爲殿最惟蔽匿者乃罪之於是更相追捕賊並
解散郡國晏然此其明效大驗載在史冊相應
請

旨飭下兩廣總督徐廣縉督飭該省文武官員同心效
力以獲匪多少爲賞罰庶幾匪徒卽可殲除均
奏入

上命軍機大臣傳諭徐廣縉曰呂賢基奏廣西匪徒滋

擾情形一摺勦賊之法以保民固本爲要必先撫恤
流離解散脅從使賊勢日孤則渠魁易獲其平時地
方官因何肇釁必應確切查明懲辦庶羣情翕服志
切同仇辦理賊匪可期迅速歲事著徐廣縉按照摺
內所指各條悉心體察有無可採之處斟酌妥辦又
羅惇衍奏廣東盜風素熾近來尤甚圍城勒索設廠
收稅賊目有陸和李和李法善黎東狗單跟德大鯉

魚大頭羊等名號爲八千子弟與廣西賊匪勾通一
氣皆由提鎮賣缺肥已參遊等扣餉虐兵府廳州縣
縱盜殃民等語著徐廣縉迅速添派兵勇剋期勦捕
並嚴飭所屬文武盡數擒拏不准一名漏網並查明
文武各官養癰貽患實據嚴行叅辦

同日

上諭內閣曰廣西各屬盜匪充斥先經竄擾修仁荔浦

兩縣其另股匪徒復又闖入遷江縣城各地方被其蹂躪民不聊生朕甚憫焉業經降旨令徐廣縉帶兵馳赴廣西並起張必祿於四川調向榮爲廣西提督會同該撫鄭祖琛迅籌勦辦並諭知湖廣貴州各督撫揀派精兵協勦惟廣東亦有游匪滋擾現經提督臬司前往勦辦儻令該督久駐粵西恐有顧此失彼之虞朕睠懷南服民生一日不安朕心一日不釋前

任雲貴總督林則徐先經疊次宣召尙未來京著卽
作爲欽差大臣頒給關防馳驛迅赴廣西會同鄭祖
琛向榮張必祿督率藩司勞崇光悉心勦撫徐廣縉
俟林則徐到後會籌周妥再回廣東專辦該省游匪
其未到以前仍著徐廣縉等認真堵勦協力籌辦不
得以特派有人稍存推卸之見林則徐受

皇
考簡任重恩前在雲南辦理漢回軍務迅速蒞事朕

所夙知著卽星馳就道蕩平羣醜綏靖巖疆毋違朕命

十六日甲辰徐廣縉葉名琛奏言廣東英德等縣

游匪滋擾現在調集兵勇殺斃賊匪二百三十餘名內有頭目九名該匪等分股竄匿經候補知府史樸與署遊擊蘇崇額並參將齊誠阿等帶兵夾擊因佛岡鄉民導引不諳紀律一遇賊

匪卽紛紛逃回以致衝散隊伍文武員弁同時
被困旋復回營現在賊匪出沒數縣毗連界內
臣等惟有嚴檄官軍視賊所向迅速殄除奏入

上

命軍機大臣傳諭徐廣縉葉名琛曰匪徒圍困官兵
殊堪髮指非大集兵力四面兜剿不能迅就撲滅徐
廣縉現在未能前往廣西著卽專辦廣東軍務務須
督飭提督祥麟臬司祁宿藻嚴飭文武員弁相機設

法分別堵剿所有水陸各隘口尤須加意嚴防勿令
東西兩省匪徒勾結蔓延並當斷其接濟解其脅從
迅速進攻一鼓殲擒期戡事候補知府史樸等輕
進失利均暫行革職仍責令隨營效力參將齊誠阿
是否有意遷延著該督確查叅辦至該省佛岡鄉民
情願幫同擊賊用爲前隊何以一遇賊匪卽紛紛逃
回致令官兵受困是否不諳紀律抑係勾同誑誘致

墮術中鄉民導引勢所必需但須洞悉情形確有把握方能得力著諭知帶兵各員臨事制宜不可稍存大意

十七日
巳乙

上命軍機大臣傳諭駱秉章曰廣西修仁荔浦兩縣賊匪滋擾雖距湖南地面較遠但經粵省勦捕難保該匪不竄入楚境現在向榮調任廣西想已帶兵赴粵

著該撫會同署任提督文安嚴飭所屬各營縣扼要
防範如探明迎勦得手卽著不分畛域跟蹤追捕合
力兜擒以期迅就撲滅

十八日丙午徐廣縉奏言查西省盜匪東奔西竄

廣東肇慶府屬處處犬牙相錯必須派撥弁兵
防守要隘因封川縣地方與梧州府相距僅五
十餘里一水可通最爲扼要先經派委參將崔

大同知州郭超凡會帶弁兵前往防堵又委副將齋清阿帶兵駐開建參將左忻帶兵駐廣定參將丁振剛帶兵赴梧州至勦捕英德佛岡等處盜匪除三江協南雄協各營早經調撥外嗣由提臣祥麟督帶提標兵丁一千名續又酌調督撫二標及廣協兵丁共八百名並調惠州永安營兵丁共五百名分起前往堵勦蓋盜匪本

由西省裹脅而來誠恐捕拏嚴緊該匪等仍復
潛行竄回與西匪合而爲一轉致愈難捕除必
須於東西兩省相通要路豫爲派兵堵截方可
相機圍捕是以徵調較多現在廣東英德佛岡
等處疊經飛咨提臣祥麟並飭臬司會同迅速
設法堵剿一俟續調之兵勇到齊撫臣葉名琛
擬卽於九月上旬親往督辦海疆省垣較之西

省各縣尤爲緊要亦必須一人駐守控制方能
鎮靜臣更未便先期遠離總之臣統轄兩省責
任綦重不得不權其緩急通計熟籌以免顧此
遺彼奏入

上命軍機大臣傳諭徐廣縉葉名琛曰粵西匪徒分竄
縣城粵東英德一帶賊匪亦甚狡猾徐廣縉駐守省
垣用資控制葉名琛此時計已親赴韶州督兵追捕

務須擇要防剿勿使兩省賊匪合而爲一轉致愈難
翦除一俟追剿得手卽將現辦情形由驛具奏粵西
軍務該督亦須兼籌熟計迅奏膚公以慰朕念

二十二日

庚戌

上諭內閣曰前任廣西提督閔正鳳以武職一品大員
全省營伍皆其統制當土匪肆擾之時宜如何調度
運籌剋期督剿乃駐紮柳州匪徒偏近府城該提督

按兵不出一月有餘似此畏葸無能縱賊養寇實屬
辜恩負職閔正鳳著卽革職來京聽候查辦

二十七日乙卯鄭祖琛奏言廣西修仁荔浦賊匪

經官兵轟擊殺斃多名而賀縣地方游匪竄入
昭平分爲兩股膽敢圍困官兵以致將士傷亡
不少其明江匪徒竄擾龍州該州同知王淑元
不知下落其官親家丁同時被戕千總家屬亦

被擄去臣現已飛飭官軍分路進剿力遏寇氛
奏入

上命軍機大臣傳諭鄭祖琛向榮張必祿曰廣西游匪
由賀縣竄入昭平分股圍困官兵覽奏實深憤恨其
明江匪徒竄擾龍州戕害該廳官親家丁尤堪髮指
已飛飭雲南督撫迅調官兵二千名馳往應援並諭
知林則徐兼程赴粵督勦著鄭祖琛向榮張必祿會

同妥籌督飭文武激勵兵勇迅速勦辦不可稍事遷延並分咨鄰近各省不分畛域實力協勦其已就戮除各匪地方尤須安撫居民毋令失所龍州同知王淑元並千總家屬如何下落及龍州倉庫監獄有無疏失一併查明具奏

上又命軍機大臣傳諭林則徐曰粵西游匪四出滋擾亟應厚集兵力大加懲創林則徐前已有旨授爲欽

差大臣頒給關防計已迅速馳往屢接粵西馳奏總以賊多兵少股數不一鞭長莫及爲辭未見其因地相機扼要布置現在貴州湖南雲南各省調兵赴粵已有六千餘名林則徐惟當通盤籌畫酌量地勢遠近賊數多寡遴派文武各員分投進剿務將大夥渠魁併力殲擒其脅從各匪設法解散以期迅速奏功

上又命軍機大臣傳諭程喬采張亮基曰現在廣西賊

匪猖獗該省兵力較單太平百色等處均被竄擾距
省較遠策應爲難著程喬采張亮基迅卽於廣南府
屬就近各標營調派官兵二千名選委明幹鎮將管
帶由百色至太平龍州一帶星速馳往相機協勦毋
稍延緩

欽定勦平粵匪方略卷二 庚戌年

十月初八日 丙寅 廣西巡撫鄭祖琛廣西提督向

榮奏言修仁荔浦大股賊匪竄擾武宣之三里

墟經副將李殿元帶兵進勦匪首陳亞潰率黨

渡河官兵分水陸兩路開礮轟擊斃賊多名落

水死者無算該匪奔潰潯州府知府顧元凱等

率練勇追擊斃賊二三百名次日官兵四面合

攻斃匪四百餘名生擒一百餘名陳亞潰率黨
翻山逃至灣龍崗嶺一帶復經遊擊成保副將
舒春已革知縣劉益謨薩畢圖各擊斃數百名
生擒一二百名陳亞潰及其夥匪鄭廷威逃匿
無蹤其太平及右江河下另股盜匪我軍奮力
進攻該匪退怯避兵而行官軍分投搜勦斬獲
甚多匪勢渙散惟該匪或仍由土田州河道上

駛乘隙糾合均在意計之中現飭在事各員弁
一面嚴防郡城一面速籌兜捕賀縣昭平兩股
勢甚猖獗經縣丞白良棟巡檢胡成宗帶兵往
勦該逆抗拒拚死不退縱火燒山傷亡弁兵甚
多白良棟等均受重傷尙無下落其永安藤縣
平南鬱林貴縣宜山各州縣尙有匪徒四路竄
擾河池州屬亦被蔓延前調湖南雲南貴州各

省官兵尙未到粵臣等惟就現有兵力妥商勦辦以期羣醜盡殲奏入

上命軍機大臣傳諭鄭祖琛向榮曰修仁荔浦賊匪雖經殲擒幾盡而首惡陳亞潰尙未弋獲現計向榮亦不過甫經到粵林則徐張必祿到尤需時該撫等萬不可因獲有勝仗稍存大意仍當嚴飭文武各員弁督率兵練於賊所往來之處扼要搜捕懸賞購綫務

期必獲紳民有能縛獻賊首者朕必立加重賞其太平及右江河下各股盜匪勢雖退怯難保該匪等不圖糾合或仍由土田州河道上駛以乘兵勇之隙著督飭在事各員弁分投防剿以期迅就殲滅至賀縣昭平兩股匪徒抗拒燒山兵勇傷斃無數尤堪憤恨著該撫選調精兵督飭儘力攻剿嚴防分竄他處或逃回東省英德等處愈滋蔓延仍遵前旨迅速咨行

湖南雲南貴州將前調之兵催令管帶赴粵協力剿辦其永安藤縣平南鬱林貴縣宜山各州縣四竄盜匪並有竄至河池州屬滋擾情事亦當一併飭屬分投往剿不可顧此失彼致貽除惡未盡之患

上諭內閣曰此次連日攻剿疊獲勝仗所有奮勇出力之文武員弁著酌量保奏匪首陳亞潰現仍逃匿必當嚴密搜捕其夥匪鄭廷威並著趁勢追剿以絕根

株

十二日庚午貴州巡撫喬用遷奏言貴州與廣西

毗連之都勻等府州縣現已分派兵勇防堵古
州鎮遠兩鎮額兵較多均與柳州一帶相近臣

與提督並該署鎮等函商古州鎮尙可選派精
兵八百名鎮遠鎮可選派精兵一千二百名赴
粵協剿古州鎮兵丁揀派曾經出師之署朗洞

營參將德安管帶鎮遠鎮兵丁由該署鎮周鳳
岐督帶迅速起程 臣已飛咨該署鎮等申明紀
律約束兵丁不得在途滋擾一面飭司發給行
裝銀兩並派員護送出境興義府屬與廣西泗
城府接壤已選派兵練分駐要隘慎密防堵都
勻府屬與廣西慶遠府毗連各州縣一體團練
會同營汛兵丁嚴密防守惟慶遠府所屬河池

南丹思恩等州縣偏近荔波獨山等處山徑叢
雜犬牙相錯要隘甚多在在應防現值廣西各
路官兵四面兜剿賊匪勢必分竄都勻距省僅
二百餘里臣已飭委署臬司周作楫與臣標中
軍參將馬善寶酌帶得力弁兵前赴都勻一帶
巡防並令周作楫順道赴興義等處查察地方
情形至貴陽府屬定番州所轄大塘羅斛兩處

亦與廣西南丹浚雲交界先經臣飭令貴陽府
廖維勳署定廣協閃雲酌帶兵練前往防守臣
仍嚴飭毗連各屬文武加意防範奮力堵捕遇
有賊匪竄入立即擒拏究辦奏入

上命軍機大臣傳諭喬用遷曰廣西勦辦盜匪已據鄭
祖琛等馳奏修仁荔浦大股逆匪勦除殆盡惟首惡
陳亞潰現未弋獲此外太平右江以及賀縣昭平永

安藤縣平南鬱林貴縣宜山等處尙有另股匪徒四
路竄擾已令鄭祖琛向榮等督飭將弁追擊該匪被
追情急勢必分投奔竄且難保陳亞潰不潛蹤逃入
鄰境所有黔省毗連廣西地方該撫旣派委署臬司
周作楫等帶兵防堵務飭各屬相度要隘嚴密巡防
勿使匪徒乘隙闖入並偵探陳亞潰蹤跡一體截拏
尤不可任其遠颺漏網

十六日甲戌前任雲貴總督林則徐奏言臣在福

建省城本籍因舊疾未痊正在趕緊醫治特蒙

恩綍給臣以

欽差大臣關防令卽馳往廣西接辦軍務臣但能稍

離枕席卽不敢藉病遷延惟有矢敵愾之夙誠

冀以答

綏邊之至計現定於十月初二日由福州本籍力疾起

身查福建至廣西驛路應由閩南之泉漳粵東
之肇慶前往較爲直捷臣先以臥病在籍於粵
匪如何滋擾未悉情形惟當沿途訪查星馳到
彼一面悉心會辦一面據實奏

聞伏求

皇上指授機宜俾得恪遵辦理奏入

上命軍機大臣傳諭林則徐曰昨據鄭祖琛奏報修仁

荔浦兩處大獲勝仗首惡陳亞潰現尙稽誅所調貴
州湖南官兵各二千名計已先後到粵其雲南官兵
二千名著該大臣卽速催調酌量分派堵剿所有軍
需除本省籌款外其廣東湖南並戶部籌撥共四十
萬兩該大臣仍當督飭覈實支用設有不敷著與該
撫鄭祖琛並藩司勞崇光妥爲豫籌該省賊匪大肆
狍猖出入修仁荔浦遷江各城左右江各屬均被擾

害疊據該督撫奏稱或係外來游匪或係土匪勾結
是否各股絕不相謀抑有總頭目爲之號召何以四
處搶掠同時並發究竟起於何時何地文武各官有
無激變情事該大臣馳抵軍營逐一查訪該撫鄭祖
琛在粵有年何以無弭患未萌之策是否辦理延緩
不能振作前任提督閔正鳳擁兵不出業經降旨革
職仍著查明平素是否別有劣蹟據實叅奏貽誤地

學子與國大略卷二
方各員查明一併嚴叅其實在出力素嫻韜略或民情愛戴之員並紳士中有團練義勇互相保衛或捐貲助餉者均著該大臣查明據實保奏一切惟該大臣酌量情形辦理朕亦不爲遙制

十七日
乙亥鄭祖琛奏言修仁荔浦大夥首匪逃

至賓州交界地方經遊擊成保督帶兵壯馳赴
剿捕行抵黃練賊匪蠶擁前來該遊擊分投抄

勦轟斃賊匪數百名生擒數十名匪首陳亞潰
乘閒逃竄副將李殿元同知吳德徵購綫偵捕
見有賊匪竄至豬仔紫金山經文武員弁指揮
兵勇殺斃賊匪多名潯州府知府顧元凱所調
團長黎建勳首先將逆首陳亞潰擒獲委員兵
練等並將該匪之弟陳火交一併生擒其太平
慶遠匪股復竄永康州劫獄放囚該署州妻女

同時被害另股賊匪竄擾河池州該知州被其
攔截守備吏目亦被圍困現飭參將岳齡帶兵
援應該參將所部雖屬無多臣已嚴飭穩慎進
取協同勦洗以期得力奏入

上命軍機大臣傳諭林則徐鄭祖琛向榮曰廣西逆匪
連竄數城經該撫督飭員弁分投勦捕疊獲勝仗並
生擒首逆陳亞潰等是修仁荔浦一股賊匪勦捕尙

能得手惟太平慶遠各屬匪股衆多現竄入永康州
又有賊匪竄入河池州滋擾雖有參將岳齡帶兵接
應而衆寡不敵攻擊難期制勝向榮現已抵粵林則
徐計亦將次趕到著與鄭祖琛悉心會商所有已經
檄調尙未到營之兵著卽飛咨提催如兵力仍屬不
敷卽一面奏聞一面咨調其右江鎮總兵惠慶並著
飭令相機勦捕林則徐鄭祖琛向榮三人駐紮處所

無論分合總以扼要制勝追捕截拏俾賊匪不能互相糾結分竄滋擾庶可殲除羣醜迅速蕝功

上諭內閣曰此次在事出力各員並紳勇人等著確查據實保奏修仁荔浦首匪雖經拏獲太平慶遠等處各股匪徒勢尙蔓延必有渠魁互相糾結務卽密訪嚴拏懸賞鼓勵紳民中有能縛獻著名逆首者朕必破格施恩林則徐計將到粵著與鄭祖琛向榮督率

文武員弁激勵紳勇埽除餘孽以靖巖疆

二十四日壬午徐廣縉奏言臣奉

旨飭將廣西巡撫鄭祖琛被叅各節查覈奏叅遵查廣西盜賊充斥原非一年始而勤加捕除尙不至十分猖獗自撫臣鄭祖琛抵任後專事慈柔工於粉飾州縣亦相率彌縫遂至釀成巨患卽如本年七月酌委道府分路查辦一摺臚列歷次

擒獲賊匪名數謂外盜均已分竄土匪亦漸能
解散曾不踰月而修仁荔浦遷江之失事踵起
賀縣知縣鶴年實係畏難自盡並非被戕至於
陣亡營弁張文華等十一員則係爲賊分路抄
襲以致敗北實非爲山水漲發漂沒此共聞共
見之事何敢稍爲掩飾若招撫張亞詳一起則
由於前左江鎮總兵盛筠苟且貽誤卽護送船

隻亦由河路梗塞行旅皆有戒心託其保護初
非官爲號令而官亦竟有時賴以伴送者總之
鄭祖琛世故太深周旋過甚祇存市恩之心全
無急公之義且年老多病文武皆不知畏服廣
西官紳卽有謂其賞罰不明人心渙散之語若
謂釀患由於該撫不令其置身事外非僅呼應
不靈轉至羣相掣肘實屬有損無益合無仰懇

天恩迅簡實心任事大員專駐督辦俾資補救奏入

上命軍機大臣傳諭林則徐徐廣縉曰本日已明降諭
旨將鄭祖琛革職命林則徐以欽差大臣暫署廣西
巡撫該大臣計可馳抵粵西所有竄擾修仁等處盜
首陳亞潰業經擒獲正法其同夥之鄭廷威一犯尙
在稽誅難保不糾合餘黨復圖分竄著林則徐專辦
廣西勦匪事務督飭在事文武務將鄭廷威並各股

首匪設法購綫檢獲庶夥匪易於解散地方迅就蕩
平至廣東詔連各屬游匪滋擾亟須大加懲創葉名
琛出省督勦該督徐廣縉駐省調度一切正可專心
籌畫迅期肅清兩省勦捕事機總宜互相知照勿令
賊勢勾結

上諭內閣曰廣西自上年以來盜賊充斥搶掠城邑分
股肆行朕早聞鄭祖琛閔正鳳廢弛貽誤疊經嚴諭

勦辦並將閔正鳳先行革職旋據給事中袁甲三奏
鄭祖琛欺飾彌縫各情並都察院奏該省各屬紳民
赴京控告當降旨交徐廣縉秉公查覈據實叅奏茲
據覆奏鄭祖琛抵任以後專事慈柔工於粉飾州縣
亦相率彌縫遂致釀成巨案等語該撫平日如果振
刷精神講求緝捕何至粵西一省羣盜如毛數郡民
生受其蹂躪現在左右江各屬賊勢尙復蔓延該撫

年老多病文武皆不知畏服若仍令帶罪自效亦難
望其振作鄭祖琛著卽革職林則徐著以欽差大臣
暫署廣西巡撫督同向榮等盡力勦捕仍將徐廣縉
所奏鄭祖琛欺飾各情及閔正鳳畏葸無能前任左
江鎮總兵盛筠苟且貽誤並地方失事文武各員諱
飾縱弛之處一併逐細查明分別據實具奏

二十七日

酉乙

上諭內閣曰廣西各屬近來被賊蹂躪吾民顛沛流離
致多失業現在徵調頻仍兵差絡繹各處紳民猶能
舉行團練殺賊立功朕每覽該省奏報嘉尙之餘益
深憫惻因念窮黎蕩析杼軸幾空若仍令其輸納正
供朕心實有不忍所有廣西本年應徵錢糧著林則
徐迅卽遴委賢員查明被賊滋擾及官兵經過各地
方分別蠲免緩徵其已經徵收之區尤應確查覈實

辨理毋令官吏朦混滋弊林則徐務當悉心體察
恤民艱迅速詳查具奏以慰朕懷

臣等謹案救困扶危爲利民之先務布德施
惠乃治世之常經安宅有詠所以不愷鴻
也惟我

列聖相承勤恤民隱九州之內已無不覆幬矣恭讀
諭旨以廣西被賊蹂躪

命林則徐查明分別奏請蠲免緩徵仰見

閩澤覃敷無俟窮黎之呼籲

德音所至感切遐陬故野人可作干城義士興歌板屋
跳梁小醜法網究難倖逃則所以得民心而
維邦本者豈一朝夕之故哉

二十九日丁亥徐廣縉奏言查賊首陳亞潰勾合

匪黨兩次攻城戕官最爲兇悍疊經官軍追擊

該匪屢次免脫日久稽誅茲經署桂平縣知縣
李孟羣署武宣縣知縣劉作肅府經歷楊潤等
帶同團首黎建勳等將陳亞潰捕獲該匪之弟
陳二一併就擒惟匪夥鄭廷威仍脫逃未獲太
平慶遠等處另股匪徒勢尙猖獗惟有嚴飭文
武員弁密速分投勦捕以期一律肅清此次拏
獲匪首出力之員弁紳勇可否由臣等擇尤奏

請獎勵之處出自

天恩奏入

上命軍機大臣傳諭林則徐徐廣縉曰首匪陳亞潰之弟陳二是否卽陳火交此外有無著名逆匪在內其分夥之鄭廷威一犯尙在稽誅著該大臣遵照歷次諭旨查明並嚴飭文武員弁迅卽設法將鄭廷威擒獲懲治其餘各屬盜匪亦著迅速剿辦毋令勾結蔓

延至此次出力各員並團壯紳士等著該大臣會同該督確切查明奏請恩施毋許冒濫

十一月初二日庚寅兩江總督陸建瀛奏言據報

粵匪已分數股每股一二三千人不等擾及連平翁源二州縣臣當以連平翁源與贛州府屬之龍南等縣壤地相接飛咨署撫臣陸元烺嚴督該鎮道妥爲籌辦該署撫隨於省標各營豫

挑精兵三百名以備調遣仍派委知縣楊豫成
等馳赴龍南等縣會同地方文武巡防並據續
報探有匪徒一二千人被粵省官兵由翁源一
路追逐距龍南縣界不及百里適南贛鎮總兵
德坤派委贛州府知府周玉衡贛州鎮標中營
遊擊羅玉斌挑帶精兵六百名分起進發以四
百五十名馳往龍南一百五十名駐紮信豐連

聞

報
界處所相機堵剿並就近募勇協同守禦奏入

初三日辛卯徐廣縉奏言廣西賊匪竄至永康州

地方維時該署知州高汝霖正在隴東一帶防守一聞賊信立即趕回堵禦詎賊匪於該署州未至之先已經竄入州城該署州馳赴各圖勸

集團練親帶抵城四面用火圍攻賊勢不支紛紛遁去現籌派兵追勦奏入

上命軍機大臣傳諭林則徐徐廣縉曰廣西永康州城失守該署知州高汝霖並未在城究竟在隴東所防何匪因何不知賊匪徑行入城難保非逃避於前裝點於後署永康州知州高汝霖吏日時榮均著先行革職有無與城守各武弁臨時逃避情事著林則徐

確查叅辦至鄭祖琛咨會徐廣縉所稱此股賊匪卽
係前次擁入明江龍州之匪何以與前奏太平文武
節次攻勦賊鋒大挫前後情形不符其賊目是否與
滋擾修仁荔浦之陳亞潰等同黨分夥並著林則徐
查覈確情一併奏聞

初七日乙未雲貴總督程喬采奏言遵調開化等

鎮廣西等營及督標撫標各兵共二千名派總

兵李能臣副將王錦繡分路統領馳赴廣西百色地方聽候調遣奏入

上命軍機大臣傳諭程喬采曰滇省與粵西連界廣南府最爲緊要其曲靖府屬之羅平州廣西州屬之師宗縣均與廣西之西隆州接壤中有河道可通百色尤不可不嚴密防堵著該督檄飭文武員弁於各路要隘處所偵探巡邏毋令匪徒竄擾

同日鄭祖琛向榮奏言賀縣昭平游匪與土匪
勾結復分股四竄延入富川之太平墟而賀縣
另股匪徒又由老鴉寨出擾馬峯經參將成安
等分路進擊生擒賊首葉添良要犯陳脫並將
要犯陳三滿殲斃統計平樂府屬及連界潯州
之平南梧州之懷集藤縣各處先後斃匪一千
八百餘名生擒四百六十餘名現在餘匪無多

再查明賊匪由明江竄至龍州同知王淑元在
灣遵地方防堵時值大雨槍礮未能施放賊卽
恃衆擁入廳署王淑元親至大堂痛罵並令鄉
勇家人壯丁等盡力截殺該匪等卽將該員砍
傷丟棄河內身死其子監生光頡並家丁等救
護均被殺傷斃命又七月初九日賊匪竄入甯
明州衙門署知州恆椿先經會同千總何光璨

在板利村堵禦趕回圍捕該匪等卽日逃至
蘧也方署都司羅起龍帶兵抵禦亦因衆寡不
敵賊匪將營署及居民劫掠逃竄又賊竄至左
州之馱盧代理知州保徵星赴四鄉催傳團練
於十九日午刻趕回保護詎該匪已於是日擁
入該州衙署又賊匪千餘人竄至萬承土州地
方旋擁入該土州衙署隨卽竄至大嶺距養利

州僅二十餘里查太平賊係由東省欽靈等處
而來該處素爲盜匪淵藪與西省南太兩府屬
犬牙相錯在在毗連上年疊經官兵擊敗輒卽
回竄欽靈東突西奔去來無定現經臣等函商
督臣遴派鎮將並札飭高廉道府多帶兵勇在
於欽州靈山各處扼要堵截會同西省文武不
分畛域協力痛剿又賀縣之公會石塔等處前

有賊匪竄至昭平之天門嶺經同知莫秀等帶
領兵壯追勦殺賊多名該匪繞至山後放火傷
斃兵壯縣丞白良棟巡檢胡成宗外委黃俊英
武舉康壽均身受多傷陣亡同知王淑元及其
子王光頡縣丞白良棟巡檢胡成宗外委黃俊
英武舉康壽奮勇捐軀均堪憫惻仰懇

聖恩一併

飭部從優議卹奏入

上命軍機大臣傳諭林則徐向榮張必祿曰賀縣昭平等處賊匪經署參將成安等認真勦捕尙爲得力賀縣富川懷集連界山內逃匿餘匪恐其復出勾結著林則徐向榮張必祿等督飭文武員弁實力窮搜毋留餘孽所有此次出力之文武官兵壯勇及紳民團練著該大臣查明據實保奏現在右江各屬盜匪股

數尙多分路勦洗兵力尙單所有未到之貴州兵一千二百名湖南兵一千四百名並雲南兵二千名著該大臣等迅速催到分別險隘相機堵截該匪等旣由明江竄擾龍州復分擾各州營衙署及左州與萬承土州等處著飛咨廣東於欽州靈山各處扼要堵截一面分飭文武帶領兵勇合力兜勦知府銜太平府龍州同知王淑元督練防堵當賊匪擁入廳署厲

聲罵賊致砍傷後被溺殞命實屬忠憤可憫其子監生王光頡救父被戕並昭平案內帶兵之六品銜縣丞白良棟巡檢胡成宗與富賀營外委黃俊英武舉康壽著一併交部從優議卹其各屬失事州縣營汛並土司等處並著確查具奏

初八日 丙申 程喬采奏言准貴州撫臣喬用遷來

咨據廣西撫臣鄭祖琛移咨該省盜風四起股

數甚多遵調黔省兵二千名會同勦辦業經喬
用遷照數調齊派令鎮將備弁帶領分起進行
由懷遠前赴柳州聽候調遣一面飭屬於沿邊
要隘加意嚴防臣已札飭該處文武官豫爲布
置周妥務於各鄉認真團練遇有匪徒闖入卽
行併力兜擒至滇省與粵西交界地方惟廣南
府屬之剝隘汎相距百色廳計程兩站一水可

通聞現有賊匪數百人來至百色聽嚇索銀兩
若溯流而上難保不擾及居民查剝隘離廣南
城尙有八站係土富州所轄已飛飭署廣南營
參將惠成帶兵前往堵截並令該府梁金詔札
諭該土州厚集練丁互相策應恐兵力尙單已
調該鎮標兵三百名速赴廣南藉資捍禦如賊
勢猖獗該鎮總兵塔清阿卽親帶官兵星馳堵

聞

勦奏入報

十二日庚子福建巡撫徐繼畬奏言據在籍翰林

院編修林汝舟呈稱現接家信伊父林則徐馳
赴廣西勦辦賊匪行至詔安縣因沿途勞頓又
發脾泄舊證至廣東普甯縣途次因病體難支
具摺請假旋於十月十九日辰刻病故所奉

欽差大臣關防已交地方官敬謹收存等情臣已飭沿途地方官俟該大臣靈柩回籍時妥爲照料所有廣西省軍務緊要應請

旨另簡大臣前往接辦奏入

上命軍機大臣傳諭李星沅周天爵曰據徐繼畬馳奏林則徐遵旨赴粵行至潮州途次病逝已有旨命李星沅爲欽差大臣頒給關防馳驛前往廣西勦辦逆

匪並令周天爵署理廣西巡撫一併馳驛前往矣李
星沅周天爵接奉此旨諒必兼程赴粵惟粵西賊勢
披猖疊竄城邑戕害官弁蹂躪地方雖經鄭祖琛等
督兵追捕於平樂一帶屢獲勝仗並擒獲首要各匪
而左右江各屬股數衆多四出搶掠勢甚蔓延李星
沅自楚抵粵程途較近周天爵未到任以前已命勞
崇光署理撫篆現計湖南貴州雲南等省所調官兵

已有六千名次第可到該大臣卽會同該署撫及向榮張必祿等悉心籌商督飭文武相機兜剿務期擒渠殲醜淨絕根株勿致竄逸勾結方爲不負委任其鄭祖琛前在巡撫任內周旋粉飾各情已革提督閔正鳳畏葸無能及該省地方失事官弁逃避捏飾之處疊經寄諭林則徐認真訪查現已諭令徐廣續將林則徐所奉諭旨各件檢齊封固派員齎至廣西李

星沅接收後卽當逐加訪查務令水落石出據實覆奏斷不可稍有不實不盡

上又命軍機大臣傳諭徐廣縉曰林則徐行至廣東普

甯縣途次病逝其欽差大臣關防並歷次所奉寄信諭旨各件著徐廣縉派委妥員迅速齎送廣西交李星沅祇領毋稍遲誤遺漏至廉州南韶等處勦捕事務亦關緊要徐廣縉著仍遵前旨籌辦廣東軍務以

專責成

上又命軍機大臣傳諭勞崇光向榮張必祿曰林則徐
在途病逝已有旨命李星沅爲欽差大臣頒給關防
馳驛前往廣西勦辦逆匪並令周天爵署理廣西巡
撫一併馳驛前往周天爵未到以前已令勞崇光署
理巡撫廣西左右江各股逆匪情形現尙狡猾兵貴
神速不容一日疏懈李星沅周天爵未抵粵西以前

著勞崇光向榮張必祿隨時妥籌堵剿前調湖南及
雲貴之兵計已到齊該署撫等正可乘機殲捕迅掃
欃槍

上諭內閣曰前任雲貴總督林則徐由翰林洊歷外任
疊蒙

皇考簡膺疆寄宣力有年上年勦辦雲南保山匪徒調
度有方渥荷

恩施賞加太子太保銜並賞戴花翎旋因病請假回籍
朕御極之初知其平素辦事認真不避嫌怨疊經降
旨宣召來京嗣以廣西匪徒滋事特授爲欽差大臣
頒給關防令其速赴軍營勦辦前據馳奏已由本籍
起程方冀迅掃邊氛以綏南服茲據徐繼畬馳奏該
大臣沿途勞頓舊疾復發於廣東潮州途次遽爾溘
逝念其力疾從戎沒於王事覽奏殊深悼惜林則徐

著加恩晉加太子太傅銜照總督例賜卹歷任一切處分悉予開復應得卹典該衙門察例具奏伊子編修林汝舟文生林聰彝文童林拱樞均著俟服闋後由吏部帶領引見候朕施恩

上又諭內閣曰李星沅著作爲欽差大臣頒給關防馳驛迅赴廣西辦理勦捕事務現在平樂一帶賊匪疊經擒勦漸就殲除惟左右江各屬股數尙多亟應乘

勢撲滅著該大臣會同周天爵勞崇光向榮張必祿
等督飭文武員弁實力勦辦綏靖巖疆以副瞻懷南
服至意

同日

上諭內閣曰前任廣西左江鎮總兵盛筠畏葸無能又
先期告病規避取巧著卽行革職與已革廣西提督
閔正鳳一併交李星沅徐廣縉確查有無別項劣蹟

據實具奏

二十七日乙卯鄭祖琛向榮奏言廣西土匪竄擾

武緣賓州慶遠等處爲患地方經臣榮親督官
兵馳往慶遠一帶探蹤進剿賊衆約有二千餘
人正在龍門司之索潭墟盤踞時出滋擾臣榮
慮及賊匪聞知官兵將至先期逃竄必須乘其
不備立時掩捕方可聚殲當卽率將弁飛馳進

剿殲斃賊匪數百名乘勝縱火圍攻該匪被傷
燒斃及落崖身死者無數生擒數十名奪獲槍
礮器械多件武緣賓州之匪亦經該處文武督
率兵練斬獲甚多現在督飭各軍乘勝進攻以
期迅速戡事提臣張必祿行抵潯州病故所帶
三千人仍留廣西剿賊奏入

上諭內閣曰向榮甫經到粵卽能身先士卒激勵將弁

實屬忠勇可嘉其武緣賓州等處逆匪亦經該處文
武督率兵團斬獲甚多均堪嘉獎此次出力員弁及
紳民團練人等著李星沅周天爵勞崇光向榮等查
明保奏候朕施恩張必祿現雖病故其所帶弁丁等
三千餘人想可得力均著留於軍營交李星沅等調
遣

二十八日

丙辰

上諭內閣曰前任雲南提督張必祿由義勇出身歷在四川陝西回疆湖南廣東各處軍營打仗出力疊蒙皇考厚恩賞給巴圖魯名號由專閫擢至提督旋因年老奉

旨以原品休致在籍支食全俸本年該提督來京朕見其精神尙健暫准回籍以備召用嗣因廣西匪徒滋事特令馳往會剿念其久歷戎行深資倚任昨據鄭

祖琛馳奏該提督帶兵赴粵在途患病猶復力疾前進甫至潯州病竟不起覽奏實堪悼惜張必祿著加恩賞加太子太保銜照提督例賜卹歷任一切處分悉予開復應得卹典該衙門察例具奏其靈柩由粵回籍並著沿途地方官妥爲照料伊子捐職同知張由基恩廕生張由庚均著俟服闋後由吏部帶領引見候朕施恩

十二月十一日 戊辰

上命軍機大臣傳諭李星沅周天爵勞崇光向榮曰廣西平樂柳州一帶自陳亞潰就擒漸見安戢惟潯州慶遠思恩等府賊數衆多兵力較單自應擇要併力攻圍以期迅速歲事李星沅計已行抵軍營著卽與周天爵勞崇光向榮體察各郡形勢密訪盜賊淵藪悉心籌畫合力攻擊其調到各兵道路不熟恐羣匪

乘閒竄逸或設伏抗拒亦須酌籌妥爲布置總期兵
多力厚將賊匪屯聚最多之處先行掃除他股畏懼
軍威定能望風解散兵機制勝全在該大臣等因時
因地調度得宜朕亦不爲遙制也至兩粵交界處所
尤須嚴密督飭防守毋令盜匪此拏彼竄

十四日 辛未 署廣西巡撫勞崇光廣西提督向榮

奏言廣西慶遠一帶賊匪自索潭受創之後竄

至八旺附近地方恃險抗拒官軍奮勇攻擊殲斃三百餘名餘匪復竄至忻城土縣之木棉羅墨等處我兵連追三日及之於陶鄧墟痛加殲洗又追至覃村生擒賊匪百數十名復經各處兵練分路堵截殲擒多名並將陳亞潰之父陳勝卽矮古二一併擒獲奏入

上諭內閣曰現在慶遠餘匪無多賊勢窮蹙已極正可

乘此嚴密搜捕務期悉數殲除不留餘孽至潯州南甯等屬仍著勞崇光向榮飭派文武分投勦捕以期早就肅清

十八日
亥乙

上命軍機大臣傳諭李星沅周天爵勞崇光向榮曰廣西柳州慶遠諸賊殲除殆盡而左右江各屬勢尙蔓延所有潯州府之大黃江桂平之金田村及附近平

南鬱林等處賊蹤出沒人數甚多該大臣行抵柳州
駐紮策應與勞崇光向榮互爲聲援計周天爵亦將
馳抵軍營厚集兵力分路兜捕當不難迅掃櫬槍著
該大臣等因地制宜斟酌妥辦朕亦不爲遙制總期
迅速蕝事不致糜餉勞師方爲不負委任已革巡撫
鄭祖琛著交李星沅差遣委用

欽定勦平粵匪方略卷三 辛亥年

咸豐元年正月初五日

壬辰

上命軍機大臣傳諭李星沅周天爵勞崇光向榮曰廣西潯州府屬之金田村賊首韋政洪秀泉等恃眾抗拒水陸鷗張自應聚集精兵全力攻勦庶期掃穴擒渠餘匪聞而膽落著李星沅等隨時審度機宜同心協力會籌迅勦朕亦不爲遙制惟賊情狡譎難保不

揚言大夥所在而分遣夥匪襲我不備江河分汊山
徑叢雜尤須堵截周帀鄰省毗連扼要處所均須聲
息相通勿令竄逸貴州總兵秦定三甫於冬閒陞見
出京卽著該大臣飛咨沿途無論該員行抵何處卽
飭迅赴廣西協同向榮督兵分勦現已諭知喬用遷
飭令該總兵兼程馳往並添調貴州精兵一千名揀
派得力將弁管帶赴粵俟到後由該大臣等酌量調

遣

上又命軍機大臣傳諭徐廣縉曰現在廣西兵勇雲集
經費倍增亟應續籌接濟著徐廣縉於關稅款內籌
撥餉銀二三十萬兩派員迅速解往廣西以資支應

上又命軍機大臣傳諭喬用遷曰廣西匪徒滋擾前調
貴州官兵二千名業已抵粵現在尙須添兵進剿著
喬用遷再選精銳官兵一千名揀派將弁帶領星馳

赴粵現已有旨諭令李星沅等檄調鎮遠鎮總兵秦定三赴粵帶兵勦賊刻下秦定三計當回黔著該撫迅卽咨行該總兵無論行抵何處卽飭馳赴廣西毋稍遲延

初十日丁酉喬用遷奏言拏獲粵西匪犯瞿召保

等四十名訊據供稱伊等係張滿股內頭目曾在慶遠河池滋擾所有廣西各處股匪均係隨

地糾聚並聽人自投入夥由廣東糾來者謂之
廣馬在廣西糾合者謂之土馬其有槍礮器械
並跟隨多人者爲大頭目隨時自投入夥者擇
有膂力膽量之人派爲小頭目平樂思恩柳州
潯州南甯太平等處均有股匪滋擾立有大勝
福義等堂名各鑄圖章以爲記認匪頭有陳亞
潰大頭羊大鯉魚覃香晚鄭廷威楊撈家黃晚

鍾亞春顏大陶八諸人約有二三十股姓名不能盡知各股人數多寡不等每股各有暗號或用竹牌布旗傳信或於衣帶用紅布紅綫作記又據差探南甯太平二郡蔓延最甚來賓貴縣賓州宜山皆有賊匪竄擾其餘武宣上林平南鬱林州及所屬之興業縣尙有另股賊匪自千餘至數千不等沿村勒索搶劫此外則潯州桂

平縣屬金田村一帶有尙弟會匪嘯聚萬人皆
係烏合之衆其大黃江一股船多匪衆聚泊江
中攔截商船與金田村會匪並不聯絡各等情
臣查探報係得自傳聞亦不能遽信爲實而查
覈各處所報大略相同臣仍督飭在事文武嚴
密防堵不敢稍涉疏懈奏入報

十八日乙巳

上命軍機大臣傳諭李星沅周天爵勞崇光向榮曰解
散脅從爲用兵之良策然須實在鄉愚無知被賊裹
脅者准予自新其中詐僞情形必當確加密察儻係
計圖內應探我虛實或爲利所動暫時投誠旋即反
覆賞盜之戒不可不知想該大臣等確察情形不至
墮賊奸計且賊匪近來糧草火藥勢將不繼正當乘

此機會官兵全力攻勦壯練分段兜擒以期迅就殄滅古人用兵有以多制勝者亦有以少擊衆者全在相地度機用人得當固不必盡出一轍也現在賊匪究有幾股每股頭目確係何人前次奏報均未詳悉開陳朕心甚爲懸繫所有前經添調之黔兵一千名及所請調之廣東潮州兵均著該大臣迅卽分咨飛調會勦仍當迅速籌辦毋致老師糜餉坐失事機昨

據喬用遷奏訊出粵西盜匪股數並差探情形所稱
賊匪姓名圖章暗號均著嚴密訪拏悉數偵獲該大
臣卽分咨雲南貴州湖南廣東各鄰省分飭各交界
地方文武協力同心互相堵截如有賊匪竄往或各
該省土匪與粵西賊匪勾結一經獲訊得有該匪等
股首盜窩真實情形著各該督撫一面具奏一面飛
咨該大臣等迅速掩擒免致遲誤

二月十三日庚午前任兩江總督李星沅署廣西

巡撫周天爵廣西提督向榮奏言廣西桂平縣

屬金田逆匪竄踞大黃江一帶地險人衆經臣

向榮督飭文武弁兵合力進攻於正月十八日

直抵賊巢該逆分股迎敵我兵鼓勇直前攻擊

自辰至午轟斃賊匪二百餘名並拋擲火具燒

燬賊巢房屋多間乘勢進追該匪暗伏地雷復

敢左右抄截經官兵奮力衝殺連開槍礮又斃
賊匪數十人該匪退竄回巢負嵎固守臣等仍
飭各軍實力進剿不敢因偶有斬擒稍形鬆勁
同日徐廣縉奏言廣東潮州等處近時土匪紛
起高廉一帶地方情形喫重防剿正需兵力所
有前調之潮州兵本境汎地尙屬不敷布置其
勢萬難分撥

徐廣縉又奏言臣接准李星沅咨稱軍費浩繁請籌撥銀四五十萬兩以資接濟等情查有粵海關徵存咸豐元年關稅十萬兩當卽飭司委員起解今恭奉

諭旨於關稅等款內籌撥銀二三十萬兩迅速解往廣西以資支應查海關徵存稅銀業經全數撥解並無餘存惟有藩庫豫備春撥地丁銀十五萬兩係

正項錢糧非奉

旨不敢擅動今既無款可籌祇得以此項全數解往查
廣東自上年春閒撥解湖南軍需銀二十萬兩
秋閒兩次撥解廣西軍需銀三十萬兩現據署
廣西藩司於鹽道西稅項下應解廣東之款截
留十萬兩茲又於關稅地丁兩項解銀二十五
萬兩前後共籌撥銀八十五萬兩廣東清英高

廉等處防勦已用過銀三十八萬餘兩是未及
一年廣東一省於尋常支銷外實撥用銀至一
百二十餘萬兩之多而現在搜捕尙未蕝事至
於捐輸上年十二月始奉部文遠近未及周知
爲數無幾約在數月之後或可望有成數廣西
軍務需費尙繁伏乞

飭下附近廣西各省早籌接濟均奏入

上命軍機大臣傳諭李星沅周天爵向榮曰此次進剿
金田大股賊匪雖少有擒獲弁兵亦有傷亡急宜厚
集兵力設法兜擒庶不致老師糜餉惟前准調之廣
東潮州兵據徐廣縉奏稱該省高廉一帶防剿正當
喫緊勢難分兵前往儻兵力實有未敷著李星沅等
悉心商酌應調若干名准其仍於湖南廣東各府屬
一面飛咨調取一面具奏至所需餉銀計由部撥解

及廣東撥往爲數已不爲少捐輸業經設局於經費亦不無接濟如收有成數卽著隨時奏聞

二十日丁丑李星沅徐廣縉奏言臣李星沅銜

命抵粵卽將閔正鳳在任情形詳細確查僉稱粵省自前年盜風漸熾該提督雖經調派弁兵分投勦捕無如兵力怯弱不能禦賊軍械復不適用上年五月賊匪竄至馬平縣大發墟搶劫典鋪距

府城僅數十里該提督安坐衙齋並未親往督
捕迨官兵在都咸堡打仗陣亡弁兵多人該提
督仍未渡河救應又上年八月賊擾修仁荔浦
兩縣首逆陳亞潰等被兵練擊走該提督移紮
象州自應扼要堵截乃僅拘守州城一任匪首
陳亞潰竄入武宣幾至漏網臣李星沅徧加察
訪衆口同聲查該提督身任一品武職大員全

省營伍皆其統轄平時既未能嚴飭操防修整軍械直至盜匪竊發相距不遠又不親身督勦雖查無別項劣蹟而畏葸無能種種玩誤實屬負

恩溺職奏入

上諭內閣曰閔正鳳身任提督全省營伍皆歸統制乃賊匪在府城外肆行搶劫之際安坐衙齋並不親往

督捕迨官兵打仗陣亡多人仍未渡河救應賊首陳
亞潰肆擾修仁荔浦等縣被兵擊走閔正鳳時在象
州並不扼要堵截幾至賊首漏網似此養癰貽患退
縮無能若不立予重懲何以勵將材而作士氣閔正
鳳著卽發往新疆充當苦差此時兩粵正當勦捕緊
要之時如有身歷戎行有心玩誤該大臣等嚴查叅
奏必當立正刑誅以肅軍律寬典不能倖邀也

二十二日己卯

上命軍機大臣傳諭穆特恩徐廣縉烏蘭泰曰本日有旨令廣州滿洲副都統烏蘭泰馳驛前赴廣西幫同李星沅等辦理軍務該副都統向於火器最爲留心如有製造得用各器械著烏蘭泰酌量帶往廣西軍營以資運用其平素操練得力之章京兵丁亦准酌帶數人一并馳驛前往

上又命軍機大臣傳諭李星沅周天爵向榮曰廣西重
兵雲集統率需人將領難資分遣本日令廣州副都
統烏蘭泰馳赴廣西幫同該大臣等辦理軍務並令
湖北鹽法道姚瑩馳往軍營交該大臣等差遣委用
該二員到後應如何協勦分防之處著該大臣等相
機商辦庶期布置周密不至顧此失彼右江鎮總兵
惠慶右江道慶吉所屬賊匪肆擾自上年以來並未

聞該鎮道如何調度如何親自督勦是否株守偏隅
一籌莫展著該大臣等迅卽查明據實具奏該省前
後撥解餉銀不下百餘萬兩軍需總局責任綦重現
又分局報捐經理皆須得人勞崇光職任藩司務當
分委賢員協同妥辦責令實心經理其各路分局亦
須委用得人庶免濫應侵欺等弊

上諭內閣曰廣州滿洲副都統烏蘭泰著馳驛前往廣

西幫同李星沅等辦理軍務湖北鹽法道姚瑩著馳
驛前往廣西交李星沅等差遣委用其湖北鹽法道
員缺著陸建瀛會同龔裕迅卽揀員署理

二十三日

庚辰

上諭內閣曰江蘇淮揚道嚴正基著馳驛前往廣西交
李星沅等差遣委用

二十四日

辛巳

李星沅周天爵向榮奏言廣西桂

平縣屬金田逆匪自正月攻勦之後尙踞大黃
江牛排嶺等處憑恃險阻經臣向榮四路圍截
二月初三日該逆分股詐誘我兵臣向榮派雲
貴官兵移紮佛子口親率楚兵馳赴夾洲搜勦
逆匪又復詐退從金匏村出撲猺壯營盤分撲
大營經雲南鎮將開礮轟斃賊匪百數十名梧
州兵丁柳肇先立斃長矛賊匪賊勢少卻臣向

榮準備嚴防慮及該匪另有詭謀果於初五日賊分三大股擁出當卽督同總兵李能臣等會督兵勇分隊進攻廕生向繼雄率勇堵其北面該匪又有大夥伏在正南竹林臣向榮督飭兵勇槍礮轟擊自寅至午斃賊無數都司龍金源親燃擡礮傷斃該匪多名乘勢衝殺將身穿紅袍賊首一名手執藍旗賊目一名轟斃匪衆潰

竄先後殲賊一千數百人此次痛加勦洗匪勢
已極窮蹙惟探聞逆首韋政章元价洪秀泉極
爲兇悍而賊股分踞各屬者亦尙不少彼此暗
通消息互爲救援我軍專駐金田未能分投勦
辦恐有顧此失彼之虞臣等惟有竭盡血誠和
衷籌畫務將金田股匪先行勦滅再圖節節掃

蕩奏入

上命軍機大臣傳諭李星沅周天爵向榮曰金田村大股逆匪經此次痛加檢剿大挫賊鋒正可乘勢激勵將士直抵賊巢不難立就撲滅惟賊股甚多分擾各屬難保不暗通消息彼此互爲救援以爲牽掣我師之計重兵均駐金田各屬兵力頗形單弱該大臣等務當通盤籌畫嚴飭各屬文武將弁合力兜檢勿致顧此失彼逆首韋政章元炘洪秀泉及各股匪首等

尤宜設法偵獲勿令乘閒竄逃該處兵力不敷本日
已諭令張亮基喬用遷各選精兵一千名派定將弁
聽候調用並令駱秉章於湖南省豫選精兵應需若
干名由該大臣等酌調卽著察看情形如必須添兵
協勦一面奏聞一面飛咨調撥李星沅周天爵向榮
皆朕特簡大員深資倚畀前降諭旨殷殷訓勉無非
推心置腹之誠諒諸臣必能協力同心和衷共濟以

紆朕南望焦思也

上又命軍機大臣傳諭張亮基喬用遷駱秉章曰廣西
現在軍務未竣尙須添兵協勦著張亮基喬用遷於
雲貴兩省各選精兵一千名派定將弁管帶俟欽差
大臣李星沅等咨調到日卽飭迅赴廣西聽候調度
並著駱秉章於湖南省各營內豫選精兵咨詢李星
沅等應調若干名卽派將弁管帶前往

上諭內閣曰此次痛剿逆匪大挫賊鋒該大臣等調度有方鎮將踴躍用命實堪嘉獎向榮自抵軍營以來身先士卒疊立戰功洵屬有謀有勇不負委任其出力鎮將弁兵壯勇等著李星沅周天爵向榮查明保奏候朕施恩

同日

上諭內閣曰本年元旦經朕降旨飭令各省將節年民

欠錢糧查明奏請豁免所有廣西節年民欠應行查
豁者自己覈實辦理惟念該省軍務未戡地方多被
蹂躪何忍更事追呼著再加恩將廣西本年應徵地
丁兵折等銀一併緩俟軍務完竣再行啟徵以示體

恤

三月初三日
庚寅

上命軍機大臣傳諭李星沅周天爵曰已革巡撫鄭祖

琛身任封疆既不能消患於未萌又不能將貽誤之
提鎮及文武各員早行叅奏以致勞師糜帑僅予革
職回籍不足示懲著李星沅周天爵遵照前旨將鄭
祖琛遷延徇庇各情迅卽據實叅奏毋得稍有隱飾

初四日 辛卯 駱秉章奏言臬司陳之驥到楚恭述

面奉

諭旨現在廣西匪徒滋事飭俟到省後與撫臣駱秉章

察看情形應否出省防堵酌量辦理臣查廣西匪徒
滋事湖南界連粵境之處惟永州府屬之永明
等縣靖州所屬之通道等縣最爲喫重臣已於
上年奏明調派官兵前往擇要防堵現在永明
一帶有提臣余萬清與永州府帶兵分駐督防
通道一帶有辰永道靖州協帶兵督防其鄰近
粵西之寶慶府新甯等縣地方已疊飭該管府

聞

協督屬嚴堵又廣東匪徒滋事鄰近之郴州宜
章一帶亦有永州鎮衡永道分駐督防酌覈情
形布置尙俱周密該司陳之驥此時似可毋須
派令前往奏入報

初五日
壬辰

上命軍機大臣傳諭陸建瀛曰廣西勦辦賊匪須添兵

籌餉以期迅就殲除著陸建瀛會同蔣文慶於安徽各營內迅挑精兵一千名派委得力將弁帶赴廣西軍營聽候調遣並著於部撥軍餉外再於鹽課關稅各項下豫籌銀數十萬兩候旨撥解以濟要需

上又命軍機大臣傳諭張亮基喬用遷駱秉章曰廣西勦賊正當喫緊著張亮基喬用遷各將選定精兵一千名揀派將弁管帶迅赴廣西軍營並著駱秉章迅

選精兵一千名揀派將弁帶往均聽候李星沅等調遣

上諭內閣曰廣西賊匪自蟻聚金田負嵎抵抗我師屢破賊巢殲其渠首逆匪已畏鋒逃竄必當乘此銳氣截追堵剿現在該省兵勇雲集鄰省亦協力兜撿朕睽懷南服亟思一鼓蕩平復命湖南雲南貴州三省再調兵三千名又添調安徽勁兵一千名前往李星

沅等務當督率員弁度地相機分布要害使賊進不
敢拒退無所逃其裏脅愚氓亦卽剴切曉諭許令悔
罪自首免至玉石俱焚如能縛獻渠魁仍應加之獎
勵朕聞該省紳民各處團練同仇奮義自必合力殲
除斷不容釜底遊魂擾我樂土至軍需糧餉已命所
司寬爲豫撥源源接濟惟望捷音疊報全境肅清朕
必立加懋賞爾臣民其共勉之特此布諭巖疆咸知

朕意

初八日
乙未

上命軍機大臣傳諭陸建瀛陸應穀龔裕駱秉章曰廣
西賊勢猖獗縱橫皆是現添調滇黔楚皖精兵前往
協勦兵力既厚需餉孔殷前有旨飭部於江南江西
湖北湖南各省籌撥各款銀兩委員解赴廣西恐部
文遞到後各省輾轉籌商委員又遷延就道甚或以

指撥之款藉詞推諉劃扣抵算往返尤遲朕夙夜焦
勞粵土一日不安朕心一日不釋著陸建瀛陸應穀
龔裕駱秉章各將歷次部撥軍餉已解者沿途催趲
前行未解者卽派幹員星馳解往務須接踵而至源
源接濟其鄰近省分接到李星沅等飛咨無論何項
銀兩一面先行籌解一面具摺奏聞不得以未奉諭
旨或未接部文致有遲誤昨諭陸建瀛再行豫籌軍

餉現在籌備若干先行奏明所有飭調安徽精兵一
千名著陸建瀛飛檄揀調起程不得耽延其江西湖
南界連廣東廣西各處尤當刻刻嚴防不可疏懈贛
州南安各屬先因防堵謹嚴賊匪竄回故廣東得以
乘勢夾擊獲勝惟防兵日久恐生玩泄設爲賊匪偵
知不免反撲偷越攻我不備永州靖州寶慶各屬與
粵境毗連難保該匪等不竄赴鄰近爲乘閒劫掠之

計是該二省堵剿情形必應隨時嚴飭地方文武加
意防維自此次訓諭後設有粵匪闖入鄰省邊界不
但將守邊文武嚴行治罪並將該省大吏重懲斷不
曲宥

初九日
丙申

上命軍機大臣傳諭李星沅周天爵向榮曰廣西自上
年以來土匪滋擾經朕特派李星沅周天爵向榮馳

往會勦朕夙夜焦思惟恐羣盜分竄擾及鄰省楚粵
之交尤爲緊要特命賽尙阿及巴清德達洪阿馳驛
前往湖南廣西交界地方督辦防堵李星沅等接奉
此旨不得以朕特派有人稍存觀望務當督率將弁
激勵兵民因地因時協謀攻勦該大臣等統領戎行
實無旁貸又有特派重臣爲之聲援兵氣旣揚賊鋒
自挫如賽尙阿未到湖南以前業已一鼓蕩平捷音

上命軍機大臣傳諭徐澤醇曰廣西剿辦賊匪尙未蕩
事現復特命賽尙阿爲欽差大臣馳往湖南辦理防
堵事宜並派巴清德達洪阿隨往協同辦理自應添
兵以資調度著徐澤醇於該省鄰近湖南各營伍內
揀選精兵一千名派得力將弁管帶前赴湖南廣西
交界處所聽候賽尙阿等調遣

上諭內閣曰大學士賽尙阿現派往湖南辦理防堵事

宜著頒給欵差大臣關防

上又諭內閣曰直隸天津鎮總兵長瑞著卽來京隨同
賽尙阿馳驛前往湖南聽候差遣

十六日
癸卯

上諭內閣曰前有旨令江蘇淮揚道嚴正基馳驛前往
廣西軍營該員到粵後卽著辦理糧臺事務

同日

上諭內閣曰朕因廣西勦匪半載以來尙未掃除淨盡
誠恐匪黨滋蔓愈多民生窮蹙益甚特命大學士賽
尙阿及都統巴清德副都統達洪阿馳往楚粵之交
駐紮調度旣防竄擾藉作聲援當卽寄諭李星沅等
不得以特派有人稍存觀望仍當督率將士激勵紳
民協力殲擒剋期掃蕩在廣西士民間有此旨定知
朝廷眷念邊疆不安宵旰無不奮迅感激志切同仇

卽各路兵勇亦可知重兵在後益振軍威士氣旣揚
賊鋒自挫如賽尙阿等未到以前業已馳報捷音肅
清各郡李星沅等奏績行閒自當渥膺懋賞賽尙阿
等亦卽可振旅而還以慰朕望第恐中外臣民未喻
斯意特用明白宣示俾知朕命將出師不欲衆民之
久遭蹂躪而又慮徵調過多不免滋累於綏疆靖寇
之意固一日不能釋也

上又諭內閣曰前有旨派賽尙阿等酌帶官兵馳往湖南督辦防堵不日由京分起前進朕思人數衆多經由驛站易滋騷擾著賽尙阿等飭令隨往各員毋得多帶跟役並嚴諭兵役人等沿途行走毋許藉端訛索從前征兵過境往往包帶客貨多用民夫甚至廣占民房陵辱州縣種種弊端皆所不免朕知賽尙阿向來出差頗能約束此次分起出都特諭賽尙阿於

聖諭
三
三
最後起程著卽沿途探訪留心稽察儻有滋擾各弊
無論何人所帶兵役立即截留按律懲辦並將管束
不嚴之員指名叅奏毋稍徇隱至各省州縣地方支
應兵差例有明文儻有意存見好濫行應付並著賽
尙阿一併嚴查隨時奏辦毋負朕諄諄誥誡之意

臣等謹案廣西自用兵以來徵調頻仍重煩
聖慮猶恐鼙鼓所至擾及閭閻我

文宗顯皇帝軫念民依無微不至

臨軒策遣

誥誠諄詳使知翦伐凶殘卽撫綏善類凡有血氣孰不

感激奮興同仇偕作以期迅掃欃槍而共登

衽席哉

十七日甲辰李星沅周天爵向榮奏言逆匪自牛

排嶺潰竄後盤踞武宣東鄉一帶大股時出剽

掠勢極猖獗經臣於二月十七日親督官兵分
路進剿自午至申力戰數時之久賊匪愈集愈
多我軍幾不能支臣周天爵揮軍奮勇直前立
於陣前手刃退走閩勇二人親率東勇大呼前
進我軍乘勢奮擊勇氣百倍先後殲斃賊匪數
十人賊衆紛紛敗竄雖未大加懲創然經此攻
剿之後賊膽已寒臣等惟有激勵將士迅圖撲

滅以收聚殲之效奏入

上命軍機大臣傳諭李星沅周天爵向榮曰周天爵於
進勦武宣東鄉逆匪時手刃退走閩勇二人親督東
勇前進殲斃賊匪數十人看其精神矍鑠並非老不
能軍現既親歷戎行著卽專辦軍務帶兵堵勦俾得
捷音迅奏惟逆匪自牛排嶺直走武宣一帶距桂林
不遠省垣重地尤宜加意防守著該大臣等體察情

形一面兜捕一面嚴防斷不可稍有疏虞致匪徒乘
閒而入昨命賽尙阿等帶領官兵前往湖南廣西之
交防堵並添調四川兵三千名飭部另籌軍餉一百
萬兩有此聲援賊必聞而膽落攻剿更易得手該大
臣居中調度周天爵向榮謀勇兼施務當同心戮力
計出萬全早紓宵旰焦思方不負此重任也

上又命軍機大臣傳諭徐澤醇曰前令徐澤醇揀選精

兵一千名派赴湖南廣西交界處所聽候賽尙阿等
調遣現在軍務正當喫緊著再於附近楚省各營內
選派精兵二千名連前調官兵共三千名揀定得力
將弁備帶適用器械前赴楚粵交界候賽尙阿等調
用

上諭內閣曰周天爵現在督兵攻剿著卽專辦軍務廣
西巡撫著勞崇光暫行署理

二十四日 辛亥

上命軍機大臣傳諭張亮基曰朕聞雲南土守備左大
雄前在軍營出力極爲勇往所轄土練亦甚精銳著
張亮基察看情形該土弁是否可以遠赴徵調其所
管地方是否必須該土弁彈壓如無窒礙之處卽一
面奏聞一面飛札飭令酌帶得力士練數百名星速
馳赴廣西聽候欽差大臣調遣

二十五日壬子

上命軍機大臣傳諭徐澤醇曰粵西軍務正當喫緊著
徐澤醇再挑四川懋功協大小金川屯兵六百名綠
營兵二百名維州協五寨屯兵四百名綠營兵二百
名共一千四百名派懋功協副將和福提標中軍參
將巴彥布廣元營遊擊穆騰額前維州協都司升任
遊擊陳時亨管帶所有管帶屯兵將弁由屯官內揀

派並將綠營千把總會經出師得力之員揀派十餘名帶劈山礮二十位迅速分起由川啟程前赴湖南沿途探聽欽差大臣賽尙阿行抵何處卽兼程馳抵行營聽候調用再四川沿江州縣舊存倉穀著徐澤醇分飭各屬迅卽碾動湊足米五千石由水路運至湖南地方交該省轉送廣西一切費用准其作正開銷如一時碾動不及著卽動項如數採買運往仍將

碾動倉穀湊足米五千石豫備隨後撥運

上諭內閣曰廣西勦辦賊匪前經李星沅等奏請飭部

撥餉八十萬兩現復派大學士賽尙阿爲欽差大臣
前往督辦已飭部續撥餉銀一百萬兩以濟軍需惟
念大兵雲集需用浩繁必應寬爲儲備源源接濟使
後路糧臺毫無支絀則兵心無內顧之憂著再由內
務府廣儲司給發內帑銀一百萬兩作速解赴大營

備用朕矐懷南服宵旰焦勞小醜一日不除粵民一日不靖不惜大發帑金饋餉轉運以殄羣盜而安善良諒該大臣等定能督飭領兵大員奮力攻勦倖匪黨悉就殲滅邊陲立見肅清用副朕靖寇綏疆之意

二十六日
癸丑

上諭內閣曰周天爵著賞加總督銜會同提督向榮專

辦軍務

二十八日卯乙徐廣縉奏言廣西賊目張釗卽大

頭羊田芳卽大鯉魚侯志卽捲嘴狗關鉅卽大
隻具等經藩司勞崇光委員查訪准其投首責
令殺賊自贖旋經候補知府劉繼祖督率在金
田勦捕會匪斃賊一百餘名大黃江勦捕會匪
斃賊二百餘名奪獲礮械火藥多件二月初三
日進勦會匪張釗等皆隨同殺賊初八日火燒

大黃江牛排嶺張釗等復首先施放火箭焚燬
賊巢該賊目等僉稱求俟事竣後將所帶夥件
給予路票回籍其不願回籍者賞充壯丁等語
臣以張釗等悖逆素著反覆無常未便率行允
准致墮詭謀應俟體察情形再行妥籌安插奏

八

上命軍機大臣傳諭李星沅周天爵勞崇光向榮曰投

誠賊目疊次殺賊出力似此以毒攻毒若果辦理得宜未始非化盜爲民之法著該大臣等查覈劉繼祖所稟是否確實其所稱俟事竣後給予路票回籍及不願回籍者賞充壯丁之處徐廣縉議駁甚是將來如何安插或擇其可用者留營差遣亦宜豫爲籌酌勿滋流弊

欽定勦平粵匪方略卷四 辛亥年

四月初一日丁巳兼署雲貴總督雲南巡撫張亮

基奏言查滇省迤東之廣南府廣西直隸州之師宗等縣曲靖府之羅平等州縣貴州之興義都勻等府皆與粵西互相接壤山深箐密最易藏奸而黔省之各種苗民滇省邱北師宗等處三沙儂夷匪及開化臨安之各廠匪素非安靜

臣於二月初過黔時沿途探聽粵西賊勢尙屬猖獗而商貴州撫臣喬用遷會飭各交界地方文武於關渡要隘加緊防堵履任後卽飛飭雲南廣南等府州縣鎮營先將與粵西毗連沿江各渡口要津概行嚴查封禁境內如有形跡可疑之人卽盤詰查拏仍密派文武員弁分別查探不使少有鬆懈奏入

上是之

初二日
戊午

上命軍機大臣傳諭賽尙阿曰該大臣行抵楚粵之交
著卽馳赴廣西軍營接辦軍務並傳知李星沅馳回
湖南會同駱秉章辦理防堵事宜前頒給李星沅欽
差大臣關防卽由驛遞繳回

初五日
辛酉
駱秉章奏言粵西勦捕緊急所有前

調湖南省官兵一千名應卽飭令星馳赴粵以
免遲誤臣已咨會署督臣龔裕飛咨綏靖鎮總
兵李伏剋日起程趕赴前途統帶官兵兼程馳
赴粵西協同勦辦其鎮筸後營千總張朝棟等
八員臣亦已飛飭各該營查明各該弁除前調
兵赴粵已經派令管帶前往者不計外其有未
經調派者卽令剋期起程帶兵赴粵聽候調遣

聞

奏入報

初六日壬戌李星沅周天爵向榮奏言賀縣另股

賊匪由開建懷集竄至里松盤踞經徐廣縉選

派督標參將左忻等會同廣西省官兵進剿於

三月初五日從里松至半路墟四面界地方與

賊接仗開礮轟擊賊卽退回里松我兵奮勇前

進奪蠶家坪駐紮賊匪來撲拒擊兩時斃賊百
餘人餘賊敗退我兵乘勝追擊賊分股包抄兵
壯亦分投堵截及追至里松墟口又斃賊七十
餘人左右忽出伏賊兩股放火圍燒該將弁等
率兵力戰至日暮不少退卻副將齋清阿參將
左忻護都司千總郭維彪守備劉恩錫千總侯
建祁把總梁興富邱先源外委郭安同時陣亡

該逆詭詐異常屢次設伏致挫我師非出奇兵不能制勝惟有隨時偵探賊蹤臨陣格外嚴密以防墮其奸計至陸川縣一帶各股土匪現飭地方文武分路防剿不使凌十八及劉八等股與武宣賀縣大股逆匪會合致成蔓延奏入

上命軍機大臣傳諭李星沅周天爵勞崇光向榮曰此次進剿賀縣匪徒我兵奮勇爭先擊斃賊匪不少乃

因左右另出賊匪四圍放火以致我兵失利將備陣
亡用兵之道謀定後動必須豫爲布置籌畫萬全後
路接應之兵尤爲緊要當賊匪設伏圍裏時設後路
有兵層層接應乘勢殄滅安知不轉敗爲勝朕屢次
諭令李星沅等嚴密布置勿令墮其奸計乃竟屢次
遇伏致挫我師未見我兵壯設伏誘敵及至賊黨飽
颺而去乃始調兵尾追搪塞了事於事何濟該大臣

等既知賊匪詭詐異常非奇兵不能破何尙毫無成
算一至於此嗣後必須偵探賊情知其出沒蹤跡每
遇督兵進剿之際務當格外嚴密防其奸詭毋得再
有疏虞現派賽尙阿督兵接應尤不准稍形觀望致
干咎戾該大臣等縱不自愛其如吾民塗炭何言之
至此憤悶殊深至陸川縣一帶各股賊匪尤當嚴飭
該文武督帶兵勇分投防剿勿令凌十八及劉八等

與武宣等處股匪合而爲一總兵惠慶德亮均係專
闖大員統兵督勦責無旁貸現在帶兵防勦何處能
否得力著據實具奏

上又命軍機大臣傳諭徐廣縉曰廣西賊氛日熾現在
廣東勦辦匪徒已經得手該督卽移得勝之師迅赴
廣西會同勦辦並著曉諭該省士紳如有捐資募勇
隨往勦捕出力者朕必優加獎敘廣東接壤西省如

廣西現有急需著該省仍遵節次諭旨無論何款務
卽迅籌解往毋致稍失事機

上又命軍機大臣傳諭喬用遷曰廣西軍務喫緊尙須
添兵協勦著喬用遷於安義鎮標揀選精壯兵一千
名迅委得力將弁管帶馳赴廣西百色地方聽候調
遣

初十日
丙寅周天爵奏言賊自焚牛排嶺突竄紫

金山槍雙髻而踞東鄉東西六七十里複山重
嶺水陸俱通省城蓋省南柳州象州各大郡之
門戶亦卽通省安危之所繫也賊踞東鄉三里
墟糧食雖充而水路爲我先據飭投誠之張釗
及頭目九人統領七百人勇前往防江賊無食
鹽煙硝欲拌命速戰謀攻黔兵大營潰圍北上
是以三月初二日黔兵奮力鏖戰死傷最多初

八日聞賊欲出一股攻舊縣墟之江口意欲奪
渡而報貴縣之仇再迎凌十八劉八兩股萬餘
之賊是水路所關最要陸路兵將不善操舟又
不能舟中用礮斷難抵禦臣與提臣向榮鎮臣
秦定三熟商默籌一面按兵不動專委張釗與
之力鬪知其長於水戰賊必受創初十日張釗
果大勝礮斃東岸賊數十人又有被擊粉碎者

登山望之伏賊厯厯可指其欲攻秦定三營者
布滿山谷是賊欲一股南出以偏師牽動大營
而乘虛北上也臣等多出兵勇晝夜水陸梭巡
於深林澗谷江畔之地多獲奸細訊供賊又欲
明攻舊縣江口而暗攻勒馬遂飭張釗等備之
故張釗以少船守勒馬而以多船藏於山腳嚴
陣以待未幾賊果大敗傷斃二十餘人而我水

勇受傷者一人臣觀現在賊情形勢惟韋政洪
大泉馮雲山楊秀青胡以洸曾三秀頭目數十
人而洪大泉馮雲山爲之最其營皆散處戰亦
散布卽敗不至大創皆狡黠猾賊之尤者此時
兵力不足則宜專理坐戰之法力有餘則連營
偪進總以大圍收成小圍步步偪緊使之步步
縮歸其至計要在驅諸羅淶峒聚而殲之若猝

然擊之縱獲勝仗必有竄逸逆匪現在暗中四面分竄恐成流賊之勢是一戰之功小致賊四出之罪大也賊情不在速戰而在固守我兵以靜待動以逸待勞庶軍心和而士氣固矣奏入

上命軍機大臣傳諭李星沅周天爵勞崇光向榮曰賊踞東鄉三里墟食鹽煙硝斷絕勢不能不出而速戰以圖潰圍北上其窘迫情狀如見肺肝現因兵力不

敷力持固守之說徐圖連營偏進將各殿賊匪驅入
羅涿峒然後聚而殲之周天爵親歷行簡所見自有
把握惟賊情狡獪務當嚴飭我兵防堵周而設百密
一疏致令突圍竄逸與凌十八劉八合謀則剿捕更
爲棘手張釗投誠立功先當示之以誠令無疑懼使
脅從之衆悔罪來歸亦以賊制賊之一法賊首韋政
洪大泉馮雲山楊秀青胡以光曾三秀等旣經訪得

確實卽當設法懸賞購綫使賊黨自猜攻勦更易得手該大臣等總宜相機籌辦毋令日久勾結再致蔓延爲要

同日

上諭內閣曰廣西盜賊橫行民遭塗炭推原禍始總由地方官不得其人撫綏無術而大吏又不能澄清舉劾以致養癰成患業將巡撫鄭祖琛提督閔正鳳革

職發遣並疊次飭諭李星沅周天爵等確查該省文武各官分別保舉叅劾現在廣西通省舉行團練若非慎選牧令使良民得所倚恃何以收衆志成城之效其前次失事及庸懦各員業據李星沅等陸續奏叅外所有守禦得力及平日治民出色之員自應秉公奏保以昭激勸現據周天爵特舉林士傅以下十餘人臚列勞績開單具奏現當用人之際周天爵旣

破格請獎朕卽不難破格給予恩施升補鹽法道林
士傅南甯府知府彭煥均著交部從優議敘候補知
府張敬修著以道員升用並賞戴花翎升補泗城府
知府盧昆鑾著交部議敘桂林府同知吳德徵著以
知府升用博白縣知縣游長齡著以直隸州知州升
用並賞給四品頂戴請補天河縣知縣黃輔相著以
直隸州知州升用先換頂戴宣化縣知縣張凱嵩著

交部議敘天保縣知縣劉伯墳著賞加五品銜並交
部從優議敘鬱林直隸州知州顧諸庚著以知府升
用先換頂戴太平府明江同知鄒嶧杰著交部議敘
請補臨桂縣知縣劉體舒著以直隸州知州升用候
補同知張汝瀛著交部議敘試用知縣張鵬萬著遇
缺儘先補用並賞戴藍翎太平府土州州同陳寶著
以同知升用另單內所保帶勇殺賊之廣西原補興

安縣知縣姚近東著賞戴藍翎似此逾格獎擢鼓勵出力卽以勸誘中材各該員受朕厚恩宜如何力圖報稱益加奮勉儻或始勤終怠先後易轍朕亦惟執法嚴懲至該省劣員仍著確訪款蹟據實糾叅毋稍徇庇姑容庶幾吏肅民安盜風自戢朕實有厚望焉

臣等謹案粵逆倡亂之由其始不過萑苻小醜盜弄潢池地方官若能詰暴除姦何至成

燎原之勢乃牧令以諱飾爲故智大吏復相
與含容不思弭變將萌粵事幾至不可問我
文宗顯皇帝於出師戡亂之初卽爲正本清源之計首
將巡撫鄭祖琛等革職發遣復

命李星沅等確查各屬賢否從實舉劾分別懲獎所以
警闡茸而勸良能者用意至深且遠大小臣
工孰不聞風興起力戒因循共矢效愾獻功

之志哉

十五日
辛未

上諭內閣曰江南籌備鹽關各款銀六十萬兩著陸建瀛迅速委員解赴廣西軍營交賽尙阿備用

二十日
丙子李星沅周天爵向榮奏言廣西賊匪

有大勝堂潘大等於三月初二日率領夥衆由果化竄至土上林墟經百色廳孫蒙會同雲南

都司李廷楷等帶領兵勇分投勦捕該匪侍衆
撲拒兵勇槍礮兼施殺斃賊匪二百餘名生擒
三十七名斬獲首匪蘇晚潘六等首級五顆奪
獲礮械多件初三日復帶兵勇進攻殺斃賊匪
三百餘名生擒九名該匪退踞土上林墟自初
七至十一日我兵疊次分投進攻連獲勝仗將
匪首潘大殺斃並疊戮賊夥八百餘名生擒數

名受傷落水者無算奏入

上諭內閣曰此次疊獲勝仗文武各員均屬奮勇可嘉
張國樑謝錫祥於悔罪投誠之後既能隨同官弁殺
賊立功即可寬其既往予以自新張國樑著以千總
補用並賞戴藍翎謝錫祥著賞給六品頂戴以觀後
效在事出力文武各員一併查明保奏

李星沅周天爵向榮又奏言廣西另股會匪凌

十八等由廣東石城縣竄入膽敢圍攻鬱林州
城經雲南臨元鎮總兵李能臣等統帶滇兵會
同署臬司楊彤如督率鬱林直隸州知州顧諧
庚分帶各路兵勇於三月二十五二十七二十
九等日三次分路進攻奮勇倡勦每次殲匪數
百名顧諧庚親督練丁生揜僞先鋒黃三黃八
二名署提標守備秦如虎策馬當先衝入賊隊

連斃數賊被匪用竹槍戳傷胸膛並鳥槍打傷
右股仍負痛力追復殺數賊經兵勇趕至將此
股賊匪盡行殺斃其另股匪徒用藤牌遮護衝
突經按察司經歷鄭泉所帶之東勇等亦滾舞
藤牌衝入賊隊與滇兵夾擊斃賊無數復將坐
轎指揮之僞軍師王晚砍斃仍當督飭各軍乘
勝進攻將首匪凌十八及陳十六賴八剋期擒

獲奏八

上諭內閣曰此股會匪抗拒官兵疊獲勝仗賊鋒已挫亟應乘勢擣毀賊巢將首匪凌十八及陳十六賴八等悉數殲除秦如夙驍銳善戰忠勇勃發著賞戴花翎卽以都司升用先換頂戴其殺斃王晚之東勇並出力員弁均著查明覈實保奏

二十五日辛巳李星沅奏言臣於本月初四日馳

抵武宣疾勢增劇惟軍事重大萬不敢因疾置
身事外亦未便乞假遷延致諸軍聞而懈弛惟
所界

欽差大臣關防係出

特旨所關甚鉅欲臥而護之則病中恐有疏虞若徑行
交出跡似推卸再四熟思惟有將關防暫交撫
臣行營遇有調發卽由撫臣監用旣昭慎重於

軍事亦不致曠誤奏入

上諭內閣曰李星沅移紮武宣舊疾增劇賽尙阿現已
在途著卽馳赴廣西接辦欽差大臣事務並傳知鄒
鳴鶴兼程前赴巡撫新任李星沅著卽回籍養病所
有頒給李星沅欽差大臣關防著暫交周天爵收存
俟賽尙阿到日卽由驛遞繳還周天爵於賽尙阿未
到以前通省軍務仍著會同勞崇光向榮悉心籌畫

勿稍延誤

二十七日癸未署廣西巡撫周天爵廣西提督向

榮廣州副都統烏蘭泰奏言賊踞東鄉之村頭
村爲韋逆之大淵藪其地西至東嶺三里墟有
三十餘里賊以東嶺三里墟爲東鄉之門戶以
台村靈湖之淤田爲關攔以山鞍嶺爲域限以
莫村一帶十餘村爲埋伏之所其精銳大半悉

萃於此西窺武宣則由涼亭新路口而西北窺
象州則由二塘墟大林小林而北其閒山徑崎
嶇最易竄逸已飭各營兵丁練勇分番巡緝自
二月二十日至今計擒大小頭目與曾經打仗
之賊共二十二入江路自武宣至桂平之碧灘
百餘里凡渡口十餘處派水勇七百名福勇三
百五十名晝夜梭巡亦拏獲大頭目僞右先鋒

湯亞才訊供凌遲處死至於見仗堵斃者則舊縣勒馬滑石平沖洞尾崇響碧灘等處皆因爭渡截殺轟斃淹溺者數百人刻下賊情甚窘所急需者食鹽臣等已差人售入毒鹽逆賊日有斃者臣等各營兵勇受瘴病斃亦復不少一俟滇黔兵到休息一二日訂期將防堵兵勇一律挑選進哨一攻東鄉一攻東嶺一帶賊巢可以

一鼓偪入羅淥峒矣

烏蘭泰又奏言臣於四月初三日抵武宣軍營
一路訪詢賊情其土匪有十餘股皆烏合之衆
其凌十八會匪一股亦類土匪惟武宣東鄉會
匪謀爲不軌立有僞王僞官名目留髮易服衆
至萬餘兇勇鬼蜮實爲廣西腹心之患若將此
股卽時殲除其各股土匪不難分投勦洗次第

撲滅然現在兵力尙單會匪旣兇勇死鬪又且
伎倆詭譎祇可相持嚴堵以待續調之兵再爲
酌量進剿武宣東鄉地勢四圍皆山西臨右江
中間平陽不過五六十里閒有小山重嶺其內
大小村墟共有六十餘處東鄉一帶均被賊匪
占踞四面隘口早經署撫臣周天爵提臣向榮
分撥兵勇扼要堵截俟兵力稍齊卽可分路進

勅

周天爵又奏言

欽差大臣李星沅於四月初一日由柳州登舟初三
日至象州有來謁者卽患足頓不能步履初四
日至武宣臣見其精神大減言語不甚清楚卽
爲延醫調治不效十一日將

欽差大臣關防交臣敬謹封存十二日病故茲將李

星沅帶來湖南員弁兵丁酌留差遣委用奏入
上命軍機大臣傳諭周天爵勞崇光向榮烏蘭泰曰現
在李星沅病故著周天爵暫署欽差大臣卽用廣西
巡撫印信其欽差大臣關防仍遵前旨收存俟賽尙
阿到營後由驛繳回該匪以東鄉爲淵藪東嶺及三
里墟爲門戶經周天爵等督飭各營兵勇將四面隘
口扼要堵截分番巡緝並於江路各渡口派水勇晝

夜梭巡疊次拏獲大小頭目賊情窘迫計可聚族而
殲周天爵殫竭血誠向榮奮勇出衆烏蘭泰初抵軍
營正可會商勦辦此時自以嚴防賊匪竄逸爲要賊
所必經之水陸各路務卽設法斷其鹽米接濟俾食
用無資進攻更易得力兵貴神速亦應持重如兵力
不敷斷不可深入重地致墮奸計賽尙阿未到以前
所有陳奏事件著周天爵會同勞崇光向榮烏蘭泰

聯銜具奏以歸畫一

上諭內閣曰前任兩江總督李星沅因廣西盜匪滋事特授爲欽差大臣頒給關防令其馳赴該省勦辦歷據馳奏籌畫軍情均能周妥昨由柳州力疾進駐武宣正擬親督將士掃除羣醜乃甫報病勢增劇卽聞溘逝悼惜殊深念其歿於王事深堪憫惻著加恩照總督例賜卹任內一切處分悉予開復應得卹典該

衙門察例具奏並賞給銀五百兩經理喪事頒去人
漫十兩交駱秉章派員送至其家賞給伊母俾資調
養李星沅之次子李概三子廩生李桓均著俟服闋
後交吏部帶領引見候朕施恩

五月初二日戊子周天爵向榮烏蘭泰奏言三月

十七日因貴州鎮總兵秦定三列營在北隨囑
進營大林以堵賊北竄象州之路而秦定三力

任防堵不肯移營自二月至三月賊屢瞰大小
林之路亦屢被擒獲四月初十前後連日大雨
臣周天爵前遣人密入賊營探得此數日賊必
北走東嶺由落梅走東鄉大林小林趨象州之
廟旺臣周天爵卽飛飭秦定三派兵於大林小
林倍加防堵秦定三未發一兵十六日早據報
夜閒望見大林一帶燈火賊已竄去臣等卽派

練勇及貴州兵紮營大林力截北竄之路秦定
三夜閒並不接應遲至辰時亦尙未出兵追勦
臣周天爵速到黔營秦定三始帶兵一千北追
又囑貴州平遠協副將周鳳岐出兵接應周鳳
岐固執不肯適據探報回稟十六日申刻臣等
先遣之劉季三等勇隊至官橋塘已與賊接仗
賊無心戀戰捨去大礮兩位當卽追殺而秦定

三帶兵與貴縣勇桂林馬平兵勇共三千餘人
悉至踴躍轟擊戰方得手秦定三因兵飢渴遂
帶兵折回大衆亦隨之南走經臣等嚴飭始於
丑時離營再追而賊已全至廟旺矣似此軍務
重事臣等頻囑頻玩致賊兩夜一日全行竄出
都司常啟雲不聽將令一味阿附秦定三一同
退回亦屬不堪相應請

旨將秦定三周鳳岐先行治罪常啟雲革職拏問楚兵
時歷三月並無一戰亦屬玩視湖南靖州協副
將博春湖南永綏協副將和春亦請

旨革職仍留軍營效力贖罪臣烏蘭泰到營未久所有
督兵無能不能使將士知畏併心一力皆由臣
周天爵臣向榮之咎並請交部嚴加議處不得
置身事外仍在軍營效力

周天爵又奏言提臣向榮本有才氣膽略因曲徇其子向繼雄楚兵迄不用命乃不自責而反訛冒兵練致失人心又不聽固守之言乃竟僨事可否

簡派湖南提督余萬清帶兵勇三千就近來粵督兵進剿奏入

上命軍機大臣傳諭賽尙阿曰據周天爵等奏鎮將不

受節制致賊竄逸等語周天爵勇於任事而不能用人不但失秦定三之心亦不能與向榮和衷辦事覽其陳奏概行叅劾並無拊循激勵之方賽尙阿到粵尙需時日此時若照周天爵所奏全予罷斥治罪此數十日中軍務延誤將誰責乎賽尙阿接奉此旨一面迅速馳赴廣西一面豫籌勦辦事宜飛行烏蘭泰及向榮秦定三令相機帶兵堵勦同心合力斷不可

稍誤事機賽尙阿到粵卽詳查主帥不善馭衆及將領不遵調度之處據實叅奏如有豫籌方略亦可隨時密陳

上又命軍機大臣傳諭周天爵烏蘭泰向榮曰賊匪大股潰圍而出僅以叅劾鎮將自請嚴議一奏請旨而於堵截迎勦現在辦理情形全未陳明該鎮將等不受節制懦怯逗留致令武宣東鄉逆匪全行竄出本

應一律治罪姑念勦辦正當喫緊之時且因統兵大員不和以致將弁觀望自應先責主帥以飭戎行周天爵已令回桂林省城辦理巡撫防堵事宜現在武宜逃竄之逆匪卽責成烏蘭泰向榮督同該鎮將等同心協力急圖進剿以贖前愆賊匪突圍而出竄至象州地方意欲何圖東鄉賊巢是否平毀桂林平樂一帶如何防堵象州地方有無險要可守扼其奔竄

之處務卽詳細具奏向榮非不能辦賊之人秦定三亦素聞勇往何以坐擁重兵任賊遠颺勦捕重任豈可互相推諉朕非不能執法之主也

上又命軍機大臣傳諭烏蘭泰曰據周天爵烏蘭泰向榮具奏鎮將不受節制又據周天爵單銜片奏向榮曲徇其子向繼雄軍不用命等語周天爵向榮自赴軍營以後屢經諭令同心協力和衷共濟此次探聞

賊匪有北竄之信經周天爵屢次札飭秦定三周鳳
岐堵追接應何以該二人延不用命湖南副將博春
和春統帶楚兵何以時歷三月並無一戰向榮奮勇
爭先屢著戰功何以周天爵叅其曲徇伊子致失人
心詳閱陳奏各情皆因統兵大員不和以致觀望貽
誤周天爵忠直素著向榮奮勇爭先人所共知而近
日徐廣縉亦有叅該提督諉卸觀望之奏是否實情

秦定三之心地朕未深悉烏蘭泰甫到軍營無所用
其回護其所以不和實在情形自己訪察周知是否
係周天爵不善馭衆致失兵心抑係向榮秦定三等
各有徇私觀望之處著卽查明據實密陳毋稍隱飾
賽尙阿未到以前烏蘭泰必能仰體朕意調和諸將
使之盡釋前嫌共圖決勝烏蘭泰朕素知其沈毅諒
必不負委任况係密旨交查之件尤不可洩漏勉之

慎之

上又命軍機大臣傳諭余萬清曰現在武宣賊勢潰散
恐由脩仁荔浦等處窺伺桂林該提督余萬清現已
駐兵江華防堵著卽確探賊蹤不可令與賀縣賊匪
合股其桂林一路扼要地方如有可以應援之處卽
速前往協同堵剿勿失機宜

上諭內閣曰周天爵烏蘭泰向榮奏賊衆竄逸一摺逆

匪蟻聚武宣據前奏稱四面圍困將羣匪逼入羅淶
峒賊巢卽可殲滅何以相持日久仍復任賊竄逸流
入象州統兵大員調度乖方咎無可諉周天爵著革
去總督銜無庸暫署欽差大臣辦理軍務卽回省暫
署巡撫事務向榮秦定三均著拔去花翎與周天爵
一併交部議處

初八日甲午周天爵勞崇光向榮奏言據思恩府

百色廳同知孫蒙稟報該廳因賊匪陳三等竄入西林縣城滋擾卽會營截捕先後拏獲夥匪李亞蠻等五名其陳三麥亞富二名現由河口帶夥黨二百餘人往剝隘陽萬一路逃竄該同知查陽萬一路必由淶沖經過隨督帶壯勇設法堵剿三月二十七日賊匪徑奔淶沖該廳督率兵練將該匪圍住首匪陳三麥亞富各執籐

牌衝出率衆拒敵經兵練開放槍礮斃匪一百
五六十名餘匪俱帶傷逃竄探知被泗城府團
練擊殺殆盡又據博白縣知縣游長齡前任貴
州黎平府知府朱德燧稟報賊匪劉八等由陸
川復竄回博白經該縣等督飭壯練沿途截擊
摧挫兇鋒賊衆心離該縣等卽出示曉諭凡被
脅勉從者若赴官投誠概准免罪該匪由山僻

小徑陸續逃出解散者不下二千人四月初十日賊目黃錦泗馮子材各帶夥黨至該縣等行營投誠劉八因黨散心慌卽於十一日五更時候率其餘黨由小路潛逃朱德璣游長齡分路跟蹤追勦投誠之黃錦泗首先開礮擊斃賊先鋒二人朱德璣游長齡等各在山岡指揮督飭壯勇並投誠之馮子材等奮勇攻擊或超越賊

前或衝擊賊後賊衆紛紛奔竄該府縣等督率
壯勇追殺至馬尾嶺適遇大雨遂收軍紮住計
殺斃賊匪三百五十六人內有賊先鋒十二人
墮崖落澗死者七十餘人奪獲器械多件探知
該匪於十一日連夜竄往合浦縣屬長坂香山
各村該府縣仍督壯練追剿各等情臣等查西
林陳三股匪經該廳剿滅但恐尙有餘匪竄匿

仍飭嚴密搜捕賊匪劉八聚黨盈萬經壯練擊
敗逃竄現飭乘勝追剿以絕根株奏入

上諭內閣曰兵壯勦滅西林縣賊股並追剿博白縣逆
匪大獲勝仗現在乘勝追入廣東合浦境內勢已窮
蹙著廣東交界處所文武各員卽速合剿以淨根株
百色廳同知孫蒙著先行交部議敘西林博白出力
之官紳壯練查明酌保候朕施恩賊匪到處擄掠良

民被其裏脅此次經博白等縣出示曉諭棄械來投者不下二千人可見流離轉徙陷於賊中者不知凡幾大兵一到向化回心皆吾赤子卽如黃錦泗馮子材等亦知悔罪投誠殺賊自效如果始終出力不難與張釗等同寬既往悉予自新統兵大員務當仰體朕心翦滅兇頑保衛良善勿使吾民久困鋒鏑也

十一日酉丁烏蘭泰奏言臣自到軍營體察賊情

困久思竄勢所必然四月十六日賊匪全夥果
由東北竄出臣與署撫臣周天爵商議自帶提
標兵二百名廣州駐防兵二十名會同提臣向
榮追勦於十七日午時起程聞賊在廟旺墟屢
攻古城營盤未破臣等督兵馳進行至新遠地
方離廟旺墟約十餘里見古城營盤被賊攻破
隨督兵一齊前進行至牛欄塘賊匪俱退入廟

旺墟等處因思古城敗兵回到象州城內人心
必亂遂帶兵先赴象州入城示諭免致百姓驚
慌並恐賊匪由廟旺入踞寺村掠中坪羅秀大
樂等村走桐木入四排一入四排北卽石牆通
省城之要路東北卽入八排猺山臣卽飛致提
臣向榮設法防守詎意十九日早探報賊匪已
陸續竄入寺村提臣向榮帶兵由象州東門外

馳赴羅秀桐木一帶迎勦臣隨催秦定三由廟
旺尾追二十日又報賊仍踞寺村附近大井白
石各小村均有賊匪次日賊匪由寺村奔中坪
百丈臣到營半月一籌未展一仗未接以致困
久垂揜之賊全數遁竄襄辦無方惶愧無地惟
有仰懇

天恩重治臣罪奏入

上命軍機大臣傳諭烏蘭泰向榮曰現在賊竄寺村一帶將由中坪百丈圖入四排四排北通省垣東北卽接八排嶺山此係最要關鍵提督向榮已馳赴桐木扼其前路斷不可稍有疏虞任賊竄擾續調楚兵黔兵各千名俱已到營此乃生力之兵合原駐官兵共七千餘名又隨營壯勇六千數百名兵勇之數不爲不多前奏竄逸賊匪祇四千餘人似卽應堵剿兼施

相機兜捕惟軍無紀律兵驕將惰若不力挽積習卽
徵調頻仍亦豈有濟向榮自嘉慶年閒身歷戎行豈
不知約束兵丁嚴申軍法坐視失事甘受重罪耶現
在烏蘭泰統帶之兵著卽如法教練楚黔各營亦宜
痛除惡習整飭號令若再遇賊奔北仍蹈前轍朕惟
統兵之大員是問至投誠賊目如張釗張國樑黃錦
泗等均已殺賊立功旣肯悔罪自新卽可寬其旣往

其詭詐反覆之徒自不容輕率收納致貽後患惟在
統兵者操縱得宜亦不必豫存成見也

上諭內閣曰烏蘭泰奏襄辦無方請旨治罪一摺賊匪
由武宣東鄉竄至象州已將周天爵向榮秦定三分
別懲處烏蘭泰雖係幫辦軍務惟甫經抵粵與久駐
軍營者有閒葺毋庸議處

上又諭內閣曰廣西軍務前已有旨令烏蘭泰與向榮

督率鎮將相機籌辦向榮係該省提督本有節制鎮
協之責烏蘭泰係特旨派令幫辦軍務所有廣西省
鎮將以下及各省徵調赴剿官弁均著一併聽其節
制賽尙阿行抵軍營以後著自巴清德達洪阿烏蘭
泰向榮以次並通省文武統歸節制

十三日己亥大學士賽尙阿奏言竊以粵匪各股

以東鄉爲最鉅若能迅速剿滅則餘匪勢如破

竹五月初四日行次湖北應山縣境接閱周天爵信函所述情形實因從前視事太輕調兵太少兵不足則將帥無所施其謀練勇亦無以作其氣似惜費而費轉增鉅現在雲南所調之兵左大雄管帶一起杳無消息通計前後調兵僅及一萬五千有零查已到之兵歷屆接仗情形未能盡期得力續調未到之兵均當起程在途

臣現已飛催趨程迅速前往仍恐屆時分投調遣未能裕如謹請添調湖北兵二千名以爲後勁奏入

上命軍機大臣傳諭賽尙阿曰武宣東鄉會匪經大兵圍剿相持日久仍任北窻廟旺寺村等處總因主帥各執意見兵將解體觀望推諉以致老師糜餉曠日無功古人用兵有以多勝少者亦有以少勝多者師

克在和總在統兵大員善爲調度若不能駕馭如楚
黔兵將前轍兵雖多亦何濟耶賽尙阿到後事權歸
一自必節制嚴明信賞必罰力矯前此惡習俾各營
將弁咸奉約束庶克殄除醜類

上又命軍機大臣傳諭程喬采龔裕曰廣西勦辦賊匪
現當喫緊之時著於湖北各營內挑選精兵二千名
派委得力將弁管帶卽赴廣西軍營聽候調遣

賽尙阿又奏言訪有湖南丁憂在籍之前任浙
江秀水縣知縣江忠源前因楚匪滋事團練著
有成效才具頗堪驅策已由臣咨行湖南撫臣
調令隨往奏入

上從之

十五日辛丑周天爵向榮烏蘭泰奏言查逆匪竄

踞象州東南百丈新寨中坪一帶皆傍山依險

踞爲巢穴形勢雖險而糧米無多勢必思竄臣
等當卽會商以桐木爲東路總彙逾桐木而抵
修仁之石牆爲東路入省咽喉由羅秀而趨寨
沙鹿寨運江爲西路入省咽喉是桐木羅秀最
爲喫緊重地必須重兵列營相拒方足以禦豕
突以此臣向榮紮營桐木據貴州威甯鎮總兵
重綸等呈報二十七日已刻賊匪由鼇村馬鞍

山而來分七股撲營攻打該鎮等思出營應敵
不如坐戰遂令各營布置靜以待之用九節大
礮對照賊伍追賊偏近一燃衝擊遂成血路約
斃數十人該匪大駭退而復住追連擊不能支
持始行逃逸若非鎮臣重綸郤敵有方貴州三
鎮營盤又幾不守臣謹擇其尤爲出力者先行
開列懇

恩量加獎勵奏入

上命軍機大臣傳諭周天爵烏蘭泰向榮曰此次象州賊匪分股撲營經總兵重綸等併力堵擊業已大挫賊鋒惟賊巢糧米無多勢必鋌而走險該處距省路徑紛歧且與四排等處搖峒接連尤爲要隘匪徒詭詐多端難保不設法誘我以爲明攻暗度之計烏蘭泰向榮等當嚴飭各路弁兵實力堵擊以防奔竄之

路現在賊鋒旣挫續調各兵亦陸續到營正可乘勢直搗賊巢一鼓殲擒烏蘭泰向榮專辦軍務周天爵回省防守務當各盡乃心妥爲布置毋任賊匪再有竄逸

上諭內閣曰象州所屬羅秀地方爲入省要隘四月二十七日賊匪由馬鞍山分七股進撲總兵重綸俟賊偏近開放九節大礮轟斃數十人賊匪併力抵拒皆

被轟逃諸將奮力制勝均堪嘉尙重綸著賞戴花翎
秦定三前降三級留任之處著開復二級仍降一級
留任李瑞前在古城失利著免其治罪以示激勸佟
攀梅德安均著賞戴花翎富珠隆阿著賞換花翎

十六日壬寅駱秉章奏言查現在湖南派防兵勇

雖有四千餘名第沿邊各屬隘卡甚多前項兵
勇合則見多分別甚少每卡僅派數十名其最

要之處亦止一二百名僅敷分堵今武宣大股賊匪既已竄離巢穴勢必四路奔逃必不止於平樂一帶湖南永州寶慶靖州郴州等屬地方到處多與粵省毗連隨在皆可竄入况粵省來咨有探聞湖南土匪接應之說是楚粵交界各處隘口尤宜加倍防範又據探報廣東另有曾大生股匪欲至湖南滋擾而前由賀縣竄回廣

甯之匪徒亦未撲滅如仍向英清逃竄則湖南
宜章桂陽一帶又須防禦是此時楚省邊防情
形實屬萬分喫重若再由提臣余萬清分撥官
兵帶赴廣西修仁等處會勦湖南邊防勢必不
能兼顧未免空虛且武宣股匪甚衆粵西兵勇
萬餘四面圍勦尙被免脫如提臣前往會勦非
厚集兵力難期制勝而湖南實無多兵可以派

調臣再四籌維固不敢心存畛域亦不敢顧彼
忽此已飛咨提臣余萬清酌添兵勇在於楚粵
交界之各州縣一帶要隘嚴密防堵仍遵

諭旨如遇該匪竄近楚境卽由提臣督率弁兵迎頭進
剿庶鄰匪不致蔓延而楚邊仍可兼顧奏入

上命軍機大臣傳諭程喬采駱秉章余萬清曰廣西武
宣大股逆匪竄至象州地方勢必四路奔竄湖南與

粵西毗連處所防堵自應嚴密其廣東曾大生一股
係何處賊匪欲至湖南何處滋擾駱秉章據廣西咨
稱湖南土匪接應之說尤應密察嚴防不可稍涉大
意余萬清現已添調兵勇扼要分堵著卽毋庸前赴
粵境卽於楚粵交界各地方相度要隘督兵堵截勿
令粵匪稍有竄入程喬采兼轄兩省著察看情形如
須帶兵親赴湖南邊界督辦卽一面奏聞一面啟行

前往略秉章駐紮省垣現值四川安徽等省兵差絡繹亦須妥爲布置

上又命軍機大臣傳諭烏蘭泰向榮曰現計鄭鳴鶴到粵已降旨令周天爵於卸事後卽行來京象州大營軍務責成烏蘭泰向榮二人節制管轄無所掣肘自當妥速辦理現在續調大兵節次到營兵力卽厚烏蘭泰平日精於教練朕所素知卽應相機進攻分投

堵截以期一鼓勦滅羣醜提督向榮初到粵西疊獲
勝仗豈不能辦賊之人若云統帥牽制不能自行已
意此時周天爵已令來京賽尙阿卽日行抵軍營事
權歸一復何能藉詞推諉現在黔兵已挫賊鋒著卽
與烏蘭泰嚴督各路鎮將並鈐束驕悍兵丁力蓋前
愆以圖後效若再游移觀望坐失事機責有攸歸朕
不能爲爾寬也

上諭內閣曰周天爵自上年派赴廣西辦理軍務歷次
署理巡撫秉性忠直不辭勞勩朕素所嘉尙第念其
年近八旬久居瘴癘之鄉朕心時深眷注現在賽尙
阿已將抵粵軍營事務統帥有人鄒鳴鶴計日亦可
抵任周天爵著於交卸巡撫篆務後卽行來京

二十五日辛亥周天爵勞崇光向榮奏言溫大貨

五股匪由懷集竄回廣甯各文武跟蹤追剿均

已齊赴廣甯會合勦捕茲另有股匪四百餘人
由廣甯周分岡竄入懷集縣屬之南坪村距詩
洞約二十餘里該處僅有賀縣縣丞任光祖管
帶福勇四百名在彼防守當經署懷集縣知縣
李萱飛諭該處團練與該縣丞任光祖所帶福
勇會合堵剿一面酌留湖南靖綏各營官兵前
往幫捕千總楊鶴超等管帶兵壯二百名馳往

詩洞會同任光祖分途堵截十二日早由詩洞
前往南坪迎面攔擊該匪晨餐未完兵勇團練
直前衝撲槍礮齊施登時斃賊百餘人並查有
廣東德慶州匪首葉亞十李亞孽二人亦被擊
斃餘匪四散逃竄仍由廣甯及附近德慶州界
內竄去

周天爵勞崇光向榮又奏言宣化縣地方有另

股賊匪竄入當卽帶兵壯跟蹤勦捕該匪由宣
化縣明墟過新甯州龍頭因聞兵壯追捕遂竄
走宣化縣之金陵墟至那龍村離南甯府城一
百三十里該署南甯府知府鄒嶧杰於四月初
九日趕至那龍村該匪黑夜竄往丁當村離那
龍村四十里是夜天雨溪水漲隔兵壯不能前
進查丁當村上下數十里村民均已豫先搬運

財物牲畜過河躲避該匪遂分遣一股奪得民
船五隻渡河擄掠十三日該署府密令投誠之
張國樑選帶壯勇潛往擊賊轟斃多名該署府
因所帶壯勇僅祇數百賊衆數千且占地勢必
須用計誘出方可剿捕隨於十四日密令張國
樑率領壯勇坐快艇由小河潛赴村左另派數
十人沿河接應該匪等蠶擁出拒放礮擊傷壯

勇數人該匪得意正向旱路拒敵張國樑已至
村左槍礮齊放轟擊村內房屋瓦片紛墜傷斃
不少賊遂堅匿在內礮不能傷次日派健足壯
勇攜帶火罐繞出村後攀登山嶺由高擲下其
餘壯勇仍由水陸分進前後夾攻十五日該匪
逃往思恩府之武緣縣地方被官軍攔住該署
府尾追之兵又至生擒賊匪二名槍斃百餘名

因前面山嶺險峻恐有埋伏遂卽紮住旋聞欽
虛巨匪顏品瑤有竄廣西滋擾之信該署府以
郡城緊要仍回南甯飭鄒嶧杰督率壯勇會合
圍捕不得因匪已出境稍存玩視現在會匪竄
踞象州中坪一帶數十村莊五月初八初九等
日各路兵勇列營進逼賊勢窮蹙縮歸新寨依
山之地其欲逃入舊巢無疑茲飭四面進兵設

卽逃敗亦必歸羅淥峒殄滅祇在旬月之間此
時西南一帶縱有零匪亦必勦盡此股方能再
滅淩十八劉八溫大貨五等匪至太平思甯有
賊之處德惠兩鎮多係分派將弁追勦不能得
力惟賴張國樑及各鄉勇東西奔馳力圖掃蕩
周天爵勞崇光向榮又奏言查博白劉八股匪
前經壯練擊敗追至距香山二十餘里之樟嘉

村四月十三日攻進香山該匪移竄東館墟分
住竹根坡十四日壯練攻進竹根坡該匪全行
退踞東館墟維時合浦兵壯未至不能會剿知
府游長齡等業已逼近賊巢勢不可卻當飭壯
勇督同投誠之黃錦泗等分作兩隊先後繼進
黃錦泗率領一隊首先直入賊巢殺賊二十餘
人劉八之胞弟劉九亦被殲斃賊仍退踞東館

墟我軍回屯竹根坡十七日該府紮營樟嘉村
俟潮州兵勇到後再行合剿

周天爵勞崇光向榮又奏言前奉

諭旨飭查左江鎮總兵德亮現在何處帶兵是否得力
查德亮現在太平府屬督剿疊次殲擒賊匪多
名是該鎮於剿捕賊匪尙能表率奏入

上命軍機大臣傳諭賽尙阿曰粵西一省羣盜如毛必

須大兵會合兜剿方能淨絕根株惟用兵之道謀定後動此時賊匪自以竄踞象州之會匪爲最大一股其凌十八劉八溫大貨五等股奔竄兩粵交界地方此拏彼竄蔓延日久疊據兩省奏報均不免互相推諉所謂師克在和者安在耶賽尙阿計已馳抵軍營審度地勢人材全局在胸現在剿辦當以何股爲先何股爲次或合兵一處聚而殲旃或分兵協剿同時

並舉務當權其輕重緩急相機布置各股著名賊首
擒獲甚少必應殲厥渠魁乃可散其黨與先勦後撫
庶無後患其應如何運籌決勝朕亦不爲遙制現踞
象州中坪一帶匪徒勢已窮蹙思竄是否仍歸羅淶
峒舊巢正可乘機誘伏截其奔竄之路以冀一鼓殲
擒周天爵等片奏查明左江鎮總兵德亮疊次殲擒
賊匪尙能表率著仍遵前旨與惠慶一併確查具奏

上諭內閣曰此次勦捕南坪另股賊匪雖獲勝仗惟溫
大貨五何名科等皆著名兇賊已由懷集竄回廣甯
劉八等股賊匪奔竄兩粵交界地方雖屢經擊散旋
復嘯聚總因兩省帶兵各員不能併力兜圍以致此
孥彼竄良民受其蹂躪遭其裹脅何時還定安集朕
心實深焦念現在賽尙阿業已馳抵軍營著卽嚴飭
在事文武激勵兵勇迅速殲擒並著徐廣縉葉名琛

督飭帶兵大員於肇慶高廉各屬交界處所一體會
勦務使著名兇匪悉數就擒儻該文武等有推諉退
縮等情卽著據實嚴叅朕必執法從事斷不能稍爲
寬宥也

欽定勦平粵匪方略卷五 辛亥年

六月初一日 丙辰 湖南巡撫駱秉章湖南提督余

萬清奏言廣西武宣竄出之賊已至象州之百丈中坪等村盤踞此股賊匪若竄往廣東廣甯等處與賀縣賊匪合股必須由修仁荔浦平樂賀縣懷集等府縣經過道里較遠現經廣西提臣向榮統帶大兵駐紮修仁之桐木石牆截其

竄路其賀縣賊匪亦據探報現有廣東廣西兵
勇三千餘名在廣甯交界扼要堵截該二股賊
匪似難遽行竄合至桂林一路凡湖南邊界可
與相通之處早已酌派官兵嚴密防堵嗣因武
宜賊匪竄出象州接准粵省咨會派兵堵剿復
經添調提標等營官兵一千二百名馳往分布
扼要協防並經督臣程喬采飭令永州鎮總兵

聞

厚集兵力遙作聲援臣等惟當隨時查察情形妥籌辦理如有可以應援之處卽由臣余萬清統率兵勇不分畛域馳往協力堵剿奏入報

同日周天爵烏蘭泰向榮奏言逆匪竄踞象州中坪百丈新寨一帶知大兵將至窮蹙無聊而賊巢鎗彈稀少至有用銅錢者臣等與各鎮往

返籌商非急戰賊必捨命豕突過急又必致死
於我惟各處列營徐徐進逼使賊不能乘隙竄
出而犄角之勢成臣烏蘭泰統帶貴州鎮遠鎮
古州鎮威甯鎮三營官兵共四千名於五月初
八日自羅秀拔營前進至獨鰲山南梁山村地
方紮駐距中坪四五里許臣向榮於是日由桐
木拔營至界嶺紮駐扼守中坪之東總兵經文

岱與知府張敬修由林村至寺村紮駐皆不出
十里內外各營隨帶壯練環峙其旁初九日賊
於東面山頭聚集四五百人搖旗出隊其後布
滿山谷有賊數千直逼臣烏蘭泰三鎮大營而
各處營盤尙未整齊不能救援臣烏蘭泰當卽
派隊分路轟擊斃賊多名該匪敗退初十日據
探報有賊匪數千渡河直撲威甯鎮營盤臣烏

蘭泰遂督率三鎮官兵排隊出營該匪分十數
股約四五千入礮子如雨臣烏蘭泰嚴飭官兵
仍舊站隊一面督兵施放大礮火箭打中賊巢
望樓賊向下走我兵分投迎擊臣烏蘭泰往來
指揮親督官兵奮勇攻殺先將西南山頭賊匪
擊敗復由獨鼇山腳過橋直撲賊隊該匪大小
隊伍數十層擊退一層後層又上前迎拒我兵

自寅至巳戰至四時之久將該匪隊伍全行擊散惟西南山頭尙有賊匪數十參將馬善寶等見賊已奔率衆大呼策馬竟渡臣烏蘭泰止之不及逾河里許該匪已敗者忽然站住西南山谷間突出數百人橫攔歸路我馬先陷田泥中參將馬善寶等陣亡臣烏蘭泰催衆力救將賊匪擊退此次大勝之後該將領等見賊如仇一

意酣戰致有疏虞賊燄更兇自當休息兵力暫
回各營俟厚集大兵再圖掃蕩

周天爵烏蘭泰向榮又奏言知府張敬修帶領
壯勇往寺村一帶有賊三四百人開礮抗拒官
軍施放大礮斃賊數名餘匪奔回巢穴初十日
張敬修等由廟旺至寺村進剿殺斃騎馬僞中
軍先鋒一名僞後軍夥黨一名十一日臣周天

爵帶領兵勇馳赴寺村會勦張敬修等已於巳刻由橋東山口進兵當時賊分三股來拒每股約七八百人該員等當派兵勇先伏澗谷間亦分三路攻擊連放槍礮斃匪百餘名各賊棄械驚走張敬修等追至數里突有一股攔在迎拒副將常祿親點擡槍擊斃二賊賊匪膽落又殺數十人十二日張敬修等率領官軍由寺村迤

東之長烈嶺分投進勦午刻賊自東南來當催
福勇迎擊賊又分兩股布滿山嶺於是福勇及
張釗之勇先行接仗東勇繼之開礮迎擊賊匪
墜下厓谷閒已而西股賊匪沿山來者英勇一
見大呼輒走而東澗西澗之伏賊蠶擁而至官
軍短兵相接用矛戳斃數十人始行敗去又有
股匪從後繞至經文岱張敬修帶兵迎之大戰

良久賊衆散走殺斃二百餘匪惟儘西面一股
英勇無故喊走鎮道目睹此狀知英勇隊中必
有賊匪隨傳令整隊而下追所有兵勇皆自東
來兜圍該匪始不能支斃賊三百餘名時已昏
暗我軍收兵回營現在晝夜規畫仍行固守以
待新兵大集再行偪進奏入

上命軍機大臣傳諭賽尙阿曰此次知府張敬修總兵

經文岱等由寺村迤東之長烈嶺進勦福勇東勇開
礮迎擊賊匪紛紛落下匡谷惟新到桂平平南之英
勇一見大呼輒行走散而東澗西澗之伏賊蠡擁而
出以致賊匪未受大創是英勇隊中顯有賊匪夥黨
假名暗伏詭譎伎倆殊堪痛恨兩軍對壘不能不藉
資壯勇以助兵力若謂盡屬可疑則防不勝防必難
期其用命若謂概屬可信又恐墮其奸謀應如何密

查嚴防俾爲我用不爲賊用之處務當於招募之初
責成管帶之人悉心體察勿使奸徒溷跡方爲妥善
此次新到英勇究由何處招募著卽密查具奏

上諭內閣曰逆匪竄踞象州經烏蘭泰督兵攻勦大獲
勝仗烏蘭泰調度有方殊堪嘉尙著交部從優議敘
所有在事出力文武著賽尙阿查明保奏候朕施恩
其陣亡之貴州撫標中軍參將馬善寶鎮遠鎮遊擊

博勒果布威甯鎮中軍遊擊劉定泰等雖因乘勝輕
進究屬奮勇捐軀均著交部賜卹

初二日丁巳賽尙阿奏言臣自五月初九日渡江

行次武昌兼程前進十七日馳抵長沙所謂川
省官兵趕到者俱令陸續由水路趨行臣與達
洪阿巴清德分起由陸路前進伏查粵西賊匪
股數雖多而以武宣爲最鉅目今竄出象州四

路劫掠官兵雖有八千餘名在彼防守而得力者僅能過半一俟大兵雲集似尙無難得手聞象州匪徒數雖巨萬而裹脅之良民烏合之游手實居大半象州得手則各股自成破竹之勢俟臣到粵後與在事文武妥爲布置以求萬全賽尙阿又奏言周天爵如已遵

旨回省擬令統帶所募皖勇二百名前赴楚粵交界之

江華縣地方督同該處文武駐紮防堵再安徽
所調兵一千名傳有不甚安靜之說晤達洪阿
據云途間目睹安徽兵未免頓弱到粵恐難得
力惟旣已調往應俟臣到粵後親爲查閱或分
營布置以資教演俾收實用奏入

上命軍機大臣傳諭賽尙阿曰象州之賊固應厚集兵
團迅速剿滅其南甯太平一帶及懷集奔竄各匪亦

應分派大員帶兵前往督勦現在巴清德達洪阿亦
次第到粵各省鎮將足資調遣著該大臣審度地勢
人材某處應派何路官兵何人管帶可期得力某處
官兵應派何人接應務使聲勢聯絡凡賊巢險隘誘
伏處所必須偵探的確庶可一鼓殲擒至糧臺尤關
緊要卽著選派弁兵嚴密保衛並分置各處俾利轉
輸不可稍存大意朕觀烏蘭泰頗有謀略紀律向榮

亦久歷戎行必能與巴清德達洪阿等助卿宣力同心迅奏膚公也周天爵前已有旨諭令來京毋庸留於江華防堵所募皖勇二百名應如何分在管帶酌量辦理前調安徽兵一千名既屬輒弱又沿途不甚安靜恐難得力著隨時查察分營布置其統帶將弁不能約束卽著查明叅奏

初六日

辛酉

四川總督徐澤醇奏言初次所調重

慶等鎮兵丁一千名已於四月十四十五等日
自巫山秀山分投啟行出境二次所謂軍督提
三標兵丁一千名於四月三十日行出川境至
三次所調川兵共一千四百名均由營起程計
五月二十五日以前亦可全出川境奏入報

聞

同日湖廣總督程喬采奏言臣查廣西武宣大

股逆匪現已竄至象州之百丈中坪等村盤踞
勢頗鷓張已近湖南邊界現據撫臣駱秉章提
臣余萬清添調官兵一千二百名於江華縣屬
之最要尖山及永明縣屬之最要龍虎關等處
嚴加防堵其餘要隘亦俱分布兵勇遙作聲援
近據探報廣西大兵駐紮修仁縣之桐木石牆
截賊竄越荔浦平樂之路而賀縣賊匪又有廣

東廣西兵勇扼要嚴防似難再行糾合其與湖南交界者防範現俱周密但恐大兵雲集一經會勦難保不狼奔豕突設有警報臣卽當督兵馳往堵勦奏入

上諭曰設若楚南有警必須汝馳往勦辦仍應一面啟行一面奏聞毋稍遲滯

十一日丙寅烏蘭泰奏言臣於四月二十九日馳

赴羅秀軍營將秦定三所帶官兵二千二百名
查點內除前次打仗陣亡及受傷患病並遣回
原營外僅有一千六百三十四名按名挑選年
青力壯可以教戰者一千名將擡槍鳥槍長矛
等項器械分給教以打仗陣式並將軍營一切
條規紀律逐一傳示以期殺賊立功其羅秀所
駐之兵尙有貴州威甯鎮重綸統帶一千名署

古州鎮李瑞統帶八百名五月初七日接周天
爵咨會飛檄各路官兵拔營逼近賊巢屯紮剋
日四面圍剿初八日並准向榮知會已督兵由
桐木進紮臣卽會商署古州鎮臣李瑞並知會
威甯營帶兵官佟攀梅等卽於初九日拔營逼
近賊巢並選兵練共一千名整隊先進招募鄉
民指引至獨鰲山南梁山村一帶相度形勢其

地一片平陽東臨大河河東中坪仁義等村俱
在目前瞥見中坪村北第一山頭賊匪望樓有
人搖旗臣卽將大兵調過山南並令古州威甯
二營兵各分六隊排列時由仁義村竄出賊匪
三四十人被我兵用擡槍擊斃二名餘匪竄回
其望樓下賊匪已聚集六七百人用大礮向我
軍施放隨令旗營官兵開礮打中賊之望樓賊

匪卽紛紛潰散因恐該匪狡猾全軍未敢遽撤
至晚始整隊回營其威甯營紮在西邊山頭古
州營在中閒初十日有賊匪數千蠡擁渡河而
來臣當令佟攀梅往前開礮迎敵大股賊匪已
至橋南開礮向我兵轟打礮子如雨我兵因得
地勢由高臨下槍礮火箭齊發該匪前隊旣斃
後隊又進由稻田奔鼇山西角直撲我營我兵

用槍齊打該匪前隊倒斃後隊回奔臣見其勢已倒卽令各伍整隊過橋追殺大獲全勝西南高山打礮之賊經威甯營轟擊潰散適有由山上逃下十數賊奔梁山村經我兵擊斃僅賸七賊復奔上西山梁離威甯營不遠乃威甯礮兵因無長器械在手退回隊內賊見礮兵已退直撲威甯大隊大隊之兵亦卽退回營盤賊乘勢

追撲以致該營之兵全行棄營奔潰伏思千兵
不敵七賊實出情理之外乃因該營全軍奔潰
下山其南山頭之賊亦卽撲來用威甯營之礮
直攻臣營臣入營防守見東南面似可保住卽
赴西北面照料適旗營兵並鎮遠兵大聲吶喊
首先上山富珠隆阿帶威甯兵隨同擁上該匪
棄營南竄我兵復奪回威甯營是日由寅至午

勝而誤敗敗而復勝轉戰四時之久共陣亡大
小官十五員額外馬步兵丁二百四十二名廣
州駐防旗兵七名受傷官兵四十四名臣布置
不善以致傷亡官兵二百餘名之多咎無可辭
惟有請

旨治臣

重罪至威甯鎮官兵怯懦敗退至誤全軍該鎮
重綸因病未在軍營其帶兵官署副將佟攀梅

署參將慶祿等不能約束亦不敢不據實奏明
請

旨治罪

烏蘭泰又奏言五月十一日提臣向榮前軍移
進都金嶺周天爵由寺村進得勝十二日復戰
未利至晚官兵壯勇俱退回象州其寺村一路
俱空接周天爵回信言十二日寺村之戰英勇

內有奸細呼衆先逃兵勇不能支持連夜回到
象州囑臣察看形勢如獨鼉山勢不可守卽移
紮羅秀防堵俟續調大兵到齊再行會剿因思
圍剿之局已散獨鼉距中坪甚近孤軍臨敵舉
目皆賊其地可戰不可守故於十六日率三營
黔兵俱撤回羅秀仍歸舊營向榮仍駐界嶺與
羅秀相距六七里聲援相應再向榮久歷戎行

勇敢有爲屢著戰功惟此次統帶楚兵始而攻
勦流匪屢戰屢捷因之或有大意又因向繼雄
不知避嫌以致楚兵藉口更因周天爵精神不
及未能設法調度向榮知楚兵心離自挽無術
故有誘卸之處然久歷戎行熟悉戰陣現在軍
營鎮將各員均有不及向榮者賽尙阿到時必
能激勵勸勉或更易其兵則向榮必知感奮仍

可立功

烏蘭泰又奏言遵查向榮之子五品廕生向繼
雄隨向榮在軍營效力不能避嫌跡近干預又
因向榮保伊子花翎以致衆心不服楚兵藉端
挾制是周天爵所奏向榮曲徇其子致失人心
不爲無因此次探聞賊匪有北竄之信經周天
爵屢次札飭秦定三周鳳岐堵追接應該二人

延不用命一節查賊匪在武宣東鄉秦定三周鳳岐共駐一營在東面堵禦與管帶東勇之現署右江道張敬修營盤相連四月十五日夜間賊匪竄出未能堵禦十六日追賊至官橋打仗已勝因兵無鍋帳復回十七日又在二塘紮營未能尾追延不用命亦屬實情惟張敬修管帶東勇八百名與秦定三連營防堵周天爵現叅

秦定三周鳳岐未叅張敬修人心亦有不服至
統帶楚兵之副將博春和春係向榮隨營將官
臣未到武宣以前聞本年三月初二日與賊匪
打仗不利周天爵責秦定三不前後訪知秦定
三並無退縮之處卽言向榮推卸而周天爵與
向榮向榮與秦定三均似因之有隙以致不和
周天爵爲人居心本直惟性强耳輟年老精神

不及以致其子周光岳從中干預致失人心奏

八

上命軍機大臣傳諭賽尙阿烏蘭泰曰此次進兵獨鼇山南連獲勝仗僅贖七賊復上山梁直撲威甯大營該營官兵計有千人何以不敢出營抵禦致有挫折著賽尙阿卽查明該營弁兵究係何人首先奔潰按律懲辦以肅軍令威甯鎮總兵重綸是否實係因病

並未在營抑係有心規避確查具奏再向榮所帶湖南弁兵初到粵時頗覺勇往是否因向繼雄濫得保舉解體抑係該弁兵等恃勝驕悍不聽號令旣不得力卽留營亦恐誤事現在湖南防堵緊要亦須兵力著賽尙阿到營察看是否可以裁撤或令仍回本省防堵向榮籍隸四川現調四川兵有四千餘名或卽酌撥數千交向榮管帶似此量爲轉移可資得力其

威甯鎮潰散之兵勢不足恃應如何安插裁撤之處亦著酌量辦理至烏蘭泰覆奏查明軍營主將不和緣由湖南副將博春和春不能稟請追賊及張敬修獨未被叅等情著與前此疊降諭旨飭令查覈功過各件一併確查據實具奏

上諭內閣曰據烏蘭泰奏稱五月初九日梁山村接仗先已獲勝次日因威甯鎮兵見賊退縮以致將弁傷

亡自請治罪等語此次我兵逼近賊巢奮勇勦殺逆
匪已大受懲創雖小有挫衄究屬罪不掩功且烏蘭
泰尙能轉敗爲勝所請治罪之處著毋庸議烏蘭泰
據實陳奏具見不欺若能迅速立功仍當加以懋賞
管帶威甯鎮兵之署副將佟攀梅署參將慶祿始則
屢催迎敵延不出營迨賊匪撲營輒卽退回致令全
勝之後復有挫折實屬罪無可追佟攀梅慶祿著卽

革職拏問交賽尙阿嚴訊定擬具奏

十五日
庚午

上命軍機大臣傳諭賽尙阿曰廣西勦匪以章政洪秀
泉等大股爲最急而南太一帶餘匪未淨地方寫遠
深恐鞭長莫及轉致蔓延現在續調各路官兵均可
到粵如何分派合擊前已有旨諭令熟籌辦理左江
鎮德亮勦賊是否得力仍著隨時察看據實具奏其

各股匪徒除象州會匪外尙有幾股每股約計若干人及賊首姓名均著查明開單奏聞其省城防守各屬團練及保護糧餉各事宜鄒鳴鶴已次第籌辦該大臣到粵後擬駐何處及如何通盤籌畫之處諒有奏報在途矣

上又命軍機大臣傳諭鄒鳴鶴曰粵西勦匪自以象州大股爲最要此外游匪如林聚散靡定亦應遴派大

員分兵督勦不至愈聚愈多勞崇光前駐梧州勦滅
首匪鄧立奇等著有成效著卽飭令該藩司移紮南
甯太平一帶會督該處在事文武協力勦捕毋令延
蔓其梧州一帶仍應派員防勦著該撫會商賽尙阿
妥籌布置至省城防守尤關緊要經該紳士龍啟瑞
朱琦等辦理團練但恐兵力尙單著卽於全州等營
酌調兵丁並添雇壯勇協力防守毋稍疏忽

十九日
甲戌

上命軍機大臣傳諭徐廣縉葉名琛曰逆匪溫大貨五業經擒獲其夥匪曾亞涓尙有數百之衆難保不因首匪就擒鋌而走險至劉八凌十八及何名科各股賊犯尙未擒獲勦辦不容鬆懈現在周天爵已飭令來京賽尙阿等計已馳抵軍營事權歸一該督兼轄兩省尤當不分畛域合力兜拏庶可速圖蕝事以副

朕望

二十日乙亥賽尙阿奏言臣於靈川縣途次接據

廣西提臣向榮咨報金田逆匪屯聚中坪仁義等村旋因探得逆匪有調百丈等處賊匪助戰之信該提臣卽令綏靖鎮臣李伏等分帶楚粵官兵一千七百名及委員許炳東等各帶壯勇於五月十三日一同渡河攻勦署參將成安卽

於上流河口攻賊之伏先行開仗互相轟擊各
兵壯依次涉水而進該匪卽從嶺後紛紛擁出
各官兵開放連環槍礮奮勇接戰自辰至午傷
斃賊匪百數十名總兵李伏帶兵當先搶上山
梁又斃匪數十人復有大夥賊匪十數股擁來
鎮筓左營把總熊士貴手刃數賊殺入賊隊登
時陣亡總兵李伏以賊多兵寡萬難獨當祇得

撤過小河以免受敵該匪亦未敢渡河卽行折
回又中坪仁義等村賊巢水田環繞田陸路窄
小河阻滯進退不易卽經督飭各路官兵嚴加
防堵一面飛調知府陳瑞芝管帶潮勇一千名
二十二日起到界嶺飭令隨營聽候調遣探知
賊衆因鹽糧不繼有欲逃竄之意隨經飛咨副
都統烏蘭泰及各鎮嚴密堵截二十五日探得

賊匪洪秀泉等欲攻撲楚兵營盤以圖逃竄卽
連夜齊隊豫防將各壯勇伏於架村左右以備
分途截殺二十六日寅刻該匪大隊約四五千
人果由中坪仁義鄧村擁出至古磨黃岱嶺上
屯聚因該處水田及小河甚多卽令陳瑞芝等
管帶潮勇伏於下官村後未入流謝繼超督會
投誠之陶昌培楊瑞乾壯勇數百名首先誘敵

一面飭各營官兵靜以待之該匪見誘敵壯勇人少卽有賊匪二千餘人蠶擁而來各壯勇誘至伏所經陳瑞芝等督令潮勇齊起一擁而出施放排槍該匪措手不及紛紛倒地並將先鋒騎馬賊三人立時槍斃餘匪驚潰詹事府主簿陳登仕等帶領潮勇奮力直前追至小河口該匪等已涉水奔回古磨嶺上因有小河之隔未

便深入該匪見各壯勇撤後卽分三股一奔架
村一伏寺葉村一越苦瓜嶺欲抄攻官兵營盤
其餘盡占嶺上助勢該提臣卽將楚粵兵勇分
爲五路齊進並令潮勇仁勇由猺山腳進擊該
匪一股約二千餘人仍擁至架村將該處民房
焚燒煙光迷漫經提勇由左邊山腳橫衝攻擊
副將和春督帶楚兵數百名並潮勇仁勇千餘

人搶過架村環攻寺葉村轟斃賊匪數千人將
僞右軍先鋒方標立時殲斃兵壯復追至小河
口因賊匪尙有埋伏卽令官兵壯勇撤回其苦
瓜嶺一股經遊擊瞿騰龍成林督帶楚兵五百
名奮力堵剿該匪見中路敗走亦卽縮回惟要
村一股約千餘人猶敢鳴角舞牌由村外衝出
望大營而來該提臣指揮兵勇併力環攻卽時

潰敗我兵追至河岸亦鳴金收軍查點官兵僅
傷斃壯勇數名受傷數名查該逆鹽糧空匱思
欲拚死衝突經兵勇踴躍用命一日之間三戰
三勝俟大兵雲集聲威愈壯似更無難得手惟
該逆匪雖受懲創仍當加意堵截以絕其奔竄
就食之路現經向榮札飭象州武宣桂平平南
各文武官兵於水陸要隘一體嚴防並禁止往

來船隻以防偷渡臣仍授以機宜俾在事文武
併力堵剿其陣亡之湖南鎮守鎮左營把總熊
士貴應請

飭部照例賜卹

賽尙阿又奏言臣自五月二十一日自長沙起
程六月初四日始抵桂林達洪阿已於初二日
先到巴清德於初六日亦卽趕到查各省官兵

現有受傷受病及怯懦不堪復用者擬卽確查
釐剔如其坐糜糧餉不如挑揀裁撤以期一兵
得一兵之用卽各處練勇招集烏合有首鼠兩
端居心叵測者詳悉甄覈分別妥辦尤當申明
紀律嚴定賞罰庶期一律得力至於粵西通省
情形除桂林一屬尙稱完善此外各府屬羣盜
如毛各股土匪多者數千少者數百而會匪之

兇悍更甚於土匪會匪之黨與亦更多於土匪
周天爵屢言賊勢窮蹙欲以坐困斃之而武宣
大股由金田而東鄉由東鄉而廟旺寺村偏近
象州諸將領各懷意見屢失機宜自五月以來
經烏蘭秦向榮等少挫兇鋒現聞該匪有欲竄
回東鄉之說自當一面密訪一面嚴行堵截儻
有可乘之機斷不敢一誤再誤總使賊之所到

無可掠之鹽糧則匪徒已有困斃之勢再以大
兵分投勦捕當可陸續奏功至湖南會匪接應
之說沿途密訪實無確據可憑不便過事張皇
轉致別滋事端

賽尙阿又奏言查林士傅帶兵勇二千名前赴
賀縣會同肇慶協副將齋清阿勦辦匪徒三月
初五日齋清阿帶領兵勇在里松地方接仗官

兵先勝追至山澗該匪縱火抄後官兵失利該道在龍津橋駐紮離賀縣一百四十里其賀縣壯勇六百名臨打仗時復調回四百名是此役先勝後敗實由林士傅貽誤無疑相應請

旨卽行革職已革賀縣知縣甯域辦理防堵尙識機宜林士傅平素官聲尙協輿論擬請將該二員留於軍營差遣以觀後效

賽尙阿又奏言臣行抵廣西省城連日會晤新任巡撫鄒鳴鶴卸署巡撫周天爵詢知平樂柳州潯州鬱林太平鎮安泗城等處各股盜匪多經兵勇剿滅擊散或逃東省去而復來散而復聚股數衆多其由金田竄至象州會匪韋政洪秀泉等一股尙在中坪百丈新寨一帶村墟盤踞先經向榮帶湖南兵在賊之東北界嶺紮營

烏蘭泰同秦定三周鳳岐帶貴州兵在賊之西
北羅秀紮營候補知府劉繼祖帶領壯勇及張
釗水勇在賊之西運江紮駐皆嚴堵其竄往平
樂桂平之路而南路之大樟西南路之寺村均
係要地經臣札飭總兵經文岱督帶兵弁署右
江道張敬修督帶兵勇前往寺村舉人韋仁元
帶領猺勇前往大樟堵此兩路庶爲周密臣查

會匪人衆善戰官兵先到者已形疲懈新調之
兵未到會齊尙須旬日又現在六月盛暑南方
炎溼非進兵之時應令各營照前堅堵儻賊匪
出巢竄撲則相機擊退不必窮追但不令竄出
以待新兵一面多購閒諜解散黨與計誘各賊
首自相攜貳俟我新兵雲集八面進攻可爲一
鼓殲除之計此外各股盜匪皆有兵勇堵剿其

大股如凌十八劉八等在廣東省之化州西省
之博白一帶往來竄越現有署臬司楊彤如同
總兵李能臣會帶兵勇勦辦惟南甯太平等府
匪股衆多亦當籌辦而象州大股尤爲緊要向
策所帶湖南兵多疲乏不能得力擬令挑選精
壯堪戰者留營餘俟新調兵到前往抽換桂林
省城存兵無多經署藩司吳鼎昌率同在籍翰

林院侍講龍啟瑞御史朱琦等辦理團練最爲
周密臣一面會同鄒鳴鶴督飭各府州縣設法
鼓勵本地紳士實行團練旣以保衛地方且使
賊無所掠前此李星沅駐紮柳州係以通省賊
勢盛衆柳州居中可以四面策應今各路賊勢
忽聚忽散鬱林一帶已有楊彤如等分辦惟象
州會匪喫重在省城之南相去僅四百里而柳

州反在賊後擬卽暫駐省城控制俟各省新兵
齊到剋期進剿或遣派巴清德達洪阿分帶前
往或臣親往督辦之處再行具奏奏入

上命軍機大臣傳諭賽尙阿曰廣西羣盜如毛自用兵
以來雖屢獲勝仗時有斬擒總未大加懲創該大臣
現抵軍營節制各將事權歸一所陳廣西匪股地勢
情形布置均合機宜象州大股逆匪距省不遠固當

嚴防北竄但既聞有竄回東鄉之說更當嚴飭文武
四面堵截斷不可再令竄回舊巢復致滋蔓此次連
獲勝仗楚兵似尙可用著該大臣體察情形其尙堪
驅策者留在軍營其餘或令回守省城或撤回湖南
防堵酌量辦理道員林士傳既經查明貽誤屬實著
卽革職與已革知縣甯域均著留於軍營差遣仍查
明能否得力據實具奏該大臣暫駐省城控制全局

巴清德達洪阿烏蘭泰向榮等皆能奮勇圖功堪資分任應如何分勦合擊度地相機以操勝算想該大臣必能契合朕意埽蕩賊氛迅奏膚公也

上又命軍機大臣傳諭程喬采曰湖南地方會匪不少現在廣西賊氛未靖湖南境地毗連若會匪潛相勾引所關非細著程喬采卽行馳赴湖南督同文武大員於要隘處所加意防堵仍不動聲色訪查該省會

匪實在情形妥爲防備總期弭患未然不可稍涉張
皇致滋事端

上諭內閣曰本日據賽尙阿奏六月初四日馳抵桂林
巴清德達洪阿亦先後馳到所陳覈汰兵勇申明紀
律多購閒謀解散賊黨嚴斷接濟實行團練使賊無
可掠之食無可竄之路籌畫均合機宜該大臣等經
朕特簡畀以重任到粵之始卽能通籌全局條理秩

然深慰朕念著發去黃馬褂二件大荷包一對小荷包一對火鏟一箇賞給賽尙阿祇領黃馬褂二件分賞巴清德達洪阿祇領粵西地近瘴鄉時當炎暑現值用兵之際朕念軍士勤勞馳驅用命睠懷南服宵旰難忘惟望迅掃賊氛俾吾民咸登衽席不特該大臣等渥膺懋賞卽文武員弁紳士壯勇亦得共荷恩施用酬勞動朕實有厚望焉

上又諭內閣曰此次一日之間三戰三勝該提鎮等督率有方尙知奮勉所有出力官弁兵壯人等著卽查明保奏候朕施恩陣亡之把總熊士貴著交部照例賜卹

賽尙阿又奏言臣奉

命馳赴廣西辦理軍務荷蒙

皇上天恩飭發內庫銀一百萬兩戶部籌撥銀一百萬

兩江南鹽庫銀六十萬兩計已足可敷用惟軍
旅以糧餉爲急務必須寬爲儲備經臣函致兩
廣督臣徐廣縉於粵海關稅項下截留銀一百
萬兩一俟需用之時由臣奏

聞批解相應請

旨飭下兩廣督臣於關稅項下按季扣存連現在批解
之款統歸一百萬兩之數聽候臣奏明撥解臣

仍嚴飭覈實樽節不得絲毫濫用以重軍儲奏
八

上命軍機大臣傳諭徐廣縉葉名琛曰廣西軍營糧餉
至要必當寬爲儲備以免臨事周章著徐廣縉葉名
琛仍於關稅項下按季扣存連前次已經撥解之二
十萬兩統籌備銀一百萬兩聽候賽尙阿咨撥委解
毋稍遲誤

欽定勦平粵匪方略卷六 辛亥年

七月初二日 丙戌 賽尙阿奏言象州中坪一帶逆

匪探知臣將抵省城於六月初四等日竄回東鄉舊巢並竄擾桂平縣之新墟經烏蘭泰向榮等連日追勦向榮督率楚兵節次轟斃賊匪多名奪獲礮械多件復派總兵經文岱參將成安督帶兵勇跟追於初七日自巳至未開礮轟擊

斃賊數十人又經象州知州余思詔豫伏壯勇
將竄入金雞村之賊匪轟斃二十餘人生擒五
人奪獲大礮鉛藥槍矛各件初八日賊越嶺分
走小路兵壯施放槍礮連斃多匪至初九日我
軍進徧東鄉復斃賊數十人烏蘭泰督放火箭
該匪仍敢冒火乘勢反撲向榮策馬當先手執
烏槍擊斃執旗賊二人適因坐騎中礮守備蔡

應龍卽時換給馬匹該守備步行短兵接戰立斃賊匪三人潮勇趕到接應復轟斃賊數十人內有驍勇過人者手執短刀搶上山梁連斬數賊該匪敗走兵勇乘勝追殺復斬獲首級十餘顆奪獲礮械甚多該匪敗回村內困守不出現仍相機進剿所有出力各員應請先行獎勵

賽尙阿又奏言巨黨何名科等糾邀夥黨五六

千人踞住信宜縣安鵝地方距北流縣境四五
十里四出焚掠抗拒官兵經署北流縣知縣阮
正惠召募丁壯並疊諭各里團練齊心堵禦五
月十三日探有賊匪二百餘人竄入新豐等處
經外委石中寶巡檢鄭際昌率丁壯督捕團總
監生蒙禮和梁中奇岑春元等率領練丁及各
團丁壯協同圍擊殺賊二十三名生擒五十三

名奪獲礮槍刀矛多件是夜又有賊匪三百餘人竄至文頭嶺等處經團總監生廖英陳廷彬等分率練丁施放槍礮轟斃賊匪三十三名餘匪潰竄千總黃遇陞復帶兵壯協攻擊斃賊匪二十二名生擒四十五名奪獲礮械多件該匪逃竄復經太平約團長監生麥燦榮等帶同練丁截擊生擒三名典史施元協同窮追各匪落

崖跌澗者甚多計先後疊次殺賊多名生擒一
百餘名會匪凌十八踞東省化州平定墟距北
流甚近聞安鵝逆匪挫衄卽於十三日連夜逃
遁臣飭各文武奮力追勦務期弋獲奏入

上命軍機大臣傳諭賽尙阿巴清德達洪阿烏蘭泰向
榮曰逆匪由象州回竄東鄉自係畏懼聲威負嵎走
險第恐其南合凌十八等股匪則黨與更衆勦辦尤

爲棘手該大臣等當設法誘其出巢併力攻勦務須
前截後追勿令勾結蔓延現在新調官兵計可全數
抵粵應如何調遣防勦之處朕亦不爲遙制此次賊
匪竄回舊巢究係分作幾股仍須防其聲東擊西誘
我南向乘虛北撲致我兵又成尾追之勢是爲至要
上諭內閣曰此次賊匪因北路嚴堵竄回舊巢向榮節
節追擊屢有斬獲繼復奮勇衝鋒身先士卒實屬壯

往可嘉著加恩賞還花翎守備蔡應龍奮不顧身勇
往殺賊殊堪嘉尙著以都司儘先補用其驍勇過人
之潮勇並著查明請獎管帶潮勇之捐職主簿陳登
仕著賞戴藍翎象州知州余思詔應變知機頗有才
略著以應升之缺卽行升用

上又諭內閣曰署北流縣知縣阮正惠於大股賊匪入
境官兵未及應援之時督率鄉團疊次獲勝實屬認

眞出力使各處團練均似此得力何難迅掃羣醜耶
阮正惠著以應升之缺卽行升用以爲力行團練者

勸

初九日癸巳雲貴總督吳文鎔雲南巡撫張亮基

奏言雲南廣南府三面界連粵西先經臣等飭

屬嚴防四州下洵有西林縣賊匪二百餘人竄

至距府城一百五十里之者孟上下兩寨地方

激擾當經兵勇勦捕格斃十八名生擒五名餘
匪潰逃仍竄回西林縣境地方居民尙未被其
蹂躪但滇粵犬牙相錯必須嚴加堵截方不致
越境蔓延臣等現已添兵防守奏入

上命軍機大臣傳諭吳文鎔張亮基喬用遷曰粵匪竄
入滇省廣南府境經該督撫飭兵勇捕勦並添兵防
守著卽嚴飭地方文武於交界要隘實力查拏毋稍

疏忽雲南既有粵匪竄擾貴州各屬毗連處所尤爲
喫重並著喬用遷於黔粵交界一律嚴防

十六日庚子賽尙阿奏言新墟大股賊匪賊首章

政卽在其內後路東鄉之賊係馮雲山爲首已

翻入紫金山連日據烏蘭泰呈報於六月二十

七日巳刻進兵令經文岱張敬修等由馬鞍嶺

雞公嶺進攻新墟莫村東面令李能臣王錦績

等由新羅塘甕窰進攻新墟之東南面令上瑤
十八村團練一千餘人進至羅旺過河直撲新
墟聽護甲地方號礮火箭爲號烏蘭泰同總兵
秦定三由思盤過河並知會李瑞王夢麟等嚴
堵古城坳鵬化隘口以防賊竄嗣查明護甲地
面積沙壅聚可以淺涉其地卽莫村賊巢後面
繞出其背正可攻其不備而思盤亦不可不防

烏蘭泰自率兵勇由護甲潛行過江二十七日
甫經接仗匪卽退走烏蘭泰豫知彼處有竹圍
村竹木叢雜最便埋伏先令秦定三伏兵其處
果見賊匪由竹圍村對面平岡蠶擁而出直趨
竹圍秦定三用礮攻打一食頃聞賊屍徧地餘
匪被殲無算趁勢窮追匪徒拌死回鬪凡七次
烏蘭泰激勵兵勇愈戰愈奮直至莫村巢穴又

殲匪數百名而新墟伏匪仍出接應除四散奔竄外全數遁入新墟因天已昏黑勢難猝破各兵勇鏖戰一日飢疲實甚並防匪徒乘夜詭謀姑撤兵回營計共殲匪二三千人此二十七日連次獲勝情形也達洪阿所帶之兵於二十八日可抵潯州一俟生力弁兵會合接仗再圖進

剿

賽尙阿又奏言六月十一日賊匪二千餘人由
思盤搶渡被團練擊退復由盤龍河偷渡李孟
羣會商守備李進榮帶兵堵截下游立卽親帶
練丁八百餘人馳赴盤龍水口見韋政手執白
扇其餘頭目均執黃旗吶喊而來李孟羣督飭
壯丁連放巨礮自巳至申斃賊四十餘人次日
該匪又欲偷渡守備李進榮督同把總劉正林

帶領兵壯抵擊適左江道楊彤如暨潯州府張其翰添派壯勇均已到齊十三日該匪二千餘人在田坡排列旗礮分伏竹林我兵四路並進放礮夾攻賊匪立腳不住退入上萸村拋棄槍礮紛紛逃竄各兵勇奮力勦殺斃賊一百餘名生擒賊匪二十餘名奪獲數百斤大礮二位大小擡礮子母礮三十七件藤牌刀矛不計其數

該署令李孟羣帶領壯勇勦捕多匪實爲出力之員合無仰懇

天恩將該員以知府并用先換頂戴守備李進榮把總劉正林以應升之缺升用以示鼓勵

賽尙阿又奏言准撫臣鄒鳴鶴咨據革道林士傅稟稱逆匪曾亞涓等餘黨一由粟塘連山逃去一仍竄賀縣都江流沖一帶該道由官潭移

紮賀縣催督各路兵勇合力剿堵該匪不能藏
匿於五月二十日翻山出川洞口欲過河竄往
大凝經富賀營兵勇分投堵禦遂竄往沙黃牛
角寨附近連山境界各兵勇復登崖涉澗分路
追捕該匪勢蹙於六月初一日連夜翻山竄出
桂嶺偷渡過河兵勇追躡初二日在格思營楓
木腳等處疊將該匪痛剿擊斃五十餘人生擒

二十餘人餘匪往里松黃田一帶奔竄其由粟塘逃去一股據該革道轉據懷集縣張凱嵩等稟稱首匪曾亞涓已於六月十五日在廣甯縣之扶溪口地方就獲並獲夥黨十餘名業經廣甯縣審解臣查曾亞涓一犯前與溫大貨五糾合羣匪竄擾兩省拒捕戕官罪惡已極五月內溫大貨五一犯已獲茲該犯亦復就擒餘匪搜

除殆盡辦理尙屬得宜該革道林士傅前奉

諭旨留於軍營差遣仍查明能否得力據實具奏茲查

該革道歷辦情形尙知奮勉臣與撫臣鄒鳴鶴

面商意見相同現當潯梧各屬勦辦需人之際

賀懷等處漸臻安謐擬令該員帶勇前往梧州

防勦合無仰懇

天恩賞給五品頂戴以資彈壓

賽尙阿又奏言粵匪自洪秀泉等大股而外劉八一股衆至逾萬積年竄擾廣西博白縣及廣東合浦縣交界等處地方茲據博白縣升任知縣游長齡會同前任黎平府知府朱德遂合詞稟稱劉八股匪自竄沙河經廣東官兵大創之後復由花石竄走野鴨塘等處該升縣等督率練壯追捕至松山龍潭等處賊首劉八由合浦

公館墟一路逃竄又由台浦沙堡墟渡江潛往
龍門等處逃竄當派生員王汝諧等帶領壯練
前往追捕旋據探役密稟劉八之妻李氏抱其
幼子藏匿合浦博白交界之東埔山內當飭職
員游居誠帶領壯練密速搜捕十七日在東埔
竹殼嶺搜獲劉八之妻與其幼子並獲隨行賊
匪四名又據王汝諧等同稱劉八逃往合浦北

塞墟左近地方已被東省鄉勇盤獲解赴合浦
縣審辦統計此次續報各處練壯殺賊五百三
十餘名生擒著名賊目及僞先鋒等多名就地
正法其劉八之妻李氏與其幼子收禁聽候辦
理臣查劉八滋事以來煽惑萬眾竄亂東西兩
省屢經拒敵戕害官兵罪大惡極該升縣同在
籍知府朱德璣董率紳民練勇幸賴東省官兵

會同攻擊得以掃穴擒渠將此大股賊匪殲除
淨盡委員道銜前任黎平府知府朱德璣及該
升縣游長齡辦理均屬認真相應請

旨一併賞戴花翎以示鼓勵再該縣團練最爲得力現
當通省舉行團練之際合無仰懇

天恩准將肇慶府知府游長齡開缺作爲卽補知府暫
留廣西辦理團練及勦捕善後各事宜均有裨

益奏八

上命軍機大臣傳諭賽尙阿巴清德達洪阿烏蘭泰向
榮曰東鄉新墟大股會匪經烏蘭泰等督帶弁兵分
路進攻一日之間連獲七勝殲賊二三千人賊鋒大
挫該大臣調度有方烏蘭泰督率在事文武謀勇兼
施從此乘機痛剿何難剋日殲除烏蘭泰於獲勝回
營後次日當已進兵向榮由後路攻入達洪阿所帶

之兵亦可馳到諒已續獲全勝奏報在途矣會匪韋
政係屬渠魁必當設法殲擒勿令免脫至馮雲山爲
東鄉賊首現在竄入紫金山恐其翻越滋擾尤當趕
緊兜截毋使逆燄復張其劉八曾亞涓二犯業經廣
東擒獲惟凌十八一股逃至化州平定墟地方兩省
文武現在如何勦辦著卽飛咨東省合力會勦此股
亦係著名兇狡會匪卽當趁此殲擒勿留餘孽

上諭內閣曰此次進剿大股賊匪一日連獲七勝共計
殲賊二三千人烏蘭泰紀律嚴明將士用命殊堪嘉
獎著加恩賞戴花翎秦定三設伏制勝能破詭謀著
賞還花翎六月十一日賊匪二百餘人由思盤搶渡
被團練擊退復由盤龍河偷渡守備李進榮帶領兵
丁堵截下游李孟羣親帶練丁八百餘人馳赴該處
督飭壯丁施放巨礮自巳至申共斃賊四十餘人十

二日該匪又欲偷渡守備李進榮把總劉正林帶領
兵壯擊退左江道楊彤如等派員弁兵壯分投布置
十三日該匪二千餘人排列旗幟我兵四面夾攻殺
賊一百餘名生擒二十餘名該員弁等防守江路連
獲勝仗俾賊匪不能渡河南竄均屬奮勉出力題補
南甯府同知署桂平縣知縣李孟羣力疾從公尤堪
嘉獎著以知府升用先換頂戴守備李進榮把總劉

正林均著以應升之缺升用賽尙阿甫到軍營卽將
大股會匪痛加勦洗將士等亦各奮勇圖功實足以
揚軍威而禡匪魄現在水陸兩路均已連次獲勝四
面嚴堵賊匪無路可竄正可乘勢一鼓作氣掃穴擒
渠迅奏膚公以副朕望

上又諭內閣曰逆匪曾亞涓竄擾兩省經已革道員林
士傅分飭文武帶領兵勇疊次追勦斃賊多名復轉

據懷集縣報在廣甯縣扶溪口地方將逆匪曾亞涓
擒獲此次兩省合剿首犯就擒餘黨搜捕殆盡該革
道等辦理尙爲奮勉林士傳著賞給五品頂戴飭令
前往梧州防剿

上
又諭內閣曰逆首劉八連年竄擾廣西博白縣及廣
東合浦縣交界地方經知縣游長齡等董率紳民練
勇與廣東官兵合力兜拏將著名賊目及僞先鋒等

拏獲又拏獲劉八妻子至逆首劉八已由廣東合浦
縣擒獲該逆首屢次煽衆抗拒戕害官兵罪大惡極
茲經兩省文武紳勇會同攻勦將此大股一旦殲除
洵足伸國法而快人心游長齡辦理團練認真出力
朱德璣率領有方均著加恩賞戴花翎游長齡業已
升任廣東肇慶府知府著開缺作爲卽補知府留於
廣西董辦團練及勦捕各事宜其廣東合浦縣拏獲

劉八係屬何人並著徐廣縉等查明具奏候朕一併
施恩

十八日壬寅徐廣縉葉名琛奏言會匪凌十八一

股由西省竄回信宜之懷鄉墟經總兵楊昌泗
知府胡美彥於六月初五初七等日兩次進剿
殲擒百餘名焚燒賊巢十餘間因賊衆兵單未
能痛加剿洗現在飛調潮州兵勇及提標各弁

兵親往督勦以期迅速撲滅奏入

上命軍機大臣傳諭徐廣縉葉名琛曰凌十八一日不除則韋政得藉資接應西省勦辦亦難得手且尙有何名科一股首匪未獲一經嘯聚勾結必至蔓延該督現旣飛調潮州兵勇及提標各弁兵親往督勦務將各股迅速撲滅總期於兩省毗連處所嚴飭文武分堵夾攻不得再令該匪東西竄擾該督現駐高州

一帶所有剿辦一切情形諒已隨時知照賽尙阿和衷妥辦不誤機宜也

徐廣縉葉名琛又奏言廣甯甯駭匪曾亞涓經潮州兵勇痛剿分股逃竄該匪竄入粟塘裏脅甚衆署肇慶府知府李敦業護新會營參將衛佐邦等率領兵勇由懷集一帶馳抵陽山縣交界之馮公廟地方時曾亞涓屯聚橫石墟該員弁

卽於六月十三日黎明進剿該匪故作疑陣分
路抗拒衛佐邦督飭弁兵分作兩隊先後進發
繞至墟外施放連環槍礮轟斃一百十二名生
擒三十四名各匪退回墟內我軍義憤同心倍
加驍勇該匪力不能支盡從後路翻山竄逸兵
勇分途窮追殺斃四十八名生擒二十一名並
據分路嚴防之陽山縣營報獲一百十名廣甯

縣營報獲一百十五名分派守隘各文武亦各
陸續報獲二三十名至四五十名不等該匪曾
亞涓自橫石墟敗後奔竄無路經李敦業督同
署廣甯縣知縣程兆桂並該管營汎帶領兵勇
於十七日在廣甯之扶溪地方將會亞涓及夥
黨十一名擒獲並另股糾夥之曾土生等亦先
後全行拏獲其竄入都江各匪復經前廣西鹽

法道林士傳搜獲殆盡奏入

上諭內閣曰賊匪曾亞瀉竄擾兩省閱時已久茲得掃
除淨盡洵足以伸國法而快人心該督等督飭地方
文武合力協勦辦理實屬認真所有在事出力文武
各員著卽查明保奏候朕施恩其節次陣亡弁兵壯
勇一併查明交部議卹

二十五日酉己
賽尙阿奏言伏查粵西軍務大局

實由將帥各執己見賞罰既不相謀功罪何由
得當周天爵人本懇直惟多率意而行毫無區
別之處衆心益難傾服辦理更覺掣肘卽如烏
蘭泰所奏獨鼇山南先勝後敗一節查閱周天
爵及烏蘭泰原奏其所敘情節前後詳略不無
舛漏以臣所聞係該匪壅流設伏計誘官軍烏
蘭泰乘勝前追催令馬善寶等率兵徑渡墮賊

奸謀以致官兵二百餘人死於鋒刃者十之二
死於湍流者十之八烏蘭泰目睹輿尸欲以身
殉中情痛迫不爲無因然輕進失機究與臨陣
退縮有閒似亦毋庸深究惟威甯鎮七賊撲營
千人潰敗一節現經密訪該總兵重綸實係先
期患病在象州城調養尙無規避情事是日撲
營賊匪分股前來實有數百俟佟攀梅慶祿到

案其前後情節不難嚴究務期水落石出以服
衆心又提督向榮所帶湖南弁兵初到粵時連
獲勝仗向榮所用黑旗逆匪望而退卻以臣訪
聞向榮每得一勝仗每兵賞銀一兩其時帶兵
尙少及李星沅到時謂其難以爲繼令減作三
錢軍中譁然誓不出力後雖改回一兩而兵心
已渙竟難復振至向繼雄保舉一節聞係同營

將弁公呈求李星沅保奏並非向榮之意其後來不聽號令之故不係乎此現在湖南兵丁業經臣札飭挑選已分別病弱者一千餘名令卽撤回歸伍重綸所帶黔兵派赴南太隨勞崇光勦捕顏品瑤大股匪徒六月二十七日新墟之役如秦定三李能臣經文岱等均能同心戮力設計用伏使逆匪大受懲創可見各營將弁皆

具有天良並非不願殺賊立功伏思已往情節
諮訪既難得實誠恐少有偏聽仍蹈前轍矧當
各文武振厲精神馳驅用命之際一予糾察則
衆情疑惑人人有自危之心兵機所關誠非淺
鮮以臣愚見惟有仰懇

天恩自臣到粵之日起所有從前不遵調度各情及漏
未叅劾之處一概寬其既往若復狡猾推諉坐

失事機臣欽遵面奉

嚴旨凡歸臣節制之員一面奏聞一面卽於軍前正法
以肅軍令

賽尙阿又奏言前次中坪大股賊匪始意竄窺
伺省城因兩次北撲受創遂乃翻山南竄惟省
城並無多兵僅恃募勇團練近日盤獲奸細知
荔浦陽朔一帶均有匪徒勾結又湖南與粵西

接壤之區屢有匪徒出沒再四籌思惟臣暫駐
省城藉坐鎮之勢消羣逆之萌使大股賊匪不
敢北窺桂林宵小之潛伏者亦不敢狡焉思逞
且就近與撫臣鄒鳴鶴商辦一切事件似較妥
便

賽尙阿又奏言查逆匪前股分駐新墟安衆莫
村盤龍一帶韋政胡以洸蕭潮潰楊秀青在內

後股在紫金山內花雷茶地大坪村等處洪秀
泉馮雲山在內其後路雙髻山頂有賊扼要屯
聚最後豬仔峽有賊守險並有屯糧其開山勢
陡險該匪於各要口挖斷路徑壘石架木設柵
堵守烏蘭泰等兵勇分爲西路東路均在紫金
山前提督向榮等兵勇在紫金山後烏蘭泰先
期知會各路於六月二十七日進兵並知會向

榮撥兵赴山放礮以亂山內賊勢是日烏蘭泰
督兵勇一千五百餘名由護甲間道涉淺渡河
嚴整隊伍前進該匪大隊退回忽聚忽散遙見
林內伏賊亦忽出忽入秦定三兵已由竹圍村
南來漸至第二竹林後烏蘭泰卽令在林後整
隊豫備其時莫村北邊及大莫村東南房屋已
爲火箭焚燒另股賊五六百人奔入竹林欲抄

我軍兵勇連放槍礮打傷無數其南邊另股已入兩林之間秦定三兵由南林後迎出槍礮齊發該匪前隊俱倒後隊飛奔其落後者均已刺斃此烏蘭泰進兵大勝之詳細情形也總兵李能臣於六月二十七日五更出隊會同王錦繡由白鳩石角一帶前進離干村四五里該處有溪河二道兵練涉淺而過將及岸西該匪數千

續擁撲來李能臣飭兵練伏任勿動連施槍礮
該匪紛紛倒地自己至未斃數百人該匪敗回
干村李能臣親督將弁燒燬該匪哨樓一座該
匪伏竹林放礮滇黔兵兩路夾攻該匪不能藏
伏敗回三里村官軍奮勇直攻該匪分三股迎
敵自申至酉該匪敗退新墟我兵進攻天已昏
黑當卽撤回此李能臣進兵獲勝之詳細情形

也經文岱亦先接烏蘭泰知照於二十七日會
同張敬修督帶兵勇出隊至古埽村有古秀河
一道不能涉渡逆匪數百人對河拒敵兵勇齊
放槍礮擊斃多名賊卽退去經文岱等立飭兵
練砍竹木紮箒二十餘架用作浮橋兵勇如履
平地過河離新墟四里許見蔗田一帶足可埋
伏遂密與張敬修分伏蔗林飭弁兵前往新墟

誘敵良久賊出二千餘人我兵詐退賊果涉水
來追我兵且前且卻誘至蔗田伏兵盡起奮力
攻擊銳氣百倍自午至申斃匪數百人時有辦
理雲南糧員署武宣縣陳寶運糧到陣按兵散
給軍士騰歡此經文岱獲勝之詳細情形也是
日向榮亦出隊至雙髻腳該處左山右水羊腸
險峻一起一伏兵壯連爬三嶺計十餘里該匪

鳴角放礮滾石阻我陞路官兵亦開大礮轟擊
相持一時許山勢過陡不能攻入二十八日向
榮親督兵壯移偏山角至屯應村紮營差人上
山攀藤附葛直上山顛並派令陳瑞芝帶潮勇
入山探路連燒賊棚五處砍倒木棚五座直探
至豬仔峽該處兩山並峙中通一綫十分陡險
該匪先將大石塞路我兵仰攻人力難施另覓

路徑以圖進剿此向榮連日進攻紫金山後路
之詳細情形也伏查此股賊匪自中坪新寨回
竄以來盤踞紫金山內花雷等處前以新墟爲
門戶後以豬仔峽爲門戶現在前路烏蘭泰等
雖獲大勝而新墟卽日未能攻破後路向榮雖
連次進攻而豬仔峽山勢陡隘亦未能奪獲現
在達洪阿統帶川兵業已到潯不日卽當與烏

蘭泰會合巴清德亦白象州帶川兵前進計日
可與向榮會合臣仍隨時嚴飭各路文武將弁
相機度勢務期迅速肅功所有紫金山前後兩
路攻勦會匪均屬奮勉烏蘭泰謀定後戰號令
嚴明應請

賞戴花翎秦定三奮兵接應斬獲甚多應請

賞戴花翎李能臣王錦繡相機會勦屢挫賊鋒經文岱

張敬修設計用伏燒燬賊巢尤爲善於用兵應
請

旨交部從優議敘向榮應期攻勦督率有方應請

旨交部從優議敘陳瑞芝連破五寨勇往可嘉應請

賞戴花翎署武宣縣陳寶以糧食分給兵丁應時之需

極爲得濟應請

旨交部議敘奏入

上命軍機大臣傳諭賽尙阿曰紫金山大股逆匪經官
兵四面堵逼勢漸窮蹙自應隨時合力進攻該大臣
仍駐桂林扼其由大樟北竄之路所見甚是但恐兵
力厚集前後夾攻之際該匪勢窮鋌險拌死突奔凡
北面山嶺險隘之地固屬緊要其南路通江各渡口
尤宜嚴加堵截勿任竄突至糧鹽爲賊匪要需必當
設法斷其接濟此時大兵會合節制嚴明蠢茲小醜

定必一鼓殲除餘匪自望風瓦解朕日盼捷音之至也至節降諭旨查覈前此各文武功過據奏現當用人之際姑寬既往儻能協衷集事奮勇圖功所有從前不遵調度及漏未叅劾之處卽可毋庸深究所論亦合機宜均著照所議辦理

上諭內閣曰此次紫金山前後兩路攻勦會匪在事文武實屬奮勉出力除烏蘭泰秦定三業經加恩外總

兵李能臣經文岱副將王錦繡知府張敬修或相機
會勦屢挫賊鋒或設計用伏燒燬賊巢均著加恩交
部從優議敘提督向榮攻勦紫金山後路派候補知
府陳瑞芝率領潮勇連破五柵直抵豬仔峽向榮督
率有方著加恩交部從優議敘陳瑞芝勇往可嘉著
賞戴花翎署武宣縣知縣陳寶辦運兵糧不誤急需
著交部議敘

賽尙阿又奏言六月十二日張國樑馳抵左州
邕侶地方探聽顏品瑤股匪已有分往崇善縣
馱盧永康州那隆谷墟地方竄存於左州村莊
者賊數較爲減少正可乘機進剿時投誠甯正
岡等亦至懶墟距邕侶數十里顏品瑤等匪分
於兩旁山坳埋伏衝出拒敵張國樑率勇極力
衝殺殲斃賊匪多名該匪又從山後突出分抄

官兵來路適甯正岡等由懶墟馳來接應橫路
突出用礮轟死賊匪多人賊見援兵大至方行
敗退張國樑勇往撲賊深堪嘉尙甯正岡投誠
效用接應不誤亦屬奮勉相應請

旨將候補千總張國樑准以千總卽補投誠甯正岡准
給軍功六品頂戴俟續有功績再行擢用以示
鼓勵奏入

上諭內閣曰候補千總張國樑等帶領兵勇馳抵左州
邕侶地方探聽顏品瑤股匪業已分竄當卽乘機進
剿該逆等埋伏抗拒經張國樑率勇衝突殺斃多名
並投誠效用之甯正岡等擊敗賊匪均屬出力張國
樑著以千總卽補甯正岡著賞給軍功六品頂戴以
示鼓勵

欽定勦平粵匪方略卷七 辛亥年

八月初一日 乙卯 賽尙阿奏言逆匪竄踞紫金山

前以新墟爲門戶後以豬仔峽雙髻山爲門戶
負嵎恃險疊經分飭各營相機進勦旋於七月
十九日據達洪阿烏蘭泰咨報初十日卯刻進
兵豫期知會總兵李能臣副將王錦繡帶兵勇
一千七八百名由新羅塘等處攻新墟東南總

兵經文岱等同署道張敬修帶兵勇二千餘名
由馬嶺等處攻新墟正東署總兵李瑞王夢麟
撥兵八百於新墟之東北截擒逃匪達洪阿督
兵過思盤渡走安樂塘攻莫村之北新墟之西
南烏蘭泰復督總兵秦定三過思盤渡攻新墟
西北並堵紫金山口兼防金田伏賊且戰且進
自辰至未殲斃賊匪約四百餘人賊勢大挫逃

回寨內閉寨不出該匪山內賊巢星羅碁布各處進山隘口均有賊守巴清德與向榮先將山內路徑賊情探明將兩營兵勇分路於十五日寅刻進剿先期密派兵勇由閒道翻山爬嶺乘夜至豬仔峽雙髻山等處各隘口繞賊上路合擊分派總兵劉長清帶川兵四百名由崇響翻山攻豬仔峽參將巴彥布等分帶漢屯川兵義

勇仁勇共一千二百餘名攻冷田黃茅嶺署總
兵松安等分帶皖楚兵八百名攻豬仔峽中路
其餘各要隘分派弁兵潮勇攻擊巴清德統領
京營員弁及漢屯兵勇會合向榮直由中路進
攻該匪於正面山峽內設伏阻截木石並發槍
礮疊施山路險窄我兵致有受傷巴清德催令
兵勇分由兩旁進剿不准退縮我兵奮力直攻

峽穴賊匪退後進至要口斃賊甚多當將猪仔
峽要口奪回其雙髻山賊匪見我兵占據隘口
槍礮木石如雨齊發我兵不能直前巴清德傳
令俟賊槍礮放過我兵卽齊心迎擊並派參領
福曜等施放火箭將賊望樓焚燒並轟著火藥
一桶賊始驚惶我軍時已繞出賊後上下夾攻
匪衆逃竄我兵搶上山頂仍飭兵勇窮追該匪

熟悉山徑由小路南竄我兵追三十餘里斃賊不少該逆窮蹙之狀已屬顯然其所以死踞新墟者因晚稻將熟計圖掠穫入山是鵬化大樟二路必須嚴防已派桂平道許祥光募勇堵禦鵬化其大樟一路有總兵李伏長瑞帶兵駐紮

奏八

上命軍機大臣傳諭賽尙阿曰此次進攻新墟達洪阿

烏蘭泰等督率鎮將分路進兵巴清德向榮等由紫
金山後路越嶺前進攻克豬仔峽連破雙髻山險隘
要口一日之間進占山頂又復窮追深入斬戮多名
賊匪已失負嵎之固我兵據險臨高勢若建瓴事機
極爲得手惟地處險要賊必拌命爭拒我兵固當乘
勝進攻尤當防其抄襲後路務須步步爲營聲勢聯
絡庶期計出萬全豬仔峽爲賊匪屯糧之所今旣攻

破該匪勢更窘迫惟現當早稻登場難保不意圖搶掠自應迅速合剿斷其糧食使賊進無可掠退無可守我兵奮力殲擒居民亦可乘勢縛獻相度機宜時不可失至鵬化花洲大樟等處山徑紛歧恐賊匪窮極回竄且路通平南一帶我兵現在前後圍攻新墟逆首韋政洪秀泉馮雲山等均在圍中若不嚴防竄路即使掃穴恐未能全獲渠魁該大臣已先見及此

必能加意防堵淨絕根株也

上諭內閣曰此次進剿新墟賊匪獲勝並攻破雙髻山
要隘十五日我兵搶上雙髻山頂該匪已失負險之
勢現在大兵四面會合釜魚檻獸定當一鼓成擒賽
尙阿調度有方將士用命著發去御用黃辮珊瑚豆
大荷包一對珊瑚松石豆小荷包二個四喜白玉搬
指一個小刀一把火鏟一個交賽尙阿祇領巴清德

向榮紀律嚴明身先士卒均堪嘉尙巴清德著賞加
軍功三級向榮著開復降三級留任處分仍賞加軍
功一級並著各賞給大荷包一對小荷包一對白玉
搬指一個小刀一把火鏟一個交巴清德向榮祇領
總兵劉長清首先帶兵攻入豬仔峽尤爲奮勇著賞
換花翎達洪阿烏蘭泰及各鎮將等圍攻新墟均能
同心勦力奮勉爭先現已奪據山後要隘勢若建瓴

前路攻勦自更得手計日掃穴揜渠卽當同邀懋賞
所有在事出力文武員弁著該大臣查明保奏候朕
施恩

初二日
丙辰

上諭內閣曰湖南正當防堵喫緊丁憂提督余萬清現
駐江華熟悉地方情形著暫留湖南辦理防堵事宜

初三日
丁巳徐廣縉葉名琛奏言廣西博白縣賊

首劉八白竄回西省後糾衆至七千餘人往來
肆擾臣等飭令提督陶煜文升任高廉道宗元
醇督率署廉州府知府沈棣輝及文武各員激
勵兵勇不分畛域越境痛勦於六月初四日分
三路進攻該匪膽敢恃衆抗拒我兵所向無前
殲擒千餘人追至沙河墟前羣賊傾巢而出陶
煜文臨陣指揮將弁兵勇復殲賊五百餘人賊

黨四散奔至花石山隘口負嵎拒守我軍攀援奮擊無不應手輒倒計先後殲獲有數千餘名之多奪獲器械無算嗣探知劉八同吳晚等竄回合浦白沙公館等處陶煜文與沈棣輝於初七日由沙河至合浦之旱禾埔該匪仍敢抗拒將弁兵勇合力攻擊不令竄越是日斬殺淹斃及團練格殺共七百餘名生擒一百十名劉八

率領餘黨由黃垌根渡水欲逃至武利沈棣輝
先後探知蹤跡稟報陶煜文宗元醇派令文武
率領兵勇於初八日追至武利之南岸墟左右
前後分兵夾擊擒獲頭目劉八之弟劉九及頭
目唐晚並生擒僞先鋒張六僞軍師張五復購
綫拏獲賊目吳晚阮晚周二等多名三次疊獲
勝仗賊黨芟夷殆盡劉八勢孤竄匿沈棣輝飭

令代理廉州府經歷謝效莊署合浦縣事顧駿
諭知團練四面兜圍於十六日至分頭嶺督同
鄉練在垌內將劉八孛獲解郡兵民無不稱慶
洵足以伸天討而快人心奏入

上諭內閣曰廣西博白縣逆首劉八肆擾兩省閱時已
久其夥黨剽悍尤爲猖獗茲於交界地方生擒巨憝
餘匪勦洗一空實足振軍威而伸國法該督等督飭

文武越境攻勦俾地方漸臻救靖殊堪嘉獎提督陶
煜文升任高廉道宗元醇均著交部從優議敘署廉
州府知府沈棣輝應變知機尤爲出力著賞戴花翎
並交部從優議敘顧駿謝效莊及鄉練等拏獲首逆
奮勇可嘉著該督撫同在事文武員弁一併酌量保
奏候朕施恩

十五日
己巳

上命軍機大臣傳諭賽尙阿曰現在廣西重兵自以圍
攻新墟殲滅大股爲要是否尙能分兵南太一帶協
辦勞崇光現駐該處所帶兵勇是否足資調遣著該
大臣飭令該司悉心體察隨時稟明酌辦徐廣縉督
辦羅定州凌十八一股巨匪已飭陶煜文等督帶潮
州兵勇於欽州扼其要隘未知能否越境會剿太平
一帶兵力空虛亦屬可慮想該大臣已與徐廣縉通

盤籌畫計出萬全也至金田新墟逆匪前已四面堵
截奪其後路要隘賊勢已形窮蹙行軍制勝惟在相
其緩急不失事機或重圍進逼聚而殲旃或設伏誘
擒出其不意總須謀而後動正不必急於見功此股
會匪一經殲滅即可移兵南太一帶勢如破竹朕盼
望情殷惟冀該大臣蕩寇安民至軍行一切遲速機
宜亦不爲遙制也

十六日庚午賽尙阿奏言副都統達洪阿名望素

著向深知其忠勇乃此次帶兵進勦新墟每遇
接戰不待兵勇整束齊備先已乘馬獨出實能
不避鋒鏑而於隊伍步伐毫無計畫以致所帶
京川各營弁兵多有傷挫若非烏蘭泰秦定三
處處援應則屢瀕於危且性太剛褊於弁兵時
加怒詈賞罰無紀號令不明軍心俱已渙散若

不及早調度難免兵潰之虞臣夙夜籌思欲行
叅奏則其人並非退怯欲行撤回則其勢必至
決裂適接達洪阿來函現因患病請派大員接
帶官兵以便隨營調理臣因令其赴潯州府城
調理將所帶弁兵移交烏蘭泰管帶於軍事大
有裨益又慮其痊愈後復欲帶兵臣禁之無名
用之不可儻蒙

召令回京當差既可全其身名又可整肅軍伍奏入

上諭內閣曰達洪阿自到廣西軍營以來奮勇勦賊不
辭勞瘁以致舊疾復發朕心實深眷念著毋庸仍留
軍營即來京安心調理病痊照舊在京供職

二十五日己卯賽尙阿奏言據烏蘭泰等稟稱自

移營三合水探聞山內之賊全數逃出巴清德
等約令二十八日前後同進烏蘭泰由下窰過

河見小村內有賊搖旗卽回過河北派署副將
清長帶黔兵過河面西排列商令秦定三率參
將巴圖帶廣東兵四百過河面南排列河內有
沙岡一道派楚黔兵埋伏接應分布已畢四面
賊匪盪擁千餘離黔兵不及半里見我隊伍齊
整持槍不發退避南邊林後遙見西面林內亦
有伏賊西南兩林高坡突出賊匪約五六百名

直撲湖北隊香山勇暨湖北兵均開礮轟擊斃賊七八十名該匪退回忽南林繞過五六百賊湖北貴州兩隊勢難支持適張敬修王錦繡兵勇陸續趕到斃賊二三十名該匪始退我兵復追過河匪竄已遠收兵回營二十七日署道張敬修帶東勇及團練在赤土村與賊接仗斃賊數十名生擒數名旋又據巴清德向榮稟稱自

督兵深入紫金山查看風門坳兩峯並峙該匪
已將坳口壘石安礮山下小路空斷兩邊山梁
搭望樓及草棚數百間踞守現與各鎮籌商非
三路齊進搶上山梁不能拔此險隘遂派潮勇
爲頭隊四川湖北官兵爲二隊由中路進攻武
生劉孟三等提勇爲頭隊湖南官兵爲二隊由
東邊爬上山梁抄賊之左陶昌培楊瑞乾爲頭

隊廣西官兵爲二隊由西路上山抄賊之右一
面飛致烏蘭泰前路密飭官兵揚旗放礮以分
賊勢初二日三路均銜枚疾走行至山腳一齊
殺進槍礮愈緊該匪棄隘敗走立將風門坳隘
口奪占該匪滾崖死者不計其數追至古調村
外該匪抵死踞守當令兵勇拋擲火彈將村房
焚燬該匪從村後逃走復將賊占各村全行燒

燬已離新墟不遠寅刻巴清德向榮親督官兵
拔營進至平山正在度地紮營探兵飛報賊匪
千餘藏古林社內當卽分撥官兵迎戰長瑞劉
長清親率川楚官兵由山梁橫衝殺入槍礮火
箭斃賊數十人該匪卽由村後逃竄其時烏蘭
泰亦令侍衛開隆阿會同總兵李能臣署道張
敬修用大礮對新墟轟擊將傾巢之賊全數轟

斃約五六百名現在新墟前路自大黃江口及
附近各營並鵬化要隘均經檄飭烏蘭泰處處
嚴防以杜竄逸烏蘭泰營內兵力稍單新到之
四川屯兵八百湖北兵五百經臣飭赴烏蘭泰
營其時尙未能趕到達洪阿現因病請假回潯
養病其所帶官兵臣卽札飭總歸烏蘭泰調度
奏入

上命軍機大臣傳諭賽尙阿曰此次前後兩路進攻賊
巢屢戰屢勝斬獲甚多並經巴清德向榮由後路乘
勝前追將風門坳一鼓奪獲現在我兵逼近賊巢其
前路要隘處所經該大臣分飭烏蘭泰等處處嚴防
並將新到之四川湖北各兵及達洪阿所帶官兵總
歸烏蘭泰調度兵力旣厚防剿更易得手惟賊勢窮
蹙已極困獸猶鬪難保不鋌而走險且該匪狡黠異

常或佯敗詐降疊施奸計亦不可稍涉大意省城重
地防範亦關緊要著該大臣酌量情形如新墟刻已
攻破埽穴揜渠即移兵南下勢如破竹儻一時重兵
未能移撥而左江一帶兵力尙不敷用或於鄰近雲
貴湖南等省再酌調一二千名以資防剿卽一面飛
調一面奏聞

上諭內閣曰此次我兵前路進剿屢戰屢勝後路復乘

勝將風門坳攻破賽尙阿調度有方巴清德烏蘭泰
向榮均能身先士卒屢立戰功深堪嘉獎均著交部
從優議敘所有出力之鎮將文武員弁兵勇著查明
保奏候朕施恩

閏八月初五日 戊子 大學士賽尙阿廣西巡撫鄒

鳴鶴奏言此次軍需自上年七月以來已奉撥
銀五百餘萬兩目前固不虞支絀何敢遽行請

益惟軍務所需不敢不寬爲籌備且粵西地偏
而瘠本省藩鹽二庫無款借墊卽各省指撥有
項而輾轉運解非數月不能到齊儻不豫爲籌
畫臨時恐難免周章惟有仰懇

天恩飭部速籌銀一百萬兩由各該省趕緊委解以資
接濟奏入得

旨允行

賽尙阿又奏言連據烏蘭泰稟報初九日帶同侍衛開隆阿總兵秦定三行近孔村卽聞紫金山口礮響探報向榮已經接仗遂督兵搜探莫村以南俱有礮臺北面三家隴大墩嶺干村一帶均有伏賊古城一帶並有木寨礮臺望樓遂商令總兵劉長清領兵接應秦定三帶兵分路埋伏烏蘭泰督兵居中徐進向莫村放礮該匪

並不回敵官兵遂將大竹園一帶燒燬並燒干
村賊奔新墟我兵直追至墟口初十日烏蘭泰
同開隆阿等帶兵到步安橋一帶度地紮營忽
聞礮聲當卽督兵前進匪終不出我兵焚燒三
家隴木寨突出百餘賊我兵迎敵該匪復退十
一日有匪數十過河劉長清帶兵渡河往捕賊
卽逃回十三日該匪六七百人突至孔村烏蘭

秦帶兵往勦該匪飛奔回巢我兵追至干村放礮轟擊該匪不敢復出孔村練長連報賊匪七八百人由護甲過河南竄烏蘭泰因約巴清德向榮於十四日同時進攻一面分布隊伍一面挖溝築壘該匪一股由新墟撲來一股由莫村撲來當令胡俸伸趙榮升劉長清等分路進攻埋伏烏蘭泰與開隆阿各帶兵接應秦定三在

北面督兵該匪大股分而爲二一撲湖北隊一
由竹林繞撲離半里許卽開槍礮我兵俟其漸
近開放小礮轟倒十餘賊該匪抵死喊撲我兵
用槍礮同擊該匪且戰且退約百餘步復開槍
礮竹林後一股已被慶福伏兵用連環槍擊倒
無數我兵追出竹林該匪亦於林後留賊接應
烏蘭泰見正南喫緊留開隆阿照料西邊調嚴

承恩赴南面接應莫村大股一半撲正南一半
藏大茶亭後其南撲之賊見我兵開槍即轉西
去兩股合撲我兵槍熱藥盡飛將田學韜隊調
來匪不能支復退百餘步站住東南槍聲又緊
開隆阿飛赴接應見莫村之賊復分兩股一被
慶福之兵擊退一衝劉永鈞之隊我兵橫擊該
匪又撲廣東兵隊開隆阿親放鳥槍擊斃二賊

該匪始退入坡下溝內伏身轟打我兵稍退誘之使出其時李能臣張敬修兵勇趕到該匪仍奔溝內我兵下坡追殺該匪及林後各賊聚成一處約四千餘人且住且退北面干村又來一眾約五六百天已陰沈卽令兵勇往北迎擊以便就近撤回不料該匪盡數追來前軍回走已遠烏蘭泰憤極下馬示拌死戰我兵奮勇回軍

斃匪無數匪始敗回我兵追至後嶺是日轉戰
四時之久前後擊斃賊匪三四百名此烏蘭泰
一路自初九日至十四日接仗獲勝情形也又
據巴清德向榮稟稱知會各路官兵於初九日
圍攻新墟先於初八日派兵勇千餘偃旗息鼓
而至拋擲火具匪見火起擁出千餘開礮抗拒
巴清德向榮派兵接應賊占樹林我兵四面抄

出殺死多名賊始遁回新墟初九日出隊分兵
兩翼沿河而進武生王發魁等各帶勇助勢官
兵甫抵吉林社外該匪傾巢而至約三千餘人
分七隊迎出新墟數里開礮副將奚應龍等開
放槍礮逼近轟擊點放火箭射中賊匪望樓登
時燃燒天津鎮長瑞綏靖鎮李伏督兵焚燒賊
村擊死執旗賊目一名斃匪數十名仁勇陶昌

培等正在過河助勦風雨驟至徐徐撤退該匪
冒雨趕來短兵接鬪因雨路滑匪亦未敢戀追
雨止後聞東面礮聲知是烏蘭泰打仗隨又派
兵接應天晚復雨亦卽撤回初十日探報賊匪
數千領巢而出直撲大營卽飭鎮靜以待瞥見
左山脊有騎馬賊五人黃旗十餘桿賊匪分踞
山梁開礮轟來右山梁一股約二三百人搖旗

助勢巴清德向榮卽令提勇上山截其去路又
派兵勇由營後上山助威各股賊匪攻湖南營
盤當卽派陳瑞芝等帶兵勇分擊迎敵短兵相
接斬首三十餘顆直追至古林社始行撤回十
三日烏蘭泰出隊至古林社該匪數千早伏新
墟外之擋牆內卽督兵直前攻勦該匪倒地不
少相持四時之久匪終不出傍晚收兵此巴清

德向榮一路自初八日至十四日獲勝情形也
查此股賊匪自竄出紫金山之後經兩路連日
圍攻勢已窮蹙但新墟地勢竹木茂密溝塍極
多該匪復密設木壘礮臺築牆固守一時未能
攻入訊據獲賊供稱現在拆取房屋竹木紮造
箠筏冀由石嘴渡江南竄因令南路水勇撥船
防堵並派委員陳瀚在石嘴一帶巡邏此股賊

匪若南竄過江不惟桂平等處大遭蹂躪且搶掠裹脅勢必復煽其東北鵬化一路爲賊舊巢前已令署總兵李瑞王夢麟帶兵勇在占城坳埋伏經文岱帶兵在鄧塘水埋伏復經烏蘭泰撥兵勇接應其鵬化里內七十餘村已飭居民將積穀搬移臣親晤該處紳士面加激勸咸知鼓舞山內猺勇亦志切同仇即使新墟驟難攻

破該匪糧盡思逃石嘴大黃江處處埋伏斷難
飛越而鵬化一路業經密爲布置我兵前伏後
追較之困圍死鬪尤易爲力查烏蘭泰嚴密聯
絡設防鵬化等處又復晝夜進攻新墟辛苦已
極應請

賞換頭品頂戴二等侍衛開隆阿督率官兵身冒矢石
亦屬壯往應請

賞給頭等侍衛先換頂戴所有出力員弁兵勇俟查明再行保奏傷亡弁兵亦卽飭造冊咨部議卹

賽尙阿又奏言據探新墟賊匪爲前後各路官兵攻逼已極於十六日夜越嶺思竄經平南團練及東勇橫截衝殺我兵追及四面圍攻晝夜轟殺新墟攻圍似更得手奏入

上命軍機大臣傳諭賽尙阿曰此次雖連日獲勝究未

大加懲創現據訊供該匪有由石嘴渡江南竄之信
自應分派兵勇堵禦惟該匪詭譎異常難保不聲東
擊西其東北鵬化一路經該大臣激勵該處紳士及
山內騫勇均已志切同仇並經烏蘭泰派兵前往接
應儻該匪窮蹙竄出必能會合兜撿新墟賊匪紛紛
爬越後路高嶺逃竄現經兵勇衝殺圍攻該匪股數
衆多恐其分路牽掣我師尤當防其詭計兵貴神速

當此乘勝之時正可一鼓作氣掃蕩賊氛固不可急
遽貪功亦不可遷延誤事

上諭內閣曰前後兩路官兵疊次進剿新墟賊匪窮蹙
已極正可乘此軍威揜渠埽穴烏蘭泰身先士卒有
膽有識殊堪嘉尙著賞給都統銜二等侍衛開隆阿
奮勇可嘉著賞給頭等侍衛所有連日攻剿出力文
武員弁兵勇著查明保奏傷亡弁兵查明咨部議卹

十三日丙申賽尙阿奏言逆匪被困新墟鹽糧將

盡初紮竹籐本欲由南淶石嘴潛往貴縣鬱林等處勾結因沿河防禦甚嚴十六日夜遂放火燒新墟一帶村舍擁衆由大簡翻山奔向鵬化花洲一路烏蘭泰知會各路嚴防佛子嶺登高廟胡村知會李能臣會同張敬修進勦劉長清帶兵赴莫村新墟搜捕後趕由登高廟入山烏

蘭泰帶兵至黃茅界探知有賊數百至平山將
練勇營盤奪占遂帶兵進剿賊黨甚衆我兵將
至山口賊開數十礮我兵用擡槍擡礮下攻前
面路已挖斷仍由嶺上轟打該匪退回東行我
兵用擡礮擊斃四五十人內有執旗騎馬者五
六人又由村中出賊五六百槍礮攻擊我兵後
隊從旁橫擊該匪始退兵丁由西邊小路魚貫

而下繞過山頭路又窄斷因用大礮向村轟打
賊俱退出山頂南北分走忽黃茅界有賊抄後
卽將接應後路兵撤回黃茅派兵上西山遙見
有賊在山腰伏藏遂留開隆阿照料又調秦定
三兵在登高廟接應回至平山官兵飢乏已極
暫在黃茅界登高廟一帶分紮李能臣王錦繡
督帶弁兵練勇跟追將新墟燒燬追至新羅逆

匪敗走張敬修帶勇至水槻村該匪吶喊而來
卽開礮斃賊數十名賊棄輜重爬山越澗追殺
二十餘里至新羅村張敬修追趕乘轎賊因山
徑崎嶇墜馬傷足知州馮玉衡率勇衝賊後隊
斃匪二百餘名賊屍內有戴紅風帽黃衣一名
黃綢衣黃風帽賊婦一名訊被獲僞司馬楊繼
涓供稱黃衣賊是僞軍師周錫能賊婦是僞女

官平南令倪濤在獨峯山帶壯練殺賊數十人
各營接應轟斃賊百餘人匪分三路抄截約數
千人壯練退冷水冲會同烏蘭泰擊賊副將王
錦繡督率遊擊馬福等至羅碧村擊斃賊匪二
百餘人經文岱自古狼渡河見匪黨滿山僅帶
黔兵千名未能抵敵巴清德向榮亦連夜拔營
趕至佛子嶺堵截此十七日各路追勦情形也

十八日巴清德向榮探賊由石門出至思旺會
商移營橫嶺攔截因雨不能前進烏蘭泰又到
平山口探營盤村有賊催兵前進該匪七八百
人由村內擁出我兵力擊該匪敗回因將道路
填起魚貫下山忽見風門坳賊五六百人向我
軍放礮官兵紮住平山烏蘭泰兩日殺賊約三
百餘名王錦繡等是日殺斃賊匪數十人經文

岱帶兵追截正遇賊匪過河官兵槍礮斃賊二十餘人該匪退去我兵追到大旗嶺山徑陡險卽於風門坳分兵駐守此十八日各路進剿情形也二十日烏蘭泰拔營前進探該匪尙有十之三四在山內一路追剿擒斬甚多追至龍街地方紮營張敬修由下窰移營至平南之得勝橋探得該匪由思旺逃竄欲至藤縣巴清德向

榮拔營欲移橫嶺前隊均已渡河探報樹林有
伏當卽催兵速渡至離思旺墟六七里之官村
廟正在紮營賊由思旺傾巢撲來賊匪漸近兵
勇開放槍礮斃匪多名我兵亦傷忽松林內衝
出一股約七八百人欲抄官兵之後卽撥兵勇
由嶺後壓下開放連環槍礮賊抵死不去楚兵
因火藥被雨溼盡不能抵敵退回紮營之處該

匪乘勢趕來我軍營盤未定卽時退走接應之
兵亦退該匪復從左邊山梁抄後兵勇突被數
路夾攻猶攘臂大呼四面衝殺巴清德向榮長
瑞李伏親衝賊隊千總楊成貴中槍陣亡我兵
且戰且退思旺距平南不遠恐賊因我兵失利
直竄平南遂暫回平南駐紮鍋帳多有損失俟
整理器械再約各路進兵鵬化團練連日殺賊

數十人退至蟒蛇界又斃賊二十餘人匪竄出
思旺等處此二十日各路進剿情形也二十一
日烏蘭泰冒雨前進自尖石頂大山至馬頭山
口遙見四處火起隨令屯兵爬上左右兩嶺黔
兵從中直出該匪五六百人見我兵上山俱逃
回思旺我兵卽至龍門駐紮兩日由山內追出
共搜殺賊匪六十餘名生擒十八名該匪因追

兵緊急飛奔驚竄古州鎮李瑞拔營紮佛子嶺
嗣又連據探稟賊到界水地方平南藤縣團練
先在水冲內埋伏賊匪一到由兩邊攻擊賊匪
敗走大合水地方屯住團練殺死會匪十餘名
現在烏蘭泰秦定三張敬修等屯紮平嶺其餘
各鎮弁兵紮營思旺巴清德向榮暫紮平南大
將橋一帶以堵平南要路聞匪有由思旺直竄

藤縣和平墟等處之信俟整理器械鍋帳卽拔
隊前進臣查該逆匪自新墟焚巢而竄思旺之
匪因追捕甚急占踞鵬化七十餘村巴清德向
榮繞道截賊前路紮營未穩遽被逆匪衝撲致
帳房軍械全被賊掠副將李瑞王夢麟帶兵駐
紮古城坳爲賊所必經之路任其兔脫經文岱
在鄧塘水雖屬兵單乃見賊滿山不敢抵敵均

難辭咎相應請

旨將李瑞王夢麟先行摘去頂戴仍交部嚴加議處管
帶楚兵先潰之李伏及經文岱交部嚴加議處
均責令留營帶罪立功以觀後效巴清德向榮
長瑞亦應請

旨交部議處以示懲儆陣亡千總楊成貴應請

旨交部議卹奏入

上命軍機大臣傳諭賽尙阿曰新墟賊匪因我兵圍逼
漸緊焚巢而出由藤縣和平墟竄逸此路可通永安
修仁等處爲入省要路該大臣自應持以鎮靜嚴飭
向榮一軍激勵士卒與烏蘭泰等聲勢聯絡或前後
夾擊或設伏抄剿總令該匪奔喘不暇斷其搶掠之
路再此時賊匪分竄勢已渙散正可乘此機會立懸
重賞設法擒縛逆首數人則賊膽自落其勢更易解

散該大臣務當相機妥籌嚴密布置毋得再有疏失
上諭內閣曰廣西新墟逆匪由藤縣和平墟等處逃逸
巴清德向榮等截賊前路被匪衝撲李瑞王夢麟經
文岱李伏管帶兵勇均未能遏賊奔竄之路實難辭
咎李瑞王夢麟均著摘去頂戴仍交部嚴加議處李
伏經文岱均著交部嚴加議處仍一併留於軍營責
令立功自效巴清德向榮長瑞亦著交部議處仍著

會同烏蘭泰等合力兜剿務將竄出各匪併力殲擒毋得再有疏失致干重咎陣亡千總楊成貴著交部照例議卹

十九日 壬寅 賽尙阿鄒鳴鶴奏言據探賊匪竄至

永安代理知州吳江督率兵壯嬰城固守設伏斃賊多名因援兵未到遂於初一日失守文武均已陣亡前因新墟賊竄疊經 臣 賽尙阿飛札

巴清德向榮烏蘭泰等緊躡賊蹤雖軍械不齊亦當趕緊前進乃屯守平南延稽時日烏蘭泰追至麻油坪地方及賊後隊探知賊匪前隊盤踞大旺墟另一股分往南行此間路徑分歧可通藤縣永安巴清德向榮欲令劉長清帶兵前赴修仁荔浦一帶堵截烏蘭泰尙恐兵單因令李能臣同往探知該匪已竄至藤縣之太平墟

烏蘭泰因由山繞路迎戰二十八日拔營知有
翻山小路可通永安隨路開鑿行七十餘里至
豆田翻山越嶺至馬林市初一日入二江峽滕
洞峽等處過六梅嶺酉刻接永安州飛稟州城
被圍催隊急行初二日至夏宜村正在造飯忽
探該匪已破永安因帶已到各兵前進趨至離
州城十餘里之文墟地方聞水竇仍有賊踞遂

趕築營壘探得賊現踞州城並莫家村衛龍村
及水竇等處自花祿翻山至此三百餘里馬不
堪行烏蘭泰每日徒步二三十里實爲勞瘁續
據開隆阿江忠源等飛稟自初二日紮營文墟
初三日因礮械未到稍爲休息初四日烏蘭泰
急不能待帶領屯兵向永安州城前進行至佛
子村距水竇僅八九里聞該匪有一千餘人在

水竇恐我兵全往州城該匪來抄我後留兵令
經文岱暨江忠源在佛子村後嶺駐紮以防水
竇烏蘭泰暨開隆阿秦定三率兵前進行至佛
子村中間倏見該匪八九百名由鬪嶺叢擁而
來被我兵擊退乘勝追過鬪嶺城內暨水竇之
賊約二千餘人從兩旁抄來我兵奮不顧身將
抄出之賊擊敗直追至永安南關該匪逃入城

中踞守先後擊斃該匪七八百人生擒十一人
烏蘭泰雖未趕及而連日翻山疲苦且已獲有
大勝尙屬可原巴清德向榮因損失軍械未能
刻卽拔追致該匪四竄咎實難辭應請

旨交部嚴加議處仍留軍營帶罪圖功目下省垣集團
募勇以固根本一面飛調湖廣官兵一千名前
來防剿李能臣劉長清已到修仁一帶臣賽尙

阿飛札卽往會剿復因南太匪首顏品瑤已經
殲斃省城緊要已將前遣赴南太之兵調回臨
桂鄉團統計五萬餘人均極整齊省城可保無
虞各州縣團練均由在籍侍講龍啟瑞御史朱
琦及其弟前刑部主事朱壽康董率可資得力
將來巴清德向榮之兵復行整頓添募潮勇趕
到可勦分竄各匪若以鄉團截其前兵勇追其

後使無駐足之所似亦無難撲滅至永安州城
文武如何殉難情形容俟查覈詳確奏請

恩卹

賽尙阿又奏言署右江道張敬修抵華錦村探
知該匪屯聚大黎距華錦村十數里旋據報稱
該匪分股各一二千人逃竄三江口及藤縣屬
之太平墟餘匪及首逆等三四千人已先由大

黎入永安州境仍有留大黎者二十九日復報
該匪紛紛他適據署潯州府張其瀚稟報逆匪
自竄入永安州城後分作三起一在距平南百
里之大黎水一在距大黎水九十里之榕樹江
口一在距榕樹江口三十里之太平墟巴清德
於閏八月初一日起程由平南至太平墟向榮
亦於是日起程由平南至濛江張敬修在大崗

欽定四庫全書
三

村駐紮等情張其瀚擬初二日會同進剿臣查該逆自新墟逃竄勢已窮蹙惟因永安兵力太單適當該逆分竄大兵尾追不及據守三日力盡城陷卽巴清德烏蘭泰向榮等連日分投追躡亦並無觀望退縮情弊實因各處山路分歧險窄難以趲行現在賊之大股及首匪多在永安州城各路兵勇陸續到來正可聚而殲旃第

事機屢變之後臣恐逆首潛逃及餘黨分匿急切不能剋期掃盡亦屬可虞奏入

上諭曰逆匪被困正可聚而殲旃勿令一名免脫至洪秀泉等欲由水路潛逃嚴密防範若首逆未能擒獲祇殺餘匪以塞責朕惟知將賽尙阿重懲不貸懷之上命軍機大臣傳諭賽尙阿曰新墟賊匪分竄後突入永安州城我兵繼至且追且擊該匪逃入城中閉門

踞守現在巴清德向榮烏蘭泰等均已督帶各路兵
勇先後追至務當嚴密堵禦四面圍攻乘此機會聚
而殲旃毋使一名漏網再城中賊匪是否有逆首在
內尤須探明設法殲擒所謂湖南兵一千名現在是
否趕到足資防剿新墟一帶賊巢旣已焚燬其零匪
是否剿淨聞逃匪有怨恨思散之言若能設計誘令
將首逆縛獻則餘黨更易翦除賽尙阿自抵軍營以

來凡遇奏報勝仗著有勞績朕無不優加賞賚卽巴清德向榮等亦均屢有恩施現在賊匪仍肆猖獗攻破城池該大臣等當知感知愧力圖報效以贖前愆上諭內閣曰廣西逆匪由新墟竄逸後於閏八月初一

日突入永安州城代理永安州知州吳江督率兵壯嬰城固守並設伏斃賊多名因援兵未至以致力盡城陷現在賊匪踞城拒守經烏蘭泰率同開隆阿秦

定三經文岱等帶兵赴援將抄出之賊擊敗逃入城
中此次巴清德向榮因軍械損失未能卽刻進剿以
致賊匪分竄咎實難辭巴清德向榮均著摘去頂戴
拔去花翎帶罪自效賽尙阿調度失宜亦著交部議
處其永安州城殉難文武深堪憫惻著卽查明請卹
以慰忠魂

二十六日酉己賽尙阿奏言據烏蘭泰等報閏八

月初六日出隊至圖嶺遙見莫家村有賊因派
令副將和福等帶兵在松嶺後埋伏侍衛開隆
阿等帶兵在新村秦定三等隨同接應該匪竄
擁而來烏蘭泰令旗兵放火箭正中賊隊乘勢
而進該匪稍退西山上賊齊撲而下屯兵突出
連槍攻擊該匪紛紛倒斃同時黔滇兵用連環
槍將山根賊擊敗中路之賊被湖北兵及屯兵

擊退惟莫家村賊隔河抗拒不退東南之賊抄
來我兵登時擊退該匪兩股合一用大礮向我
軍轟打經文岱接應秦定三等勇氣倍加斃賊
無數內有一紅衣黃帽賊騎馬指揮督戰我兵
將紅衣賊擊斃衆賊大亂我兵乘勢過河該匪
大潰追殺到城該匪閉城不准敗匪退入多被
殺死大獲全勝又據潯州府張其瀚稟逆匪由

大旺墟竄至藤縣之大黎里平南令倪濤督團
於八月二十八日追至上坡村見有賊船三十
餘隻沿河賊匪千餘隨卽開放鳥槍交戰時許
斃賊百餘旋有騎馬執旗賊目率賊擁上經武
舉廖凌漢等奮勇直前砍倒賊目二人殺斃數
十人勢怯敗走適藤縣三江口團練截擊餘匪
棄船逃逸署藤縣張鵬萬率團總前山西知縣

卓希泰於二十九日由三江口截殺該匪二十餘人旋調各處團練五千餘人衆心更壯當卽分撥追剿探得逆匪洪秀泉欲出濛江赴廣東隨卽密飭生員覃瀚元率練在三江口蚡蛇嶺旁埋伏初二日匪船十三隻先到用礮擊沈五隻該匪攏岸逃走壯練奮勇上船斬首十餘級餘船仍從上游駛回其大坡壯練初二日與匪

打仗生擒逆黨十餘名該匪不敢拒敵直竄永安州官軍復緊追至麻油村四面兜擒斃傷該匪無數臣查此股賊匪三路竄擾其濛江一路已爲倪濤張鵬萬擊沈船隻連日追殺全行竄回永安初四初六等日烏蘭泰又連獲大勝連次飛催向榮前進已於初十日拔營趕赴昭平堵遏並圖進剿永安又疊催劉長清李能臣迅

速拔營偏近州城現探該匪於初六日夜在各
要隘趕造木壘礮臺爲踞守之計我兵四路會
齊當亦無難得手署藤縣知縣張鵬萬連日獲
勝實屬奮勉應請免補本班以同知直隸州知
州卽行升用並

賞戴花翎六品軍功生員覃瀚元殺賊受傷應請以府
經歷縣丞儘先選用並

賞戴藍翎平南縣知縣倪濤擒斬多名應請

旨交部從優議敘

賽尙阿又奏言十一日烏蘭泰出隊設伏水竇以兵誘敵該匪五六千分路攻撲引至鬪嶺我兵大隊由嶺後突出槍礮齊發殺斃二三百名逆匪仍退歸木寨水竇賊一千餘名乘虛欲撲我營東面伏兵將出該匪一股由嶺北抄後一

股直奔鬪嶺欲截歸路均經官兵全行擊敗至
收兵時秦定三勝受鉛子傷猶督兵力戰鎮將
弁兵無不倍加奮勇復獲大勝

賽尙阿又奏言臣自到粵西迄今三月所調兵
勇不爲不多乃自新墟圍困功敗垂成致該匪
焚巢竄越總由兵不齊心以至尾追不力向榮
一軍又復因雨致挫頓兵平南十餘日始能拔

隊起程惟恃烏蘭泰一軍翻越追逐又因轉餉
爲艱難於迅速遂致永安失事查各路官兵疲
頓已久計尙可出隊者不過十之五六而師老
力竭亦復難期得力添募撤換勢固不得不然
至各處鄉團實可以資保障目前之局若四路
合攻非不可剋日蒞事然添募兵勇賞犒鄉團
需費實難豫計糧臺所存僅數月餉惟廣東關

稅一款未解到者尙有六十萬餘兩而隨徵隨解亦恐緩不濟急惟再乞

諄飭部臣寬爲籌畫陸續接濟俾免停兵待餉之虞各營鎮將亦已疲乏查有河南河北鎮總兵董光甲湖北鄖陽鎮總兵邵鶴齡湖北鎮標遊擊胡定國均屬有用之才懇請

飭下各該督撫轉飭該鎮等各帶親信官兵二三百人

迅速來粵以資調遣奏入

上命軍機大臣傳諭賽尙阿曰賊匪分作三路竄擾其
濛江一路已經壯練擊沈船隻竄回永安賊首洪秀
泉等是否與韋政等俱竄入城內抑係分竄他處務
須偵探確實設法誘擒無令兔脫現在賊匪大眾聚
入永安州城所有城內被脅良民正可乘機設法密
委有膽有識者潛入城中探悉賊情或設法誘擒或

與城內被脅紳民密相要約以爲內外夾攻之計則
勦擒更易得手全在該大臣設計用閒俾賊匪一舉
一動無不豫知庶乘機應變不難一鼓蕩平也師行
日久兵勇不免疲頓酌量撤換勢固不得不然著該
大臣相機籌辦

上諭內閣曰此次賊匪分作三路逃竄經水陸各路分
投截勦業已大加懲創該大臣仍督飭帶兵各員奮

力擒勦務將圍困永安城內及分竄之首逆並夥黨
悉數殲擒勿留餘孽烏蘭泰屢著戰功不避艱險殊
堪嘉獎著賞穿黃馬褂署藤縣知縣張鵬萬越境追
賊實屬奮勉著免補本班以同知直隸州卽行升用
並賞戴花翎六品軍功生員覃瀚元殺賊受傷著以
府經歷縣丞儘先選用並賞戴藍翎平南縣知縣倪
濤擒斬賊匪多名著交部從優議敘所有前經准撥

廣東關稅並飭部籌撥銀一百萬兩著戶部飛催速
卽解赴廣西以濟要需

上又諭內閣曰河南河北鎮總兵董光甲湖北鄖陽鎮
總兵邵鶴齡湖北鎮標右營遊擊胡定國著各該督
撫飭令馳驛前赴廣西軍營交賽尙阿差遣委用

賽尙阿又奏言又據署右江道張敬修稟聞八
月初二日帶勇追賊因地勢險窄各勇前後相

離竟不能齊隊懸崖陡壁技力無從施展未免
膽怯退縮初五日行至樟村探知逆匪船至山
門地方次早督勇出隊竟無一人敢進親自驅
追一里其時未見一賊而壯勇忽稱賊至紛紛
四散張敬修憤懣填胸情急投河經壯勇救援
而銳氣竟難復振自知辦理不善惟請嚴叅治
罪臣查張敬修所帶東勇屢立戰功何以忽然

改變當札該署道妥爲裁撤遣使各歸本籍前
經咨行兩廣總督募潮勇三千名並另募東勇
一千二百名計日可到卽交張敬修管帶所有
前次懇

恩將張敬修交部從優議敘之處應請撤銷又都司白
人鵬前經勦捕鬱林逆匪出力保奏奉

旨以遊擊儘先升用後因進勦新墟出力保以參將儘

先升用並請

賞戴花翎該員自保舉後推病不思出力未便姑容應
請將該員遊擊儘先及參將花翎一併撤銷又
曲尋千總李鍾林自保守備後不復出力亦請
將升用守備撤銷以示懲儆奏入

上諭內閣曰廣西署右江道張敬修管帶壯勇辦理未
善所有前次從優議敘著卽撤銷都司白人鵬千總

李鍾林自保舉後俱各推病不肯出力白人鵬疊次
以遊擊參將儘先升用並賞戴花翎李鍾林以守備
升用之處均著一併撤銷仍責令帶罪自效儻再不
知奮勉卽著嚴叅懲辦

欽定勦平粵匪方略卷八 辛亥年

九月初三日 乙卯 程喬采奏言湖南衡州地方齎

匪最多經知府陶恩培訪獲謝發詳等犯究獲
頭目左家發並於獲犯蕭二家起獲旗幟黃布
馬褂及木印令籤陣圖書信偽照多件提訊左
家發據供係聽從廣東人李丹入會以廣東老
萬山卽狗頭山之朱九濤爲會首又有張添佐

改名赤松子在湖北湖南各處藉名賣藥暗行
勾結朱九濤自稱太平王李丹稱平地王張添
佐稱徐洸王朱九濤約令該犯勾結匪徒其令
旗等件係李丹由廣東寄來用有偽印並寫老
萬山三字現又接李丹自廣西來信派伊爲衡
州總管囑令糾人等情所有究出頭目應請

飭令各該督撫拏辦奏入

上命軍機大臣傳諭程喬采龔裕駱秉章徐廣縉葉名琛曰據程喬采馳奏訪獲會匪訊究各情該犯等行蹤詭祕游弋於楚粵之交若不協力訪拏勢必滋蔓愈甚著徐廣縉葉名琛查明老萬山坐落何處是否卽係狗頭山該匪等係何會名夥黨若干分隸何處務卽嚴密訪查派委員弁將頭目朱九濤及匪黨全行弋獲並擣其巢穴毋得稍留餘孽其在湖北湖南

欽定四庫全書
欽定平定回疆方略卷八
二

勾結各匪著程喬采等就現獲各犯究其黨與詰其住址密飭兩省州縣不動聲色一體訪拏毋令一名漏網

上又命軍機大臣傳諭賽尙阿鄒鳴鶴曰湖南現獲匪徒左家發據供係聽從廣東人李丹入會現接李丹自廣西來信囑令糾人等情李丹由廣西致信左家發是該匪現在西省已有端倪此時竄匿何處夥黨

若干如何勾通衡州齋匪亟應嚴查勦捕盡絕根株
又左家發供以廣東老萬山卽狗頭山之朱九濤爲
會首朱九濤自稱太平王令旗用印寫有老萬山三
字等語前據賽尙阿奏獲犯供詞有太平王坐轎進
永安州城之語是否卽係朱九濤抑係韋政並洪秀
泉是否卽係狗頭山朱九濤之匪黨俱著確查具奏
再顏品瑤雖經就戮其弟顏三及其夥黨仍應乘勢

殲滅毋令賊勢復熾容縣梁二十大興業縣黃亞佐
等賓州麥二邱二嫂各股匪俱多至二千餘人其餘
股匪亦復不少著卽嚴飭該處文武併力堵截殲厥
渠魁解散黨與是爲至要

程喬采又奏言湖南提督余萬清聞訃丁憂暫
留江華防堵茲新任提督鮑起豹行抵衡州不
日可到江華接任查粵逆現踞永安與湖南江

華等縣處處緊連防堵十分喫重余萬清自上
年履任後妥籌布置擇要嚴防無一不臻周密
雖鮑起豹人極老練軍務亦素所講求而甫經
來南究不如余萬清之諳熟應請

旨將余萬清仍留防所與鮑起豹協同籌辦以期策應
悉協機宜奏入

上諭內閣曰湖南提督鮑起豹現已到任惟該省防堵

契緊余萬清著准其暫留該處協同鮑起豹籌辦一切事宜俟防堵事竣卽行回籍守制

初八日庚申賽尙阿奏言據烏蘭泰稟報約會總

兵李能臣劉長清於閏八月二十日一同進攻水竇逆匪十九日派秦定三穆騰額田學韜色欽額戴文蘭等各帶兵在獨水嶺龍虎嶺等處埋伏常祿開隆阿等帶兵分路接應經文岱江

忠源和福嚴守各營仍備接應隨卽銜枚前進
二十日至石燕嶺我軍離賊營不及一里該匪
用大礮連轟復於南頭營內擁出賊匪六七百
名我兵用擡槍火箭分路迎擊忽莫家村賊繞
來二股常祿之兵由山上壓下用連環槍轟擊
該匪敗走南行北面二寨之賊一齊擁出被我
兵擊敗該匪入寨不及向東南逃竄其接應之

賊拌死直撲我兵常祿清長一由山上壓擊一
由山腰截勦該匪死鬪未能合一其二寨之賊
俱竄南面二大營內穆騰額田學韜極力督攻
烏蘭泰飛令兵丁緊偪營牆該匪槍礮不能施
放衆兵一齊拋擲火器屯官思達朋首先帶兵
爬牆而上該匪用礮子木石擲打我兵拌死擁
入賊營北門早被堵住南門逃匪亦被截擊營

內賊匪約六七百名盡行殺斃搜獲槍礮旗幟
器械多件其輜重及板房帳房三百餘架悉行
燒燬當我兵攻營時東南山頭之賊撲來救應
經清長等擊敗退回其北面大股賊匪攻撲鬪
嶺經開隆阿擊退乘勝追勦復有莫家村賊七
八百名前來接應水竇經慶福之兵迎頭截擊
烏蘭泰率常祿帶滇兵接應賊匪已敗秦定三

雙江兵勇之略卷八
二

兵亦幫同追剿將衛龍村乘便燒燬時西北煙
火四起並有礮聲知係劉長清等兵到經文岱
江忠源亦帶兵趕至鬪嶺烏蘭泰隨飛調清長
等兵攔截水竇之賊其餘齊來攻城該匪復出
營來追經我兵奮力擊敗時莫家村等處之賊
退入寨壘施放槍礮各路俱有礮臺我兵奮攻
一時之久未能得力時已申刻子藥火繩殆盡

當卽收兵回營又據總兵劉長清李能臣稟報
二十日帶同川滇兵勇由龍眼潭前進該處山
險路狹山下均係水田北勞六廟竹枝等處均
有賊匪盤踞當卽督兵分路進攻轟擊賊匪延
燒村莊直衝至西門外西河村該匪先於山嶺
安礮設卡阻截施放大礮兵勇奮力逼近卡門
該匪死鬪官兵連放槍礮斃賊數十名生擒三

名臣查水竇莫家村皆賊之精銳所在烏蘭泰
雖四次獲勝而兵力太單無夾攻接應之軍卽
使破其水竇亦不能分兵以守巴清德前赴梧
州養病茲聞已愈趕赴昭平向榮因病由水路
已於二十日至昭平日內卽當拔營前進其所
帶之兵原係交總兵長瑞李伏先期統帶疊經
臣嚴札一面留防昭平一面分兵進攻永安乃

遲遲不應未能刻速進攻幸烏蘭泰獨力維持
屢挫兇燄此次攻營首先突入之屯官思達朋
打仗奮勇之總兵經文岱遊擊穆騰額都司田
學韜應先行請

旨獎勵仍令烏蘭泰查明此外出力員弁酌保巴清德
向榮自官村挫敗遲至一月始抵昭平惟因病
遷延稍有可原總兵長瑞李伏旣至昭平去永

安一百餘里乃因鍋帳未齊耽延不進應請

旨交部嚴加議處仍留營差委以責後效現在兵力多有疲乏前經臣咨行廣東巡撫再募潮勇三千名以資勦捕嗣准咨覆已先募潮勇一千名飭令潮州府同知甯立梯卽行督帶起程其餘二千名現由臣札飭潯州府知府張其瀚前往迎提並札令署道員張敬修就近募勇一千餘名

統歸烏蘭泰一路會合攻勦近據探報逆匪於
濛江一帶備有船隻恐官兵一律到齊該匪復
有竄越已密飭藤縣知縣張鵬萬招募前次得
勝團練密爲分布不動聲色夾江以待復密飭
劉繼祖帶領張釗水勇潛伏濛江中流遇有竄
匪卽行截擊臣現派臬司姚瑩持令前赴荔浦
卽可就近與諸將參酌辦理復派候補總兵長

壽督帶兵勇五百名前赴平樂防堵以昭嚴密
奏八

命軍機大臣傳諭賽尙阿曰賊匪竄踞永安以水竇
莫村爲前路門戶經烏蘭泰督帶將弁分路進攻四
次獲勝先將水竇攻破賊氣大挫惟莫村餘匪未淨
永安州城逆首尙未擒獲我軍乘勝圍攻是否兵力
尙單現經張敬修就近募勇千餘名歸烏蘭泰一路

會合攻勦著隨時察看情形調度接應務出萬全並
嚴飭巴清德向榮趕緊帶兵前赴永安協勦毋得再
有遷延坐失事機該匪於濛江一帶備有船隻希圖
竄越逆首洪秀泉是否仍在其內該大臣已密飭張
鵬萬劉繼祖等分帶練勇潛伏以待並派姚瑩長壽
分赴荔浦平樂等處相機防堵斷不可令該匪等乘
閒竄逸又費周章永安距省甚近匪衆盤踞州城難

保不分股窺伺現在湖南續調之兵想已趕到務須
加意嚴防妥爲布置毋得稍有疏虞其顏品瑤餘黨
現聞彼此各不相下正可設計用閒使其自相猜忌
更易剷除

上諭內閣曰逆匪竄踞永安州城以水竇莫村爲前路
門戶我兵圍攻州城先將水竇攻破賊氣已奪賽尙
阿現已分飭帶兵大員剋日進攻務當激勵將士乘

勢將莫村餘匪及因守城內分竄各路首夥賊匪悉
數殲除勿留餘孽所有此次首先攻入賊營之屯官
花翎副將銜巴圖魯思達朋奮勇可嘉著賞加總兵
銜總兵經文岱隨同烏蘭泰疊次殺賊立功所有前
將該總兵交部嚴議之處著卽加恩開復遊擊穆騰
額都司田學韜督攻奮勇均著交部從優議敘此外
出力員弁著卽查明保奏總兵長瑞李伏因鍋帳未

齊耽延不進均著交部嚴加議處仍留營差委以觀
後效

賽尙阿又奏言據布政使勞崇光稟報八月二
十九日署橫州知州黃輔相探得麥二匪黨一
千數百人由貴縣之三里墟竄往站墟練衆堵
禦互有殺傷該署州調集團練於閏八月初一
日馳抵謝墟探得該匪已竄至南岸村隨飭團

練堵截該匪開礮轟擊勢甚猖獗各村團到齊
進戰殲斃執旗賊一名騎馬賊先鋒一名賊夥
二十餘人初二日三次進攻該匪負嵎不出該
署州調博合墟一帶團練五千餘人以圍南岸
調謝墟站墟團練二千餘人駐紮北岸調周璞
古平中屯等村團練二千餘人堵截龍門塘又
諭那陽市黎村塘各團堵截上游該署州之子

黃韶年管帶壯丁百名幫同練衆堵截南岸村
後小路初三日分三路攻勦又派壯丁二百名
駕船在龍門塘及劉公墟一帶堵守並牽大纜
於河灘攔截以防免脫初四日直進大灘駐紮
偏近賊巢每路先縱火牛四頭衝入賊陣賊匪
不能開礮我軍乘風噴放花筒火勢猛烈賊不
敢出練壯奮勇直前搶獲賊礮向村內轟擊並

四面放火該匪情急紛紛鼠竄北岸槍礮齊施
該匪駛駕大船三隻欲逃每船約六七十人當
於灘頭擊翻二隻賊首麥二之船駛至中屯河
口被大纜牽掛橫互灘上該處亂石森立灘水
甚緊賊船不能竄過軍船亦不得前該署州趕
到用大礮轟擊斃賊二十餘人餘匪情急投水
俱於下流撈獲據獲賊認供內有賊首余亞源

大當割首級梟示賊首麥二抱大槳漂流而下
經練勇槍戳溺死又首匪麥亞銳同夥犯數人
由小路逃至大塘村山坳經黃韶年帶壯丁生
擒並獲夥匪三名初七日撈獲麥二屍身割取
首級梟示是役計獲首級四百五十九顆生擒
四百一十七名燒斃溺斃共約千人首夥各犯
悉數殲擒奪獲刀矛器械大小礮位油米等物

無數又賊首邱二嫂於八月閒由麥二殿內分
夥千餘人自來賓石牙墟竄至貴縣木樞墟府
經歷楊潤等帶壯練數百人進剿該匪負嵎不
出因賊衆兵單添調北山里練丁二千餘名會
剿並先期知會來武各縣堵截閏八月初十
一等日探報匪黨已至石龍墟盤踞該縣知縣
張汝瀛督壯練於牛窩嶺駐紮派團練二百名

分爲兩隊暗紮王村又派四百名分爲四隊前
後設伏選練丁前往誘敵該匪持械突出接仗
練丁且戰且退殲斃賊十餘人該匪蠶擁前撲
伏兵齊發斃賊數十人奪獲刀矛百餘件該匪
敗退各路壯練乘勝奮擊斃賊一百四十餘人
餘匪閉柵暗放槍礮傷練丁數人我軍開放大
礮破柵進墟斃賊百數十人生擒八十四人奪

獲器械百餘件餘匪逃竄武宣

山一帶該縣督壯練越境窮追適五山沙
吳成榮帶兵馳至十二日至梧山村適署武宣
縣知縣翟松在於交界防堵派練勇趕到協同
攻擊殺斃騎馬賊渠邱二嫂割取首級通計先
後各路斃匪六百餘人生擒二百七十餘名連
日搜捕餘匪以期淨絕根株所有此次尤爲出

力之署橫州知州升補知府黃輔相應請

賞戴花翎署貴縣知縣張汝瀛應請

旨交部議敘以示鼓勵其餘在事文武員弁紳團人等
應飭查明保獎奏入

上諭內閣曰此次勞崇光督飭員弁率領團練多方布
置不藉一兵之力將積惡首匪麥二殲斃並將股匪
一千七百餘人勦擒淨盡其邱二嫂一股亦經兵壯

將首夥殲擒餘孽卽可殄滅勞崇光調度合宜深堪
嘉獎署橫州知州升補鎮安府知府黃輔相出奇制
勝有膽有識著賞戴花翎署貴縣知縣張汝瀛素得
輿情勦賊出力著交部議敘在事文武員弁紳士團
練人等均著查明保奏

初十日
壬戌

上命軍機大臣傳諭徐廣縉葉名琛曰前因廣西新墟

逆匪分竄降旨飭令徐廣縉等嚴守肇慶等處昨據
賽尙阿奏現探該匪復於濛江一帶備有船隻恐官
兵一律到齊又思竄越東下肇慶各屬爲東西兩省
孔道最爲喫重該督等已添派員弁督帶兵勇馳往
交界處所著嚴飭認真防堵斷不可任其竄入至藤
縣距信宜不遠現在濠十八等股尙未撲滅該匪與
廣西韋政等皆係會匪結爲死黨恐韋政等被勦窮

蹇南竄信宜合夥必應於沿江一帶扼要堵截勿任
勾結轉致蔓延再該督現駐高州辦理浚十八等股
匪屢獲勝仗一俟此股辦竣卽酌量移紮兩省扼要
地方合力堵剿聲勢更爲聯絡諒該督等已籌及此
也

十八日
庚午賽尙阿奏言永安州城爲賊竄據一

月有餘各路大兵未能會合雖烏蘭泰一軍連

獲勝仗而兵力太單萬難責其收復城池職按
渠首總兵李能臣劉長清進紮古排尤當時顧
荔浦之新墟隘口且兵數亦復無多故僅與犄
角相持不能輕進專俟巴清德向榮兵勇到齊
方敷策遣乃該都統提督自官村挫折後在平
南頓兵旬餘猶未拔營起程及抵昭平又不迅
速前進屢經臣嚴催曲諭總以山深徑窄爲詞

又各因病折轉梧州往返遲延至九月初三日始纔抵平樂猶幸賊匪未竄方冀其催兵前進剋日奏功乃據向榮函稱病勢增劇請假二十日卽由平樂水路趕赴省城等語該提督爲本省統兵大員卽抱恙未痊何得擅離營壘乃當萬分喫緊之際竟將兵弁交與巴清德驟行回省實出情理之外應請

欽定四庫全書
欽定平定回疆方略卷一百一十八
旨將向榮先行革職責令隨營效力巴清德遷延日久
始到永安亦應請

旨交部嚴加議處仍留營帶兵以觀後效所有提督印
務札委總兵劉長清暫行護理仍乞迅

賜簡放以重軍務署古州鎮總兵李瑞自黃茅界拔營
由龍寨嶺翻山行抵永安屬之古東村紮營未
定被賊劫營鍋帳等項全失傷亡弁兵多名退

回昭平不復前進似此恇怯失機應卽請

旨革職拏問治罪現偵探各賊首均在永安城及水竇
莫村等處又於各隘口均築礮臺窅斷路徑冀
圖拒守巴清德率同總兵長瑞已抵荔浦之新
墟臣授以機宜令其會同劉長清等約會烏蘭
秦分路策應李瑞所帶之兵暫令嚴守昭平遏
其東竄復於臨桂附近各團挑選精壯二千名

又募壯勇五百名並京營弁兵二百名新調湖南兵一千名湖北兵五百名配帶礮位臣卽於拜摺後帶同前赴陽朔駐紮督令各路會合剋期攻勦陽朔距永安旣近且爲省南門戶旣易督戰亦可保衛省城聲勢較爲聯絡奏入

上命軍機大臣傳諭賽尙阿曰向榮久歷戎行素稱驍勇自湖南移鎮廣西屢獲勝仗前此雙髻山風門坳

之捷皆能身先士卒疊奏奇功何至官村一挫之後
與前判若兩人該員爲本省提督勦賊是其專責卽
有疾病亦當力圖進取以贖前愆何遽藉詞諉卸輒
行回省是否與巴清德意見不合其赴省面見該大
臣有無稟訴之詞巴清德向榮又何以藉病遷延兩
人如出一轍著賽尙阿詳細訪查並將前次雙髻山
風門坳兩捷巴清德與向榮究係何人奪隘先登官

村之敗是否兩人互相推諉以致失機一併確查具
奏該大臣仍當酌量兩人才識優劣用其所長如不
能同心合力卽令各領一軍責以自效勝則立予敘
勳敗卽嚴行治罪功罪分明該員等便無所用其推
諉諸賊首萃集永安正如釜底游魂不難併力殲斃
况賊心離貳有機可圖我軍又各路堵截該大臣現
進駐陽朔卽當激勵諸將迅督兵勇立掃妖氛萬不

可再事稽遲致該匪乘閒突圍竄擾他處並須嚴密
訓誡各營毋得稍洩軍情致匪黨得以探聽消息

上諭內閣曰廣西大股逆匪竄踞永安州城一月有餘
烏蘭泰雖屢獲勝仗仍須巴清德向榮督兵會合策
應乃該都統提督前因官村挫失頓兵平南月餘始
抵昭平屢催前進仍各稱病折回梧州往返耽延至
九月初三日始繞抵平樂永安急須圍攻收復而督

兵大員似此諉卸延誤實出情理之外向榮久歷戎陣豈竟不知緩急輕重前此雙髻山風門坳之捷皆能身先士卒累奏奇功朕方冀其努力滅賊克膺懋賞乃於萬分喫緊之時自稱病勢增劇將兵弁交與巴清德遽行回省身任本省提督擅離營壘設有疏虞咎將誰屬自問於心安乎否乎向榮著卽革職仍責令隨營效力廣西提督朕不遽行簡放著劉長清

暫行署理向榮果能知感知懼奮勉出力尙不難再
承恩眷若竟意存諉卸甘棄前功自速後禍朕亦不
能曲加寬宥也至巴清德以都統大員督帶重兵亦
復屢次託病任意遷延與向榮厥罪惟均著一併革
職留營自效署古州鎮總兵李瑞前在古城堵守縱
賊竄出今復於永安所屬之古東村地方被賊撲營
傷亡弁兵多名退回昭平不復前進實屬恇怯無能

著卽革職拏問治罪以示懲儆

二十日
壬申

上諭內閣曰廣西自軍興以來調派各省弁兵募集壯
勇爲時已閱一載屢次移營勦賊士卒等觸冒暑雨
瘴癘辛勞跋涉夙夜馳驅朕矐念南疆日盼捷音速
奏俾吾民得安衽席而從征將士亦得以早息疲勞
現在逆匪竄聚永安正如釜底游魂暫偷視息賽尙

阿出省親督各路官兵環攻會剿自不難剋日蕩平
朕聞在營兵勇無不切齒同仇誓圖滅賊當此賊勢
窮蹙士氣奮揚之際統兵大員等自當乘機鼓舞多
方激勵諭以及早成功卽可立膺升賞儻臨敵退縮
亦必執法從事嚴明賞罰更足勵士氣而固軍心其
帶兵員弁遇有保舉叅劾尤須覈實平允庶人人知
感知奮定可迅奏膚公朕宵旰焦勞念逆匪一日不

除吾民一日不靖賽尙阿現抵大營著將朕意剴切
宣布自各路帶兵大員及行閒兵丁練勇人等咸使
聞知從此掃蕩妖氛靖巖疆而安黎庶朕實有厚望
焉

二十九日辛巳徐廣縉葉名琛奏言廣西南太一

帶自殲斃巨匪顏品瑤後夥匪尙多臣等飛咨
提臣陶煜文並飭知府沈棣輝會督兵勇前赴

西省交界之小董墟大寺墟分駐與西省聯絡
聲勢合力兜剿閏八月初八日有大夥賊匪由
亞王山背翻越竄至新鋪村距小董二十里陶
煜文飭遊擊蘇崇阿等各帶壯勇馳往該匪出
村抗拒我軍迎擊斃賊三十五名生擒七名賊
匪退回初九日賊已過河竄至離新鋪六里許
之那陵村我軍整旅進剿槍斃執旗賊目一名

兵勇奮力齊進殺執旗先鋒五名又乘勢驅殺
一百四十二名生擒二十六名該匪卽由那陵
轉過勉村渡水而走其在新鋪之匪紮於對河
接應我軍冒險前進施放火箭焚燒村口房屋
初十至十六等日賊竄那勤村與新鋪勢成犄
角當卽飛飭知縣甘槐調集西鄉練勇二千餘
名隨同分剿該匪出村拒敵潮州兵勇槍斃在

前賊匪十五名匪卽退回堅閉柵門我軍開礮
轟擊攻入村內各兵勇均奮勇直前將賊巢燒
燬共斃賊二百五十七名生擒二十四名忽新
鋪賊匪遙撲而來玉山何萬興持刀在後不許
兵勇退回蘇崇阿復督兵進援賊始退去奪獲
礮位軍械多件據探報匪首黃錫從業經槍斃
陸老五黃春晚身受重傷垂斃賊勢大挫仍督

飭在事各文武無分畛域通籌設防不稍鬆勁
奏八

上命軍機大臣傳諭徐廣縉葉名琛曰廣西南太一帶
股匪竄擾兩粵交界地方經廣東文武督帶兵勇分
路堵剿現雖連獲勝仗而餘匪尙多且廣西正在攻
剿喫緊之際更恐四路分竄仍當嚴飭在事文武實
力堵截痛加剿洗不分畛域以期淨絕根株此次獲

勝之潮州兵勇屢挫賊鋒究竟兵丁與練勇孰爲得力匪首黃錫從黃春晚及陸老五等是否均已殲斃一併查明具奏廣西調撥潮勇三千名業已起程刻下想已行抵軍營惟念大兵雲集所需兵餉尤關緊要朕心甚爲懸念除戶部指撥軍餉銀兩外著徐廣縉葉名琛仍遵前旨於正雜各款並閒款內有可通融協濟之項寬爲儲備並傳諭會維於關稅應解項

內無論何款酌量豫備以濟要需

上諭內閣曰此次會剿廣西交界地方匪徒疊次獲勝
徐廣縉仍當激勵兵勇分投堵剿務將著名要匪及
各股餘匪悉數殲擒以期淨絕根株所有出力文武
員弁兵勇著查明酌量保奏

欽定勦平粵匪方略卷九 辛亥年

十月初五日丁亥賽尙阿鄒鳴鶴奏言粵西股匪

雖多本以金田會匪最爲頑狡死黨累千盈萬
固結甚堅不惟設謀用間末由解散卽疊經搃
斬芟蕪之餘而所過地方尙有愚民陸續煽聚
一經入會從逆輒皆誓不畏死金田逆匪自稱
太平天國確有歷次所獲犯供及僞衣僞印可

憑其匪首確係稱太平王惟該僞王究係韋政
抑係洪秀泉供詞往往不一臣等各路密發偵
探多有指爲洪秀泉者緣此會匪本由洪秀泉
馮雲山煽惑韋政傾家起釁始推韋政爲首後
仍推洪秀泉爲首而洪秀泉又一姓朱則向有
此說但未聞有朱九濤之名至張添佐一名屢
獲犯供匪黨內未有其人亦未聞有平地王徐

洸王等名目麥二邱二嫂等股亦已於橫州貴
縣等處勦滅至顏晶瑤就戮後其弟顏三及餘
黨經勞崇光會同德亮等疊加勦創芟夷過半
餘黨逃往廣東欽靈所屬崎嶇長灘等處現在
兩省合勦其中脅從大半解散有真心悔過而
尙無兇惡情狀者紳耆力保酌量收團亞王山
背一帶數十村莊現已一概廓清餘匪竄聚靈

山地面那勤新鋪一帶揀派得力兵勇越境前往與東省兵勇合力會剿凡有路可通村墟及橫州永淳各隘口均飭集團守禦如此嚴密布置不難悉就蕩平惟容縣梁二十大股本與何名科凌十八等股或離或合向於東西兩省高廉梧鬱交界地方出入滋擾現在督臣徐廣縉出駐高州專辦凌十八等股疊經函稱勦捕獲

勝當飭各屬於毗連地方嚴密堵截並派道員
林士傳專駐梧鬱一帶協同助剿又據林士傳
稟稱馳詣岑溪水汶地方查得何梁股匪竄至
岑溪地界者俱由扶參竄往東鎮一帶距水汶
地方百里而遙當飭兵壯嚴防至興業縣黃亞
佐本與梁亞花爲一股今梁亞花股匪已爲署
桂平縣李孟羣等率團撲散惟首匪未獲黃亞

三
佐是否仍在股內當飭各該縣嚴密搜查現計
粵西各處零股數月以來業已掃除十之六七
餘股自何梁凌逆及顏大餘黨外俱已敗殘惟
有永安逆匪實爲兇惡大慙臣等殫竭心力務
將此股及早殲平使各股敗殘之黨聞風潰散
大軍與各路兵勇得以分投撥用餘股較易剪
除奏入報

聞

賽尙阿又奏言臣行抵陽朔先期飛札各營官
兵分路向永安進攻四面接應九月初十日都
統巴清德署提督劉長清總兵長瑞李能臣等
督同將弁攻其北路將龍眼潭東山口及馬背
嶺村等處礮臺賊集團官嶺一帶礮臺全行燒
燬斃賊無算都統銜烏蘭泰帶同都司田學韜

等攻其南路並飭秦定三慶福帶兵接應將石
燕嶺銅盤村各匪用礮轟擊前後殺賊四五百
名十二日巴清德劉長清會同長瑞李能臣復
率將弁兵勇由北路進攻分隊誘敵三次斃賊
二百餘名烏蘭泰自初十日攻水竇後復於十
二日攻其南路賊匪伏於寨內不敢出拒我兵
槍礮齊發復斃賊二三十名十六十九等日南

北兩路官兵疊次進攻斃賊甚衆現仍嚴催各
軍更番疊戰力圖攻拔惟查各匪首分住水竇
莫村等處並非蟻聚城內探得該匪有將輜重
船隻順流竄入濛江之信已飭令新募潮勇行
抵梧州時遇有賊船卽行截擊並令劉繼祖馮
玉衡等迅速追剿防其竄逸所有此次尤爲出
力各員先行懇請獎勵奏入

上命軍機大臣傳諭賽尙阿曰逆匪竄踞永安官兵未能攻入城中殲擒渠首現計所募潮勇必可到齊該大臣駐紮陽朔就近調度卽當分撥南北兩營四面圍市步步偪入將各處賊營迅籌攻毀該匪首旣分住各營並非蟻聚城內固當先圖克復城池爲擣穴擒渠之計俾在外各匪無可竄入尤當力防各匪首之在水竇莫村等處者分路逃竄務飭統兵將帥趁

此圍勦喫緊之時將著名各匪首悉數殲擒毋任漏網該匪既有將輜重船隻順流竄入濛江之信所有潮勇前赴梧州時是否已於途次將匪船截擊該匪或因我兵前截後追登岸他逸尤須密飭劉繼祖馮玉衡等刻刻嚴防切勿稍有疏虞墮其奸計

上諭內閣曰此次攻勦永安州城雖未卽時收復賊勢已極窮蹙正可乘時掃穴擒渠一鼓蕩平長瑞屢戰

獲勝甚爲奮勇著加恩開復總兵原官遊擊田學韜
督兵力戰身受重傷深堪嘉尙著以參將儘先補用
六品軍功把總全玉貴以寡擊衆並手刃數賊實屬
勇往著賞戴花翎以守備儘先補用其餘出力員弁
兵丁著俟收復城池分別請獎陣亡弁兵查明議卹

初六日戊子戶部奏言粵西軍務方殷東西兩省

均須籌備該商民等情殷桑梓其願出資助餉

者諒不乏人臣等公同酌擬該兩省土著紳商
士庶有深明大義國爾忘家出資助餉自數萬
兩至十萬兩者非尋常急公可比仰懇

天恩准由該督撫等專摺奏請破格

加恩以昭激勸恭候

命下由臣部咨行該督撫等悉心商酌妥協辦理仍飭
嚴防所屬毋得稍有抑勒致滋弊端此外各省

如有情願出資助餉自數萬兩至數十萬兩者
並聽其便由各該省督撫倣照辦理奏入

上命軍機大臣傳諭徐廣縉葉名琛曰現在東西兩省
軍務方殷均應寬爲籌備著徐廣縉葉名琛察看地
方情形如有急公好義捐資較多者不妨專摺奏請
候朕破格施恩以昭激勸想該督等必能妥協辦理
力求實濟不致稍滋流弊也

初七日己丑程喬采奏言竊臣前因粵匪竄踞永

安與湖南之江華永明較近誠恐大兵圍剿餘
匪四處奔逃而新甯城步等縣又均緊接粵西
前次粵東股匪竄擾宜章雖已殲擒勦散亦恐
去而復來彼禦此防處處均關緊要必須居中
控制始能兼顧無遺衡州係適中之地是以奏
明移紮茲自抵衡後督飭嚴防布置不致有鞭

長莫及之虞至城步新甯現距賊氛尙遠並經
該府州雇募鄉勇團練壯丁聲勢亦極聯絡但
新甯曾經屢次滋事不可不未雨綢繆前將該
處調防之兵移撥永州兵力稍形單薄臣於所
調湖北兵內添派二百名前往協同防守以壯
聲威又新任提臣鮑起豹與前任提臣余萬清
現在同駐江華縣永州鎮總兵孫應照現駐宜

聞

章臣並函囑該提臣等隨時確探賊情酌量緩急如須分駐亦卽馳往籌防臣遵與撫臣駱秉章體察情形悉心籌畫並督飭各文武認真巡緝總期圍固民安鄰匪無從竄越奏入報

十一日癸巳徐廣縉葉名琛奏言何名科自廣西

容縣與梁二十大等糾集餘黨仍入信宜縣境

滋擾因凌十八正在羅鏡圍困之際未便分兵
經臣等飛飭另調各營兵丁及添募壯勇前來
合剿一時尙未能集屢經札飭現駐信宜之高
州鎮道督飭兵勇及各鄉團練實力堵禦並東
省之茂名化州西省之岑溪北流容縣交界等
處一體嚴防該匪自入境以來卽分夥在豐埔
扶參附近數十里內滋擾迨八月二十八日大

夥齊至扶竹墟被該墟團練斃匪一百二十五
名連夜竄至渡頭一帶旋由扶參竄至東鎮墟
與西省岑溪縣界之水汶毗連及分飭移兵往
追又向北竄距信宜縣城僅四十里與西省北
流縣接壤旣恐遠逃出境又慮近徧圍城當飭
該鎮楊昌泗回城防守飛催續調各兵丁星夜
前來會剿二十四日該匪率夥竄至魚良坡經

西省容縣防堵之兵勇殲擒多名奪獲礮械等件該匪復在茂名之紅花坡屯踞欲由金洞而竄北流經西省防堵大崙兵勇擊退兩月以來該匪東奔西竄總未得以出境九月初四日高廉道宗元醇遊擊劉開泰自黃襪嶺拔營前進行至二十里之良窩地方探聞該匪又復竄出劉開泰遂令後隊紮營良窩親督前隊兵勇飛

騎緊追仍分飭兵勇追至沈香嶺地方見有後
隊賊百餘名回頭拒敵經各勇擊斃騎馬賊目
一名夥犯十二名生擒一名初六日探聞該匪
仍回東鎮墟我軍復相約齊驅直抵墟口擊斃
十五名生擒二名並奪獲大旗礮械多件該匪
仍退墟內用礮向外轟拒初七日該匪由東鎮
墟逃至懷鄉墟初九日馮子材督帶壯勇拔營

並進該匪大隊來撲壯勇衝出共殲斃二十八
名生擒二名匪卽退逃各兵勇又復由後繞前
殺斃六名奪獲槍矛刀牌四十餘件初十日該
匪傾巢而出且分隊埋伏在附近大營嶺腳各
兵勇一鼓作氣分路迎擊將埋伏嶺腳之賊匪
先行殲斃我軍併力齊追適遇出壚之大隊賊
匪在前迎拒其敗走者亦卽轉回無不拚命死

鬪轉戰數時之久復殲賊一百八十五名生擒
十八名奪獲礮位馬匹刀矛槍械甚多頭目梁
二十大因下馬點礮經提標兵丁緊跟先行認
準出其不意放礮立斃臣等查何名科與梁二
十大同惡共濟狼狽爲奸梁二十大旣經殲斃
並節次斃賊五百餘名匪膽已寒現飭宗元醇
等激勵兵勇盡力掃蕩不難計日殲除奏入

上諭內閣曰此次圍剿信宜匪徒先後殲擒五百餘名復經殲斃匪首梁二十大賊勢已極因感仍著嚴飭高州鎮道等激勵兵勇趁此聲威悉數掃蕩並將股首何名科嚴拏務獲

十五日丁酉賽尙阿鄒鳴鶴奏言廣西添調官兵

廣招壯勇並增防設備保衛省城以及各處堵捕匪徒請領經費每月需銀七十萬兩現在庫

存及已撥未到之餉接續到齊可敷七八十日
之用萬一功虧一簣餉不應手實爲可虞惟有
仰懇

天恩再發內帑銀二百萬兩以資接濟儻得軍務速竣
卽行奏明截止計京餉到粵程途日期總在兩
月以外必須趕緊起解以圖萬全奏入得

旨戶部速議具奏

同日

上命軍機大臣傳諭賽尙阿曰逆匪竄踞永安我兵屢次進攻惟以抗拒不出爲苟延之計其窮蹙情形已可概見我兵日久疲乏能出隊者僅五六千人卽使潮勇到齊合計亦祇八九千人果否足資調遣兵力不至單弱潮勇到齊之後該大臣務當嚴飭帶兵將官四面圍攻合力進剿嚴密布置謀定後動務將賊

首韋政洪秀泉等設法誘擒不可任其竄逸破城之
後儻有零星餘匪分竄他處亦應嚴密堵截勿留餘
孽向榮現在病體若何如已就痊卽飭令迅赴軍營
勉力自效以贖前愆

十八日

庚子

上諭內閣曰廣西逆匪竄踞永安州城現在大兵進剿
層層圍攻賽尙阿駐紮陽朔督辦所需軍餉業經戶

部陸續撥解源源接濟惟念兵勇雲集需用浩繁必
應寬爲儲備除現經戶部撥解外著再由內庫添撥
帑銀一百萬兩作速解赴廣西大營備用朕睠懷南
服宵旰難忘不惜疊發帑金數百萬兩爲吾民除害
諒該大臣必能督飭文武紳民兵勇殄滅醜類迅奏
膚公以副朕綏靖巖疆至意

二十一日
癸卯 戶部奏言粵西軍餉臣部擬撥廣

東籌備廣西軍需銀三十萬兩山西秋撥後續
徵地丁銀三十萬兩河南秋撥後續徵地丁銀
二十萬兩兩淮秋撥後續徵鹽課銀二十萬兩
共撥銀一百萬兩並奉

旨添撥內庫銀一百萬兩共合二百萬兩之數恭候

命下臣部飛咨各該督撫趕緊起解並沿途各督撫嚴
飭地方官妥爲護送星速解往廣西以備應用

奏入

上從之

二十三日巳乙徐廣縉葉名琛奏言何名科股匪

自九月間大受懲創以後該匪卽由虎跳山紛竄廣西岑溪縣地方遊擊劉開泰督兵尾追沿途復獲餘匪十七名信邑兵勇及各鄉團練陸續拏獲何梁兩夥黨一百餘名節次訊供僉稱

岑溪壯丁彭肇昌與何名科向爲同類疊經密
飭岑溪縣知縣張永鎰嚴防賣放乃何名科將
至岑溪之勝田地面彭肇昌卽以該匪二千餘
人攔擁而來料難抵禦之言向張永鎰恐嚇該
員畏葸先退迨何名科到時彭肇昌佯爲打仗
實則放行並送給火藥鉛子十二擔何名科亦
送銀一包並丟棄廢礮一尊僅拏獲挑夫八名

希圖塞責此次何名科殘敗之餘連挑夫不滿
千人該縣若能扼要嚴堵後有追兵必可聚而
殲旃乃疊經嚴飭而該縣執迷不悟始終倚彭
肇昌爲腹心私放殘寇以致功敗垂成殊堪髮
指相應請

旨將廣西岑溪縣知縣張永鏞卽行革職拏問務獲彭
肇昌到案治以通盜之罪現何名科竄至北流

地面已嚴檄弁兵盡力窮追並懸賞格飛飭迎
頭堵截庶可殲厥渠魁以淨根株

徐廣縉葉名琛又奏言伏查何名科梁二十大
於八月初間糾黨一千五百餘人由容縣擾及
信邑高州鎮總兵楊昌泗現有兵勇一千八百
名足敷攻勦於閏八月初三日進兵扶參村乃
紮營旣失地利臨陣又昧機宜賊匪分隊撲營

我軍聚於山窩不能衝突以致陽江鎮標千總
關鎮標外委沙兆麟陣亡並傷斃兵丁八名鍋
帳亦有遺失全軍退出山口賊始折回相應請
旨將高州鎮總兵楊昌泗交部嚴加議處以爲籌勦無

方者戒再閏八月初九日增城營參將王學詩
帶兵三百行抵高州臣徐廣縉面加激勵曉以
信邑山徑叢雜宜慎選本處練勇爲嚮導迨紮

營黃襪嶺鄉民奔告有賊數百至附近之高嶺
速求救援兵勇俱有奮激之心而王學詩一味
恇怯不敢出營掩捕 臣等復於水擺大營調回
遊擊劉開泰選帶勁旅攻打頭敵賊匪卽聞風
圖竄九月初四日追至東鎮墟奪旗斬馘賊勢
已靡王學詩若能同心協力必可痛加剷除乃
該參將見墟旁出有百餘賊撲其前隊卽棄馬

而逃以致賊得乘閒免脫應請

旨將增城營參將王學詩革職拏問從重治罪以伸軍

律

徐廣縉葉名琛又奏言羅鏡圍剿凌十八逆匪
該匪藏匿墟中必須誘令離墟設法攻剿閏八
月十九日分飭兵勇三路進攻先將礮械於東
山背等處埋伏守備薩國亮等由石皮灣進攻

新墟外委馮元亮由東山廟進攻東墟遊擊閻
恆瑞等督同兵勇直攻西墟該逆分投迎敵各
兵勇施放槍礮擊斃逆匪百餘人該逆退奔山
梁薩國亮黃曜吉分兵抄上賊衆奔潰我軍從
後尾追各伏兵亦同時共起賊仍退入墟中兵
勇乘勝追放槍礮轟塌礮臺數處擊斃者不計
其數此次東西南三路聚攻共計擊斃該逆不

下二百餘名兵勇皆奮勇撲墟因墟巢堅固未能攻破現在制勝之法惟有多備大礮分路轟擊使該匪無可容身庶兵勇得以乘機撲進埽穴擒渠九月十二日派副將瑞琳等分四路攻剿其北路甫經運礮到嶺賊匪突擁出巢欲搶大礮黃琴勝手執刀牌護礮兵勇奮力交攻殺匪數十名西路大隊亦飛繞而來兩路夾攻逾

兩時之久賊匪散而復出者三次死傷甚多並
生擒十餘名南路黃曜吉用礮轟塌新街大礮
臺一座傷斃賊匪十餘名縱火燒去墟外房屋
東路衛佐邦直攻東墟墟口礮臺因賊俱埋伏
濠內我兵礮不能傷及至向前搶墟則濠內槍
礮齊發兵勇不能前進該匪被困日久仍能抗
拒總由糧食火藥接濟未能盡絕屢經嚴飭附

近賊巢之鄉務絕接濟仍飭在營將弁逐日設法進攻使其疲於奔命無暇圖竄奏入

上諭內閣曰逆匪何名科自九月間大受懲創以後紛竄廣西岑溪縣地方經遊擊劉開泰帶兵追勦沿途獲匪多名先後計共拏獲匪黨一百餘名岑溪縣知縣張永鑰乃聽信壯丁彭肇昌恐嚇之言畏葸先退以致逆匪遁逃該壯丁彭肇昌並有得銀縱賊情事

實堪痛恨張永鑰著革職拏問仍嚴飭緝拏彭肇昌
到案治以通賊之罪廣東高州鎮總兵楊昌泗於勦
辦逆匪何名科梁二十大兩股種種調度乖方增城
營參將王學詩不能與遊擊劉開泰協力勦賊疊次
逃避以致賊得乘間免脫實屬怯懦無恥楊昌泗著
先行開缺交部嚴加議處王學詩著革職拏問從重
治罪現在該逆何名科竄往北流縣地方著該督嚴

飭兩省文武員弁合力兜擊勿令漏網逆匪凌十八
經派出將弁分路進攻先後斃匪數百名匪勢窮蹙
現仍藏匿羅鏡困守不出該督務當激勵將弁併力
圍攻仍須設法誘擒並將附近賊巢地方嚴密搜查
斷其接濟以期迅速剿除毋致遷延時日

十一月初二日

癸丑

賽尙阿奏言何名科股匪前

由容縣北流竄來欲與永安會匪合夥疊經諄

飭各營嚴防截剿茲據右江道楊彤如等稟報
該匪於九月十六日由岑溪南鄉翻山竄至容
縣經知縣韓彥章等率同壯練擒斬七八十名
十八日該匪竄往北流界復經知縣阮正惠等
督率練丁會同各營官兵擊退該匪向鄧江涉
水經兵練追擊溺斃擒斬甚多餘匪奔竄旋據
署貴縣知縣張汝瀛稟稱該縣團練人等於二

十七日在縣屬郭南里地方擒獲匪首何名科
及大頭目何名怡梁十八李四暨夥黨多名此
股匪徒業已蕩平 臣現派隨帶司員前往會同
右江道楊彤如將何名科等提訊確供卽行就
地凌遲處死並查明何員首先擒獲何員協力
追勦購綫接應以便分別奏請

恩施量加鼓勵

同日徐廣縉葉名琛奏言何名科股匪自信宜
擊敗後竄入藤縣所屬之岑溪寮平大塘一帶
經團練擊傷十餘人其餘不敢抗拒由容縣坡
里一帶而逃經該縣督飭兵勇擊斬五十餘名
各鄉團練陸續截獲四十餘名餘匪分竄北流
前隊占踞新村後隊先過鄧江小河互爲應援
經該縣會同署鬱林營參將瑞保分督兵勇進

剿該匪見勢不敵向鄧江河鳧水而過官兵從
旁截殺擊斬一百數十名生擒賊匪男婦二十
餘名餘匪翻山越嶺而逃廣東追兵亦卽趕到
旋據鬱林州知州顧諸庚稟稱九月二十二日
探有敗匪五六百人由北流而來卽派兵勇趕
至牛屎塘邀截殺斃一百數十人各鄉團練分
投截殺沿途殲斃不計其數餘匪四路奔竄訪

查何名科竄入貴縣境內與何名怡梁二十大
之弟梁十八分匿貴縣之雷村新定村甯村等
處各有死黨相隨於九月二十七日經兵勇將
何名科何名怡梁十八拏獲並獲大頭目李大
頭四等八名廣東在事員弁可否仰懇

天恩准其擇尤酌保數員以昭激勸均奏入

上諭內閣曰首匪何名科一股嘯聚數千人竄奔兩粵

交界地方滋擾日久罪大惡極茲經廣東廣西兩省
官兵練勇合力兜剿將首夥各匪悉數擒獲訊明正
法餘匪翦除殆盡辦理甚屬可嘉其首先擒獲逆匪
者何人協力追剿購綫接應者何人著賽尙阿徐廣
縉等會同確切查明據實保奏現在竄踞永安州之
洪秀泉等及羅鏡墟之凌十八等均係著名會匪豈
容日久逋逃該大臣暨該督等仍當激勵將士併力

圍攻迅速殲除以慰朕望

徐廣縉葉名琛又奏言查羅鏡墟逆匪信宜人
凌十八爲一股鬱林人陳二爲一股化州人吳
三爲一股設法用閒離其黨與十月初二日凌
十八與陳二吳三口角彼此互毆兩次陳二吳
三率其夥黨議於初三日黎明從八字嶺逃出
遂照會各將備陽爲出師攻其東南卻於北面

重重設伏該匪吳三陳二果於黎明擁衆從營
頂岡繞出凌十八聞之驚慌亦率衆隨後守備
岳生璧先放號火四路伏兵齊出署守備薩國
亮等各帶兵勇抄截將陳二凌十八兩股截回
羅鏡吳三全股直奔八字嶺經東西兩路弁兵
會同東莞新會順德肇慶各壯勇或抄前迎擊
或隨後尾追圍於山窩槍礮齊施刀矛並舉生

聞

擒男婦二百二十七名擊斃七百餘名鏖戰三時之久已將吳三全股殲滅奏入報

二十五日丙子賽尙阿奏言自上月初三日南北

各路會勦後烏蘭泰暗伏地雷轟斃二十餘賊嗣後潮勇陸續俱到十八日烏蘭泰派副將常祿等攻賊之南秦定三等在銅盤村一帶接應

烏蘭泰開隆阿等攻賊之北副將巴圖在秀才
橋埋伏已革遊擊劉文賢在北蕩村埋伏守備
戴文蘭等率帶兵勇環攻誘敵先將放卡巡更
賊殺斃四名其水竇村旁屯糧小營並大壘村
一帶賊屋盡行燒燬其州城暨莫家村賊匪分
股來襲我軍經巴圖劉文賢經文岱周鳳岐督
兵環攻烏蘭泰回兵截擊該匪退奔石溝村水

寶迪北賊匪亦經開隆阿督兵擊退計先後斃
賊四五百名東南路駐紮之許祥光張敬修馮
玉衡各帶兵勇到古眉峽口用火箭燒賊望樓
篷寮賊奔峽內對山賊匪亦被北勇擊斃二百
餘人劉長清李能臣長瑞等分三路進徧紅廟
賊匪鳴角開礮我兵攻擊多時斃賊數十人其
東平嶺二股賊匪均被我兵擊退十一月初五

初六等日烏蘭泰等復攻水竇焚燒賊巢搜獲
該匪鑄礮鍋具各路兵勇合力追殺先後斃賊
五六百名再向榮病已就痊該員感激

聖恩亟思自效已於初八日移營亭亭卽圖合力大舉

奏八

上諭內閣曰向榮病已痊愈旣知感激朕恩力圖報效
著賞給三品頂戴飭令迅速進剿以專責成現在南

北各路疊獲勝仗新紮營盤距城漸近該匪勢已窮
蹙著賽尙阿督飭文武盡力搜捕勿任竄逸

二十七日 戊寅 鄒鳴鶴奏言查潯州府屬之桂平

貴縣平南武宣南甯府屬之宣化新甯隆安永
淳太平府屬之龍州明江甯明崇善左州養利
永康柳州府屬之象州慶遠府屬之宜山鎮安
府屬之天保百色共十九廳州縣並所屬各土

司地方受害較重必須量加撫恤請將被搶之
戶不論丁口每戶均給銀一兩如給倉穀照部
價每石五錢計算每戶給穀二石燒燬房屋無
論間數瓦房每座給銀二兩草房每座給銀一
兩奏入

上諭內閣曰廣西潯州等府所屬桂平等十九廳州縣
並所屬各土司地方被賊擾累居民受害較重必須

急加撫恤茲據鄒鳴鶴奏請分別酌給銀穀著照所
請妥速辦理毋令窮黎失所

十二月十七日

戊戌

賽尙阿奏言大兵勦捕永安

逆匪自十一月初六日烏蘭泰等獲勝後向榮
於十五日移營上壘橫嶺等處該逆乘我兵營
壘未定三路出撲向榮率同鎮將官兵奮勇轟
擊斃賊無數總兵長瑞督飭新舊潮勇直趨龍

眼塘該逆埋伏齊起鏖戰逾時我軍開放連環
鳥槍賊衆紛紛倒地全夥退去十七日該匪三
四百人從西礮臺直上龍眼塘後山城外亦有
五六百賊遙爲聲援我軍伏兵齊起立將河邊
之賊擊敗黃鶴飛李孟羣之勇從旁趕截賊卽
散逃兵勇追過河邊而還二十日我軍進紮龍
眼塘沖口該逆千餘人直撲新營伏兵左右衝

出槍礮齊施擊斃賊匪多名賊卽敗走二十二
日該逆傾巢而出約四千餘人分三股彙擁而
來一撲龍眼塘大營一搶龍眼塘山梁一衝二
洞口新營其搶龍眼塘山梁之賊被董光甲馬
龍等分兩翼包抄當將此股賊衆擊退其撲龍
眼塘大營之賊尤爲兇很向榮先戒嚴陣勿動
俟賊近營盤數十步內我軍伏兵盡起槍礮齊

施擊斃賊匪甚多該逆且鬪且走退至河邊死
拒不去向榮親率劉長清等張左右兩翼抄至
河邊我兵爭先過河欲包賊後該逆始行潰逃
其衝二洞口新營之賊因黃鶴飛李孟羣之勇
正在築營該逆意欲攻我不備向榮先令該勇
一半築營一半出敵該逆三次衝來俱被擊敗
烏蘭泰探知向榮於二十一日進紮龍眼塘卽

於黎明帶勇逼近賊巢以分賊勢正與賊遇我
軍分路截擊斃匪無數二十二日烏蘭泰復督
兵出隊攻打莫家村賊巢該逆傾巢出鬪被我
兵擊敗三次追殺殆盡臣當以南北兩軍雖經
連獲勝仗而該逆負隅拒守總未攻克州城必
須各路會攻方可制其死命因定二十四日辰
時密傳各軍屆期齊進是日向榮由北路進兵

連敗紅廟及舊縣東礮臺之賊追至土城共斃
賊二百餘名南路烏蘭泰亦於是日辰刻進兵
五戰皆勝亦斃賊二百餘名又許祥光張敬修
於二十三四五等日由東路古帶沖口一帶進
兵行近永安州城之大誥嶺該逆向前抗截有
手執黃旗騎馬賊二名率賊前來我軍四面圍
裏槍礮環擊斃賊百餘名生擒賊目二名餘匪

紛逃卽將附近賊屋二十餘間放火焚燒提議
二賊據供一名韋亞晚係韋政之姪一名濫仲
時訊明正法二十六日烏蘭泰於獨松嶺開濠
連紮四營二十七日復約許祥光等進攻水竇
該匪屢出拒敵均爲我兵擊敗前後殺賊共一
二千名自此次連日痛勦賊匪不敢復出現擬
各營進逼直擣州城總期一鼓蕩平稍紓

宸廛奏八

上命軍機大臣傳諭賽尙阿曰向榮自統帶北路各兵
以來知感知奮與諸鎮將同心協力南路烏蘭泰督
兵夾擊與東路許祥光張敬修等爲犄角之勢十一
月二十日以後各仗頗爲得手向榮先經賞給三品
頂戴茲又開復原官正宜感激愧勵乘勝迅勦烏蘭
泰親督南路各兵勇亦復旁無牽掣兩路移營進紮

漸徧州城自不難剋期攻克其城外水竇各處賊寨亦須同時進攻勿令匪黨互相救援致有竄逸此次痛勦之後賊勢業已窮蹙如再不能迅速攻勦徒延時日朕惟賽尙阿是問若或防堵不周致賊匪潰竄再擾他處朕惟烏蘭泰向榮是問其能當此重咎耶

上諭內閣曰此次各路官兵殲斃賊匪不下一二千人疊獲勝仗十餘次連營進徧蕞爾孤城自不難剋期

收復向榮疊次親冒矢石激勵兵勇人人用命實屬
知感知奮前已賞給三品頂戴著卽開復廣西提督
原官並賞還花翎以示鼓勵賽尙阿惟當督飭各路
文武員弁兵勇乘此屢勝軍威奮力攻剿迅速掃穴
擒渠以慰朕望

十九日

庚子

上諭內閣曰廣西逆匪竄踞永安州城數月以來官兵

四面攻圍尙未克復朕心實深焦盼昨據賽尙阿奏
現在南北兩路移營進徧疊獲勝仗蕞爾孤城自不
難指日攻克行軍之道賞罰爲先朕於賽尙阿出京
時頒給軍營備賞各件又特賜用遏必隆刀期於信
賞必罰以振軍威當此大兵合剿賊匪窮蹙之時尤
當號令嚴明俾我將士知感知畏併力爭先庶克一
鼓殲擒膚公迅奏著再傳旨諭知在事文武員弁兵

壯人等務各齊心協力奮勉圖功乘此屢勝軍威機
不可失其出力將士果有奮勇超羣者除由該大臣
據實保奏外卽將前頒賞件傳旨賞給以示褒榮其
有臨陣退縮不能用命或守禦不嚴致賊竄逸貽誤
事機者該大臣卽用朕所賜遏必隆刀立正典刑以
肅軍紀毋稍姑息總期賞罰公允迅掃妖氛以慰朕
望勉之懍之